

DISANGILA DÌDÌ

KADÌYÌ DÌMWÈNEKA DYÀ

MUKÀJÌ-MUSÈLA WA KILISTÒ



Ndi mushipe lwendu lwa buluwa, bwa mudimu wa Mukalenge. Pa nanku cidi. . . Tudi ne disanka dya kwikala kaaba aka. Ndi ngeela meeji ne, musangu mushaale mwaba ewu, mvwa munwāmbile ne: musangu wōnsò utudi tulwa, kudi kupangika muntu kampanda. Nenku bu twètù mwa kwalukila cidimu cyalwa, ne bu Mukalenge mwa kunenga, nekupangike muntu kampanda.

² Kudi kampanda, uvwa pabwîpi naanyi, pabwîpi naanyi menemene, mu mwoyi ne mu nyuma; uvwa m'Mwaneetu wa balume Lyle. Mvwa misangu yōnsò anu mpeta mwakidilu mulenga, pāmvwà mbwela, ngiimana paanyima apu ne nteeleja, mu birò bya Mwaneetu Jack, ngimbilu wa kale wa tungimba tunaayi awu. Badi bimbila mu Butumbi, diloolo edi. Ee, kukaadi dimwe dya ku miine mēyì awu dimane kuya Mwamwa, dindile makwabo asatu awu. Ngeela meeji ne ncyadyakuumvwaku dyôdì adi cyakabidi pa buloba apa to. Kadi ncyà bushuwa ne ndi mwindile bwa kudyumvwa cyakabidi, Mwaneetu wa balume, Mwaneetu wa bakaji Moore mwaba ewu, mu Ditunga adi mwikalabo. . . mwikaladi kadiyi mwa kupuwijiibwaku to.

³ Mwaneetu Palmer uvwa musadidi munene wa Kilisto. Ndi mwa kuvuluka muvwa Mwaneetu Jack ungambila bwa nsòmbelu wende—wende mulambula kudi Nzambi awu. Bavwa bakoonyi baa mabaya, benzela pamwe. Nenku uvwa wamba muvwaye mwa kwikala munkaci mwa kudya didya dyende—dyende dya mundaamuunya, mwikale ne dyāmpà dyende dyela minyiinyi mu cyanza, udyā dyāmpà dyela minyiinyi adi eku ubala Bible wende. Nwamonu anyi? Mmwenzenze bintu binene bya menemene, mwine Mwaneetu Palmer awu. Mmukoonyi wa mabaya mwîmpè, taatù mwîmpè bwa bânà bende, famiye mulenga wa dikema. Mmubakoleshe bōnsò bwa kukwacilabo Mukalenge mudimu. Bwa ku dyanyi paanyi dimanya, bwōnsò bwabo mbasungidiibwe ne buujiibwe tente ne Nyuma Mwîmpè. Nenku aci ndikwacisha dinene bwa muntu kana yōnsò ewu mu matuku aa, nwênù bânà baa balume ne baa bakaji. Kadi, nwamonu's, byōnsò bikaadiyeku mwenze abi kabyakwenzaku cintu cya nsongo to anu dikwacila dya Nzambi mudimu, anu yêyè mukwacile Nzambi mudimu. Nenku diloolo edi, bikaavwaye mwenze panu pa buloba abi, byenzedi byende bîmpè abi,

nyewu wayi ku difutu dyende, bwa kwikalaye naabi. Nzambi ikishisheku musuuka wa mwaneetu wa balume awu.

⁴ Ndi mumanye ne, padibi anu ne eci ntabernacle panu, nenku ndi—ndi mumanye ne yêyê neikalè...dîyì dyende neditungunuke anu ne kwikala mwaba ewu. Nudi mwa kudyumvwa. Mwaneetu wa bakaji Anna Jeanne ne—ne mwanaabo wa bakaji, mu kwimba kwa orgue ne piano, mushindu mwine uvwabi kabiyiku bikengela bwa kwindilabo to. Mwaneetu Palmer uvwa wimana anu mwaba ewu ne utuma anu musambu awu nunku, umba utungunuka's. Bôbô bavwa mwa kuwubakula. Kadi mêmè ncivwaku. . . Mvwa mêmè anu ngindila mmuumvwa yêyê utuma misambu.

⁵ Kudi bânà bende; kudi mukajende; ne kudi Mwaneetu Jack, mulunda wende wa katapula-kateeka, bavwa balunda bidimu byônsò ebi; ne Mwaneetu wa balume Brown, Mwaneetu wa bakaji Brown, ne nwênù bônsò beena tabernacle: Nzambi anubeneshe. Mmumpangike, nansha mêmè. Nzambi ikishisheku musuuka wende wa bukitu awu, too ne patwatwilangana nende mu ditalala.

Twinyikaayaaku mitu yetu.

⁶ Taatù wa mu Dyulu wa ngàsà, pândi ngaakula anu bwa musadidi munene ewu apa, mmumpangike, diloolo edi, muvwaye undabula ku cyanza, ne kaamumwemwe kaa muntu wa meeji kavwaye naaku aku pavwaye wamba ne: “Nzambi akubeneshe, Mwaneetu Branham,” patuvwa tubwela mu ciibi apu. Ndi mumanye ne yêyê wamanyi kubànda ku Nzubu Webe, diloolo edi. Pa nanku ndi ndomba, Nzambi munanga, bwa Wêwè wènzèku ne mamuma awu, byenzedi byende bidi bimulonda abi, bidyunde, biikàle bitungunukila mu bânà bende, mu mukajende. Tudi tulomba bwa Wêwè kubenesha mukajende, Mukalenge. Wêwè utu mwambe ne neWìkalè bayende wa “bakaji bakamba badi bakamba baa cya bushuwa.” Ndi ndomba bwa Mwaneetu wa bakaji Palmer ne bwa bânà bônsò. Ndi mumanye mwa kubumvwiila bônsò luse, pa kujimija kwa nyaanaanyi ne kujimija kabidi papa wanyi.

⁷ Pa nanku, Taatù, patucidi mwaba ewu apa, diloolo edi, tudi tolomba bwa Wêwè kulongolola myoyi yetu, yôyi paayi, bwa diine dîbà adi. Katwena bamanye to. Ndifwanyine kulwa anu cintuluntulu mudi dyende dilwe emu. Katwena bamanye ne nedilwe dîbà kaayi to, kadi tudi bamane ne didi ne cya kulwa. Pa nanku tudi tulomba, Nzambi, bwa Wêwè kukenketa mwoyi ne mwoyi udi mu mwaba ewu, diloolo edi. Nzambi, kushiyi wànyì to. Kenketaku wànyì, wôwò paawu, ne unteete. Mukalenge, kwôkò kwikàle bubi kampanda mu twètù, bùmùshèku. Tudi baswe kuKukwacila mudimu. Ki kiipacila kajima katudi naaku, nkaa kuKukwacila mudimu.

⁸ Pongololaku Nyuma Webe pambidi peetu, diloolo edi, ne lumingu elu lujima. Beneshaku tabernacle ewu udi dînà ne n'Life Tabernacle. Swaku bwa apete kaabujima kaa mabeneshà a dînà adi ne ìkalè mùle tente ne Mwoyi wa Nzambi, mu lumingu elu, bwa kusungila musuuka wònsò udi mujimine, bwa kuuja mwena kwitabuuja yònsò ne Nyuma Mwîmpè, ne kuvwijulula ditekemena didi munda mwetu dipyadiya, Mukalenge, cyakabidi. Tudi tulomba kabidi bwa Wèwè kwondopa babeedi ne beena ntatu bònsò badi balwa munkaci mwetu. Swaku bwa Nyuma Mwîmpè Webe munene ìkalè kaaba aka, Mukalenge, ne ondope anu naka...kabidi alaabe muntu ne muntu bwa kwitabuuja. Twènzèlèku bintu ebi, Taatù.

⁹ Nzambi, nkwaçishèku mèmè mpindyewu. Piikalabi, mudibi ne cikaadi ngwanyi musangu wa kutwala Mukenji. Ndi ndomba, Nzambi, bwa Wèwè kulekela anu luseke lwa buntu lushaala ku luseke. Swaku bwa Nyuma Mwîmpè abwele ne akwate mudimu pambidi peetu, Mukalenge. Swaku bwa Nyuma Mwîmpè angate disangisha, Mukalenge. Tudi bamanye ne twètù katwenaku bakumbane to. Katwena bafwanyane kucyenza to, nansha umwe wa kutudi. Katwena twamba mutudi bakumbane kucyenza to. Kadi, Mukalenge, tudi bamanye ne Wèwè ki Yèyè udi mukumbane awu. Pa nanku tudi tukweyemena Wèwè, Mukalenge. Enzaaku cyenzedi, Nyuma wa Nzambi, umate ne citaleela pambidi peetu. Tudi tulomba mu Dînà dya Yesu. Amen.

¹⁰ Mpindyewu ndi muswe kutumaku myoyi ku nshinga, kudi ekeleeziya yidi yituteelejila ku nshinga mpindyewu mu ditunga dijima edi. Tudi mu dipetangana ku telefone, cidi ciikàle ndongolwelu mukese mulenga utudiku bafike ku dipeta, bapetele kudi Mwaneetu Pearry Green wa ku Beaumont, mu Texas. Nenku ekeleeziya ayi, yònsò nkòòng, yidi yilondà Mukenji ayi, mu ditunga dijima dya États-Unis, yidi ku nshinga, diloolo edi. Tudi tutuma myoyi, kumutu ne kwinshi kwa Côte Ouest, kuumukila ku Vancouver kupweka too ne ku Tijuana, mu Mexique, kupicila mu San Jose, mu Los Angeles. Tusumbu twònsò tudi muntwamu atu, nyewu tunwelela myoyi kunu ku Shreveport. Kabidi, too ne ku Prescott, mu Arizona, kudi kasumbu kadi kuntwaku kadi kindile Mukalenge aku, nyawu tunutumina myoyi, ne ku Tucson, kabidi ne ku Sierra Vista. Too ne ku New York kwaka, kumutu ne kwinshi, mu ditunga dijima, Mukalenge anubeneshe, muntu ne muntu. Mv'w'a kujinga bwa nwènù kwikala mwaba ewu, diloolo edi, ditunga dilengele lengelaayi dya Louisiane edi, mudi mwenze bu lubanza lwibîdi, bwanyi mèmè. Ndi...

¹¹ Nudi bamanye, nwènù baa mu New York abu, nudi bamanye's, ntu nnusekaku ndambu mu mushindu kampanda, mushindu unutu nwènù nwakula awu. Ndi menemene anu kwetu kumbelu diloolo edi. Eyowa. Bantu bònsò baa muneemu

emu, nudi bamanye's, bavwa bamba ne: "Wetwawu, mwoyi awu, Mwaneetu Branham. Wâlwakù ne Mwaneetu wa bakaji Branham ne ba nkonga bônso bwa baalwa kutwelaku dîsù." Kaa, ekelekele! Aci's cidi cyenza ne ndyūmvwèku bilenga be. Aci's ki Anglais mwena diinà, bwanyi mêmè. Kî nne ndi nnukeeka nwênù beena ku esete ne ku nord, ne baa ku myaba mishiileshiilangane to. Kadi, nudi bamanye's, ntu ngeela meeji ne mêmè ntu mulediibwe anu Ntomboji wa kale nenku bidi bikengela nshaale mushindu awu. Ntu—ntu mucinange mu mushindu kampanda, mêmè mwine. Ki Anglais mwena diinà.

¹² Mwawa mu didya kampanda dya dinda dya Beena Kantu-ku-byanza, muneemu emu abidi adi panshi aa, nenku kwambabo ne: "Netùjuukàayi kuulu mpindyewu bwa kwimba musambu wa ditunga." Ki mêmè kujuuka, kwamba ne: "Bwa kwetu kundela ku Kentucky, kule kwaka." Ee, bwanyi mêmè, s'ki ciwya musambu wa ditunga ngwôwô awu. Ki cyanyi paanyi cyônso cîmvwà mumanye pa bwalu abu ncyôcì aci. Pa nanku, nyawu tunutumina myoyi. Nenku mpindyewu kùdì . . .

¹³ Ngeela meeji ne nebateete bwa kwela disangisha dya didya dya dinda edi ku tudyomba, kabidi, didya dya dinda dya Beena Kantu-ku-byanza, mu diisambombo mu dinda. Mwaneetu Green neânwâmbilè, bu mudibi ne yêyè ngudi ku bikolokolo kuntwaku mpindyewu. Pa nanku yêyè ngwanwambila dîbà dyabanga didya dya dinda adi, ne mpa dîbà kaayi, diloolo dyônso, dyakengelabi bwa kukeba ku cisanji. Tudi tunwela twasakidila wa manza tente. Nwatusambidilaayiku.

¹⁴ Mpindyewu, bwa disangisha dya pa kaaba dya mwaba ewu, ne tabernacle wa Mwaneetu Jack, ndi njingaku anu kunulomba dingaanyishila kampanda, diloolo edi. Bu mudibi ne mwawa ne cya kuyiisha Diyîisha dyanyi dya disakidila mu di—ditunga dijima, diloolo edi, kudi masangisha etu a pa kaaba adi alonda Mukenji. Mu edi, ndi—ndi mufwànyine kuleepeshaku ndambu. Ne pashiishe, kabidi, ndi mufwànyine kuyiishakù Dilongesha dyà nshindameenu. Pa nanku, piikalabi nanku awu, ne nwênù kanuyi nuCiitaba to . . .

¹⁵ Anu mûntù ngambamba misangu yônso pa bidi bitangila kudya kwa dyâmpà dyela cérise ne: "Pândi nkatwa mênù pa lutete, ncyêna ntwila dyâmpà adi to, ndi ntwila lutete, ntungunuka anu ne kudya dyâmpà adi."

¹⁶ Pa nanku byôbì byenzeke ne nteele cintu kampanda diloolo edi, ndi . . . ee ndi . . . ki kabingila kamwepele kadi kenze ne ngiitabe dibiikila edi nkôkò aku, diloolo edi, bwa mêmè kwikala kaaba aka, bwa kuyiisha Diyîisha dyanyi dya disakidila kudi tusumbu twa ditunga dijima, mbwalu Mwaneetu Jack utu misangu yônso anu ukangula ciibi cyende mu budishikaminyi wamba ne: "Yiisha cidi pa mwoyi webe aci." Pa nanku ndi ndyūmvwa anu bu ne ndi kwanyi kumbelu's.

17 Pa nanku bidi mwa kwenzeka ne munda emu, mu disangisha dya pa kaaba ditudi edi ne Mwaneetu Jack, nkufwanyine kwikala bambi ne bamwe bantu badi bafwanyine kubengangana naanyi pa Dilongesha. Pa ciibidilu mèmè ntu ne nsòmbelu wa bukalanga bwa kubenga kuteela tuntu tudi tutangila dilongesha mu cyambilu cya muntu, udi mumbiikile bwa kulwa kuyiisha kwende. Pa nanku, paanyima paa diloolo edi, ndi ngeela meeji ne nènesambidilè anu babeedi cyanaana ne kwenza disangisha dya pa ciibidilu. Kadi mvwa mwele meeji bwa ne nëndyanjilè kunumanyisha kumpala kwa dîbà ne, kwòkò kwikàle cintu kampanda cîndi ngamba cifwanyine kwikala kaciyi cisankishangana to, mona's, nucimbadile anu ne ndipanga dyanyi, ngeela meeji, ne nkupanga kumanya kwanyi kwa cidi cîmpè cipite aci. Nenku nwânsambidilaayiku.

18 Pa nanku mpindyewu tubuululaayaaku mu Dîyî, mu nshapita kampanda mwaba ewu. Ndi njinga kuleedila ku myaba yâbûngî diloolo edi, bwalu ndi ne Mifundu kabukabu ne tuntu tukese tufunda mwaba ewu mu kâlûpê.

19 Ndi mvuluka musangu wanyi wa madyatambalà wûngâakabàndà mu cyambilu mu Life Tabernacle, kukaadi bidimu makumi abidi. Kabyakakengela bwa mèmè—mèmè kwikala mufunde Mifundu yanyi ne tuntu twa dileedila pa kabeji to. Mvwa anu ne bidimu makumi abidi mwine musangu awu bishaadile ku bîndi naabi ebi. Kadi patudi twakulangana apa's nyewu nkaadi musambuke bidimu makumi abidi ne bitaanu, pa nanku ndi. . . bwa musangu mwibidi's. Pa nanku ndi ne. . . ncicyênà mwa kubivuluka kabidi mushindu wûmwà mbyenza awu to. Bikaadi bikengela bwa ngiikalè mfunda Mifundu yanyi pa kabeji, ne misangu mikwabo kufundaku mu cikòsò kantu kampanda anyi kantu kansanga kândi njinga kuleedila.

20 Nenku mpindyewu Mukalenge abenesheku patudi tubala Dîyî dya Nzambi apa, mu Mukanda wa Loomo, nshapita wa 7. Mpindyewu, ndi muswe ndongesheku cyôci eci mu mushindu kampanda cyenze bu dileesona dya kalaasa kaa Dyalumingu.

21 Ndi mumanye ne kudi bantu biimane kuulu. Kadi ku tabernacle, pa ciibidilu, mu Jeffersonville, tudi tujinga kunusekelelaku bwônso bwenu, diloolo edi, nwênù peenu, bu mutudi bamanye ne nudi nuteelejila ku nshinga ku tabernacle aku. Nenku's mbyenze anu bu ne tudi tusanganyibwa mu tabernacle, diloolo edi, bu ne nuwua nusanganyibwa kuneeku eku, bantu benda balonda bimanu, bapate baye ne mwa naka. Mpindyewu, ndi ncinka ne mushindu awu ki unudi peenu, nwênù, bônso badi mu citupa cya ditunga aci abu, badi balwe bwa Mukenji abu.

22 Mpindyewu netukwate mudimu ne cyôci eci byenze bu dileesona dya kalaasa kaa Dyalumingu. Nenku kî nciludikila ku cintu kampanda, bantu kampanda, anyi cintu kansanga

to; anu kudi Ekeleeziya, Mubidi wa Kilisto utudi tuditacisha bwa kulombola ku meeji matambe kwikala a ndondo ne twipacila tutambe kutumbuka, biikàle twitabuuja ne Dilwa dya Mukalenge Yesu didi pabwìpì. Ki citudi twitabuuja ncyôcì aci. Kabidi, dikaadi ditambe kuseemena ne bidimu makumi abidi kupita pavwadi musangu wa kumpala wûngààkalwà mu Shreveport awu. Kaa, bintu byàbûngi mbyenzeke kacya anu ku mwine musangu awu's we! Mpindyewu tudi bindile Dilwa dya Mukalenge, mu lukongo lwetu elu. Mêmè ncyêna mwindile ditabuluja mu lukongo lwetu elu to. Ndi mwindile Dilwa dya Mukalenge, mu lukongo lwetu elu.

²³ Mpindyewu mu Loomo 7, ndi mutwishiiibwe ne nudi ne Bibles yenu mibuulula, myaba yônsò mpindyewu, mu ditunga dijima, tudi baswe kubala ne ntema yônsò. Mpindyewu, edi, didi . . . edi Diyiisha ndipâtula mwômò emu, didi dimweka anu bu ne didi pa dibaka ne dishipa dya dibaka, kadi mu bushuwa bwa bwalu kî nnanku to. Bwanyi mêmè, nciprofeta bwa Ekeleeziya mu matuku a ndekeelu. Tubalaayaaku:

Kanwena bamanye anyi, bânà beetu, (bwalu ndi ngaakula ne aba badi bamanye mikenji,) mushindu udi mikenji ne bukookeshi pa muntu pacidiye ne mwoyi?

Bwalu mukaji udi ne bayende mmuswikiibwe kudi mukenji kudi bayende awu pacidiye ne mwoyi apu; kadi bayende awu yêyê mufwe, yêyê mmusuuludiibwe ku mukenji wa bayende awu.

Pa nanku, pacidi bayende awu ne mwoyi, yêyê musediibwe kudi mulume mukwabo, nebamubiikile ne ngëndââmàsàndi; kadi bayende awu yêyê mufwe, yêyê mmudishikamine ku mukenji awu; mu mushindu wa ne yêyê kèna ngëndââmàsàndi to, nansha yêyê musediibwe kudi mulume mukwabo.

Bwa bwalu ebu, bânà beetu, nukaadi peenu balwe bafwe pa bidi bitangila mikenji kudi mubidi wa Kilisto; bwa nwênù kwikala baswikiibwe, anyi, kwikala basediibwe kudi mukwabo, yêyê mene udi mubiishiibwe ku bafwe awu, bwa twêtù kukwamina Nzambi mamuma.

Bwalu patucivwa mu mubidi, . . . nkuka ya mpekaatu, yivwàku bwa bwalu bwa mikenji ayi, yivwa yikwata mudimu mu bidimba byetu bwa kukwamina lufu mamuma.

Kadi mpindyewu tudi basuuludiibwe ku mikenji, mu kwikala bafwe ku citurwa bakwaciibwemu aci, bwa twêtù kukwata mudimu mu bupyabupya bwa nyuma, kadi kabiyi mu bukulukulu bwa dileeta nansha.

²⁴ Nenku mpindyewu tusambilaayi.

²⁵ Nzambi munanga, nyewu twafumu ku dibala citudi twitabuuja ne n'Diyi dinsantu dya Nzambi. Nenku ki citudi twêtù twitabuuja ne, nansha katoba kamwe anyi kasunsukila kaa dileeta kakaakuumushiibwaku ku Dyôdi edi byônsò kabiya byûle to. Ne tudi twitabuuja ne Mukalenge wetu mmutwâmbile, mu Bwakabuulwibwa nshapita wa 22, ne: “Ewu yônsò wadidinga kuumushilaKu Dîyi dimwe anyi kusakidilaKu dîyi dimwe awu, cintu cimwecimwe aci, cyende citupa, necyumushiibwe ku Mukanda wa Mwoyi.”

²⁶ Nenku tudi tumona ne, ku dikonyangaja dya Dîyi edi, muvwa Sataana muDikonyangajile Eva, dimufikishe ku dyela mpatà ku Dîyi dimwepele, cyôci aci cyakeela bukwabantu bwônsò nkôông mu cibula cya cimvundu cinene. Anu Dîyi dimwepele cyanaana!

²⁷ Pashiishe tudi tumona munkaci mwa Mukanda ne, Mukalenge ne Musungidi wetu wakalwa, ne Wakatupa citûtù tuteela pa bidi bitangila Dyôdi adi eci: “Muntu kaakwikala ne mwoyi ku dyâmpà nkaayaadi to, kadi ku Dîyi dyônsò didi dipatuka mukana mwa Nzambi.”

²⁸ Pashiishe didimwija dya kadiyi tuseku dya mu Mukanda wa ndekeelu, wa Bwakabuulwibwa bwa Yesu Kilisto ne: “Ewu yônsò wadidinga kusakidila dîyi dimwe anyi kuumushila Dîyi dimwe awu, citupa cyende necyumushiibwe ku Mukanda wa Mwoyi.”

²⁹ Éyi Nzambi, bamanye, biikàle tumona mushindu utudi twêtù aba tupanduluka bipese bu biyooyi, bamanye ne tudi twendela pa tushinga twa mândà tutekete twa mwoyi wa panu, twa mwoyi wa cifwaka ewu (katuyiku bamanye ne ndibà kaayi ditwabiikidiibwa bwa kuya kalumbulula ku Dyulu kwaka to), enzaku, Éyi Mukalenge, bwa tuteeke ku luseke byônsò bidi mu mwoyi wetu, byônsò bidi mu meeji etu, bwa tutangile buludi ku Dîyi Dyebe, diloolo edi, ne bwa Wêwê ulwe bwa kuDyumvwija ne mêyi adi ne mwoyi. Twënzèleku nanku.

³⁰ Swaku bwa Nyuma Webe apone pambidi peetu ne alaabe ne Dîyi ku mwoyi wetu, bwa twamona mwa kuumuka kaaba aka, diloolo edi, bantu batambe bwîmpè kupita mutudi mpindyewu emu, bwa twamona mwa kwikala ne cyumvwilu citambe kwikala cya ndondo pa bidi bitangila Yesu Kilisto. Twënzèleku nanku, Mukalenge, bwa twamona mwa kuumvwa dituku ditudi ne mwoyi, ne dilongolola dya Nzambi bwa cisamba Cyende mu dîbà edi, cikondo cinene, cya ntàpè nkutape, cya mîdimà citudi ne mwoyi mpindyewu eci. Nzambi, utulaabeku, kî ng'anu mwakudi to, kadi muteeleji. Nenku, twêtù bônsò pamwe, fikishaku myoyi yetu ku dizakala ku Dîyi Dyebe. “Bwalu diciina dya Nzambi ki cibangidilu cya lungenyi.” Twënzèleku bintu ebi, Taatù, bwalu tudi tulomba nunku mu Dînà dya Yesu. Amen.

³¹ Ndi njinga kufila cyena-bwalu ku ndambu wa mêyi âmvwà njinga kwamba mwaba ewu, ne ndambu wa Mifundu yîndi

njinga kwenda kulonda paanyima ne ntema yônsò eyi, bu Mukalenge mwa kwanyisha, ku Diyiisha dya—dya disakidila edi, ku cidi kaciya cimweneka, cya ne: *Disangila Didì Kadiyì Dimwènèka Dyà Mukàjì-Musèla Wa Kilistò. Disangila Didì Kadiyì Dimwènèka Dyà Mukàjì-Musèla Wa Kilistò*. Kacyena cyumvwika bu Diyiisha dya disakidila to. Nansha nanku, Mufundu kana wônsò ewu, tutu ne kusakidila bwa Wôwò wônsò.

³² Ndi ne kusakidila kudi Nzambi bwa kwikala ne mwoyi mu eci cikondo cya bidì byènzekà bya ndekeelu bya maalu malonda a buloba ebu ebi. Ncyêna mumanye to. Bu ne mvwaku ne cya dyamba kumpala kwa difuka dya dyulu ne buloba, ne bu ne Nzambi wakangaadijilaku ndongamu mujima awu kumpala kwanyì, mungabileku ne: “Ndi—Ndi muswe bwa wèwè kuyiisha. Kadi mpindyewu ncikondo kaayi cyûdi ujinga, bwa kuya pa buloba bwa kuyiisha?” Nunku ndi musungule eci cikondo, bwalu ndi ngeela meeji ne eci ki cikondo cya ngôlò.

³³ Ncyà bushuwa ne mvwa mwa kwikala munange kwikalapu mu cikondo cya dimweneka Dyende dya pa buloba. Kadi, nansha nanku, ndi ngeela meeji ne mpindyewu ewu ki udi cikondo citambe bunene, bwalu ncikondo ciikalaYe mwa kulwa bwa kwangata bantu badiYe mupikule, biseemene pabwîpî ne dibitiika dya ku bafwe pââpâtuka bapikula bônsò. Mpunga wa butumbi kaayi utudi nende’s, wa kwakula ne bantu bàdì bàpûnga ne lufu, cikondo cinene! Tudi tucizukila’s.

³⁴ Ne tudi bamanye ne maalu malonda akaadi aya ku dijika. Maalu malonda a pa buloba adi ajika abidi adi panshi aa, pashiishe netubwele mu dituku dipyadipya, mu Bukalenge bunene bwa bidimu cinunu. Aci, mêmè bu mwena kwitabuujja, ndi ngitabuujja... Bukalenge bwa bidimu cinunu, bukookeshi bwa mu Bukalenge bwa bidimu cinunu ne Kilisto, bidimu cinunu pa buloba; dyalukila dya Mukalenge Yesu mu mubidi, bwa kulwa kwangata bantu baa mubidi, batumbishiibwe, kudi Mashi Ende makezudi.

³⁵ Pôlò mwaba ewu udi ufila cifwanyikijilu, mu Mufundu wetu ewu, pa bidi bitangila mikenji ne ngâsà, kadi mwikàle ubifwanyikija bu dibaka ne dishipa dya dibaka. Mufundu mwine ewu batu bawuyiisha ku mpuukapuuka menemene, bwalu, mu mushindu kampanda, udi utangila, bu, dibaka ne dishipa dya dibaka. Kadi ùdi ùtàngila kabidi citupa citambe bunene cya dibaka ne dishipa dya dibaka, mushindu udiye uteeta bwa kuteeka mu bulongame mwaba ewu bwa ne twètù, bu—bu Ekeleeziya, katuyiku mwa kwikala basediibwe kudi maalu a pa buloba ne kudi Kilisto, musangu umweumwe awu, kadi—kadi kwikalabi byanyishiibwe ne bikumbanangane ne mikenji pa bwalu abu to, anu mudibi kabiyiku mwa kwikala byanyishiibwe bwa mukaji kwikalaye musômbe ne mulume kampanda cibi mwikàle ne bayende ne mwoyi. Nenku mêmè ndi ne meeji aanyi

sungasunga pa cyôci aci, ne ndi ngiitabuuja ne cidi Bible wamba ki cidi Bulelela.

³⁶ Mpindyewu, kadi ndi ngiitabuuja, kabidi, ne nku dyanyi diitabuuja, ne cidi civungulula bumwe bwa ku maalu masokoka manene a ciprofeta. Ne ndi ntekemena ne Mukalenge neatukwacisheku, diloolo edi, patudi tucyambila cisamba cyetu cidi cindile mu ditunga dijima apa.

³⁷ Byakambiibwa, musangu kampanda (Mvwa mbala, pâmvwâ mfunda kantu kampanda pa cyôci eci, nci—ncivwa mwa kuvuluka menemene ne mmu mukanda kaayi mudici cisanganyibwa to, kadi ndi—ndi mutwishiiibwe ne eci ncyâ bushuwa), ne (umwe wa ku mikanda yîmvwâ mubale pa bidi bitangila Mukalenge Moody, Dwight Moody, mu Chicago; tudi ne ekeleeziya munene utu uteeleja mu Chicago, kabidi, diloolo edi), ne, Mukalenge Moody, paanyima paa yêyê mumane kubala Loomo 7, wakaya lubilu mu mùsèèsù, nenku muntu wa nzanzanza wâkatuutakeenayê nende, kumwambilaye ne: “Utu mumanye ngâsà anyi?”

Ki muntu awu kwandamuna ne: “Ngâsà nganyi?”

Mukalenge Moody kwambaye ne: “Ngâsà wa Nzambi.”

³⁸ Pa nanku, cyakamutupisha ne disanka dîngyâdîngyâlè paakamonaye ne civwa ncinyi, mudi ngâsà mutukosolole ne mikenji, ne mushindu kaayi, mudimu udi ngâsà mwenze. Ee, mpindyewu, cintu kana cyônsò cindî mêmè njinga kwenza, mpândî... Nkaadi misangu yônsò mwambilambile bantu ne, pângââyâ dyamwamwa dya mukalu, dyamwamwa dyadya, ndi muswe kwimana kuulu bwa kwimba ne:

Ngâsà udi ukemesha! Dîyi dipole kaayi,
Dyâkasungilâ mukengeledi wa luse bu mêmè!

Ngâsà, ngâsà wa mushinga mukole!
Kumanya ngâsà mupite apu's we!

³⁹ “Bwalu ku ngâsà nkutudi basungidiibwe; kî nku bitudi twêtù mwa kwenza to.” Bitudi twêtù mwa kwenza, byônsò bitudi twenza, kabeena batubadilabi to. Ngâsà ngudi utusungila. “Ku ngâsà nkunudi basungidiibwe, ku diitabuuja.”

⁴⁰ Nsakidileku ku Mukaji ewu, Ngâsà, m'Mupeesheku kaaba mu Bible, kabidi, mudiye ubiikidiibwa ne ny'Inâbânzâ musungula, Mandemwazele Ngâsà ûndî njinga kwamba ewu. Nudi bamanye ne, Bible udi wamba patooke, ne: “Kudi Inâbânzâ musungula.” Aci, bu nwênù mwa kumona, “musungula” udi ufumina ku mwaku “Inâbânzâ musungula.” Inâbânzâ umwepele, munkaci mwa ba-inâbânzâ bakwabo bônsò, ki uvwa musungudiibwe.

⁴¹ Bu mwakadibi ne, virgo nguvwa ne cya kulela mubidi wa Nzambi, pa buloba. Uvwa mmukaji musungula. Nzambi ki wâkasungula Mariya.

⁴² Nenku, kabidi, Nzambi mmusungule Inăbânzà musungula, udi Mukaj'Ende musela. Mmusungula. Ndi ntekemena ne twêtù tudi bidimba bya cyôci aci, diloolo edi, pa buloba bujima, mu ditunga dijima's we, eyowa.

⁴³ Cifwanyikijilu eci mwaba ewu, ciikàle cileeya malanda adi pankaci paa Mukaji-musela ne Kilsto, Inăbânzà musungula awu: ne muvwabi bikengela bwa baMutwadileYe; kuvwaYe mwa kufumina; ne muvwabo mwa kuMutwadilaYe. Ekeleeziya mwaba ewu, mu cifwanyikijilu citudi naaci kumpala kwetu eku eci, mmufwanyikija ne mukaji. Bwalu, mukaji utu misangu yônsò anu cimfwanyi cya Ekeleeziya, bwalu Ekeleeziya utu wangaciibwa bu Mukaji-musela. Mukaji-musela, Yêyè m'Mukaji-musela wa Mukalenge Yesu, Mwânà wa Nzambi.

⁴⁴ Misangu yônsò, bu nwênù mwa kutangila, tangilaayi numone ngiikadilu ne ngenzeli wa maalu wa bakaji, nenku nenumone mwaba udi ekeleeziya usanganyibwa.

⁴⁵ Mpindyewu, eci, amwe a ku mêyi aa adi mwa kumweka a akemesha kudi bamwe baa kunudi, kadi adi akumbajangana ne Mukenji wûndi mupete kudi Mukalenge, wûndi nditacisha bwa kufikishila bantu. Nwamonu anyi? Tangilaayi numone bintu byônsò mu bufuki, mudibi byenzeka, bufuki, nenku nubitangilaayi. Ncya bushuwa ne bidi byenda bikumbanangane anu ne bya nyuma, byôbi paabi.

⁴⁶ Mpindyewu, bu nwênù mwa kumona ngenzeli wa maalu wa bakaji pa buloba leelu ewu, tangilaayi numone ngenzeli wa maalu wa ekeleeziya udi ulonda maalu a pa buloba leelu ewu. Tangilaayi anu cyanaana. Mu bushuwa bwa bwalu, mpindyewu, kudi kabidi ngenzeli wa maalu wa Mukaji-musela wa nyuma, Ekeleeziya. Nwamonu anyi? Tangilaayi Aci, kabidi. [Katupa kaa mukaba wa mêyi munda mutupu—Muf.] Bwalu, wa mu bufuki wa ku dîna awu, udi ulaka mukana udyamba mudiye Mukaji-musela.

⁴⁷ Mpindyewu, bu nwênù mwa kuswa ndekelaayiku ngambile cyakabidi disangisha dya pa kaaba edi. Kanwikadiku nwadyumvwa bibi mwaba awu mpindyewu to. Ndi—ndi ngaakula ne bônsò badi pambelu mu ditunga dijima, ngaakula ne, cîndi mêmè ngeela meeji ne, ng'Inăbânzà musungula. Pa nanku bu byôbi mwa kwenzeka ne kwikàle bambi kaaba aka, badi kabayi baciitaba to, ee, anji shaalaayiku anu bapuwe katanci kakese. Nwamonu anyi? Monaayi. Teelejaayi anu cyanaana.

⁴⁸ Monaayi ngiikadilu ewu. Panudi numona bakaji biikàle anu batomboka, benza anu cyônsò cidibo baswe kwenza aci, tangilaayi numone, ekeleeziya udi wenza cintu cimwecimwe aci. Monaayi.

⁴⁹ Kadi tangilaayi, Mukaji-musela wa nyuma, pakaadiYe ubanga kupeta ditabuluja, pakaadiYe ubanga kwalukila ne

kuDiteeka mu njila wa Dîyi dya Nzambi. Tangilaayi cyakabidi pa dîbà adi, nudi numona's, mushindu udi Mifundu, pa dîbà adi, nekwikalè Mukenji wâtangalakà bwa kubakula Mukaji-musela awu, kubakula Mukaji awu, Musungula awu.

⁵⁰ Bwalu, bu mùdì maalu a pa buloba, Sataana, museeswishi wâkaseeswisha mukaji-musela wa kumpala awu, bwa kwenzaye mpekaatu bibèngangana ne Nzambi, ku dibenga kwitabuuja Dîyi Dyende. . .

⁵¹ Nenku mpindyewu, leelu wa Ndaaya ewu, patudi tumona ekeleeziya wa mu mubidi, mu evanjeeliyo wenu wa mamanya a mu mitu awu, wenda uya anu kuya kule ne Dîyi, mu evanjeeliyo wa nsòmbelu mulenga awu; tudi tusangana ne bakaji baa pa buloba, mu mîsèèsù, bidimba bya mwine wa nanku awu abi, badi baditwala mu cyuyüyà cimwecimwe aci. Kanwenaku ne cinwabambila to. Bakaadi bajimije cyumvwilu cyònsò cya nsòmbelu wa kaneemu wetu wa ciibidilu ewu, bantu bakaadi bacijimije. Nwamonu anyi? Nenku mushindu awu ki ukàadi ekeleeziya mwenze. Ne nudi mwa kumumona uya buludi mutangile ku nsangilu wa bukwântèndeleeelu, cya bushuwa menemene anu mudi nî ncinyi nî ncinyi pa buloba apa, ne ukabwela buludi mu Loomo mwikàle uya ne mwende mwònsò, nwamonu's, bwalu cikaadi cyambiibwe mu ciprofeta. Kadi's ki yêyè awu. S'ki ngenzeli wende wa maalu nyêyè awu.

⁵² Kadi pashiishe tangilaayi cyakabidi Ekeleeziya wa nyuma awu, mudi kasumbu kaa bantu aku, babiikila bwa kupatuka, Basungula, ku ditabuluja ne ditabuluja dyònsò. Mu Martin Luther, byakenzeka mushindu umweumwe awu mu Dilongolola. Kwakenzeka cintu cimwecimwe aci mu cikondo cya John Wesley. Kwakenzeka cintu cimwecimwe aci pacivwa beena Mpenta babangilaku. Baakaaluja bakaji abu buludi mu njila wa Dîyi, kadi pashiishe kulalukabo. Ki yêyè udi walukila buludi ukabwela mu cimvundu cinene wawa. Kadi pashiishe cikondo cya ne bantu bakaadi badilongolole bwa kwalukila mu njila, kudi Mukenji upatuka, paabo baditeeka mu njila waWu.

⁵³ Luther uvwa musanjeela wa dituku kampanda, wa dibingishiibwa, ki Ekeleeziya kuditeekaye buludi mu njila wadi, bamwe baa kudibo. Bakwabo baakatungunuka anu benda baya. Wesley kulwaye ne dijidiibwa, Ekeleeziya kuditeekaye buludi mu njila wadi. Mpenta kulwaye ne dyalujulula dya mapà, Ekeleeziya kuditeekaye buludi mu njila wadi, Basungula baa diine dituku adi; ne pashiishe cyôci kwatuka, kwalukilabo buludi e kubwela mu cyena mangumba ne kuyabo ne bakwabo bònsò, bwònsò bwabo bènda bàlondangana.

⁵⁴ Mpindyewu, kadi nudi numona, pakaadi bantu bateeta kuditeeka mu njila wa Dîyi, kudi kulwa Mukenji mubishi wa ku Dîyi dya Nzambi, üya buludi kudi bantu. Nenku badi babakula

Mukenji awu ne baditeeka mu njila, musangu wònsò. Cidi anu mùdì Nzambi wènz. . . Bitu anu nanku.

⁵⁵ Tudi ne maafamiye. Famiye ne famiye muneemu emu mmucibidile. Misangu mikwabo maalu ônsò adi enda anu bîmpè bwenu nwênù, munda mwa bidimu. Pashiishe, dyakamwe, nufike mu cipoolo kampanda cya, mutùtù tucyamba misangu yàbûngì mu Sud emu ne: “Mvula yêyè uloka, ngwa yebeyebe,” ne maalu ônsò umba enda luboko. Nudi nupicila mu cikondo cya bufuku. Pashiishe bufuku buçya, pashiishe cikondo cya bufuku. Byònsò biyaaya mu ntungunukilu.

⁵⁶ Muprofeta awu, Pôlò, udi wamba mwaba ewu ne mukaji kêna mwa kusediibwa cyakabidi to anu panji bayende wa kumpala awu kufwa. Kêna mwa kusediibwa cyakabidi to pacidi bayende wa kumpala awu ne mwoyi; yêyè, nansha bya munyi, nansha kakese. Ûdi ne cya kushaala nkaayende pacidi bayende wa kumpala awu ne mwoyi. Kadi yêyè anu mudidinge mwenze mpekaatu wa mushindu awu, “nebamubiikile ne nngèdààmàsàndì.” Ndi ngaakula bwa cya mu mubidi mpindyawu, bwa kucifwanyikija ne cya nyuma. Mukaji ewu yêyè anu mudidinge mwenze mpekaatu wa mushindu awu, pa dîbà adi wâtwebu cimanyinu ne, “ngèdààmàsàndì,” piikalaye ne balume babidi ne mwoyi musangu umwe. Bwa bwalu abu, yêyè wamanyi kujimija, pa kwenza kwa cyôci eci, makenji ende pa bidi bitangila Nzambi ne Dyulu, pa kwenza kwa nanku awu. Ncya bushuwa ne yêyè wamanyi kuàjimija. Ûkaadi muntu mwipata mu cibucilu cya Nzambi, bilondeshile Mifundu yîndi mfuma ku dibala eyi.

⁵⁷ Mbya mwomumwe kabidi ne ekeleeziya, padiye uteeta kusambakaja twitabaayi ne dingumba ne Dîyì dya Nzambi. Yêyè kêna mwa kwikala musediibwe kudi dingumba, kadi kwikala Mukaji-musela wa Kilisto, musangu umweumwe awu to. Bikengela ìkalè mufwe kudi umwe anyi kudi mukwabo. Ki cidi mikenji yamba, mwaba ewu. Kudi mikenji mituule mipuwe mu Dîyì dya Nzambi. Kadi aci mmukenji Wende, Pôlò mwikàle wamba cintu cimwecimwe aci mwaba ewu. Yêyè kêna mwa kwikala musediibwe kudi ekeleeziya wa twitabaayi ya maalu a pa buloba, kadi kwikala Mukaji-musela wa Kilisto to, bwalu yêyè. . . umwe udi ubengangana ne mukwabo. Mpindyawu, vulukaayi.

Wêwè udi wamba ne: “Ee, twêtù tutu twitabuuja *cikampanda*, kadi katutu twitabuuja *Aci to*.”

⁵⁸ Pawikala musediibwe kudi Kilisto, Kilisto n’Dîyì dya Nzambi. Mu Yone Munsantu, nshapita 1, mbambe ne: “Ku cibangidilu kwakadi Dîyì, ne Dîyì dyakadi ne Nzambi, ne Dîyì dyakadi Nzambi. Ne dyôdi dimwedimwe adi dyakavwijiibwa mubidi ne dyàkasômbela munkaci mwetu.” Kilisto uvwa Dîyì didi ne mwoyi. Yêyè uvwa misangu yònsò anu Dîyì. Yêyè uci

anu Dìyì. Yêyè neikalè misangu yònsò anu Dìyì. Yêyè uvwa anu dimweneshiibwa dya byambiibwa bya Nzambi cyanaana, bwalu Yêyè uvwa Mwânà wa Nzambi.

⁵⁹ Ne mwânà kana yònsò ewu utu byambiibwa bya tatwëndè, ne anu mûvwà wêwè mu ngiikadilu ya tatwèbè amu, mu mubidi wa tatwèbè pacivwaye mwânà wa balume mutekete apu, wêwè uvwa munda mwende. Kadi, kavwa ne mushindu wa kubwela neebe mu bwobumwe to, bwalu kavwa mukumanye to. Kadi pashiishe, kupicila ku budimi bwa dyela mamiinu bwa maamù, wêwè wâkalediibwa pa buloba apa ne wâkalwa mu cimfwanyi cya tatwèbè, pa dîbà adi kupetaye mushindu wa kubwela neebe mu bwobumwe.

⁶⁰ Nenku ki munuvwa peenu nwênù aba, bânà baa balume baa Nzambi ne bânà baa bakaji baa Nzambi, kumpala mene kwa kwikalaku ngondo, mitooto, anyi kasunsukila. Nuvwa bânà baa balume ne baa bakaji baa Nzambi, bwalu nudi anu dimweneshiibwa dya mu mubidi dya byambiibwa bivwa munda mwa Nzambi ku cibangidilu abi. Bwalu, kudi mushindu wa Mwoyi wa Cyendelele anu umwepele, ne uvwa ngwêwè awu, kumpala. Kwêna mumanye cintu nansha cimwe pa bwalu abu to. Ki mudibi kabidi ne kuvwa mumanye to pauvwa munda mwa tatwèbè wa pa buloba awu apu, kadi wamweneshiibu ku...mu cimfwanyi cyende. Mu cimfwanyi cya Nzambi mmûdi mwenjiibwe, ne wâkamwêneshiibwa bwa butumbi ne bwobumwe bwà Nzambi.

⁶¹ Nenku, ki bwa cinyi, bu mudibi bulelela ne bivwa bikengela bwa ngiikadilu webe kwikalaye munda mwa tatwèbè, kumpala kwa dilediibwa dyebe dya mu mubidi, bivwa bikengela bwa ngiikadilu webe wa nyuma kwikalaye munda mwa Nzambi, bwalu udi dyediibwa dya patooke dya byambiibwa bya meeji Ende, kumpala kwa difuka dya dyulu ne buloba. Cya bushuwa. Kakwena mushindu wa kucicingulukaku to. Ncya bushuwa. Mpindyewu, mpindyewu tudi tumona, pa diîbà adi ne, Mwoyi awu uvwa munda mwebe, Mwoyi wa Nzambi munda mwebe, kacya ku difuka dya dyulu ne buloba.

⁶² Mpindyewu, mpindyewu, kwêna mwa kusambakaja twitabaayi wa dingumba ne Dìyì to, bwalu mbibengangane anu menemene, eci ne eci.

⁶³ Ki cyôci aci menemene cyakateeta Sataana kwenza ne mmwenenu wende wa meeji a mu mutu awu kudi Eva. Wâkamba...yêyè uvwa mwitabe ne Nzambi wakacyamba, kadi yêyè kwamba ne: “Bulelela, kanwakufwa to.” Nwamonu anyi? Ne bôbò kwitabuujabo aci.

⁶⁴ Nenku ki cidi twitabaayi mwenze ncyôci aci, diloolo edi. Dingumba ndikosolole bantu ne Dìyì dya Nzambi. Yesu paakalwaYe apu, kaakambaku ne: “Nwênù, ku bilele byenu, nudi bavwije Mèyi a Nzambi kaàciyi ne bwenzeji pa bantu”

anyi? Nenku ku twitabaayi yetu, tudi bakosolole bwobumwe bwa Nyuma Mwimpè bwa kulaaba Dìyì dya Nzambi didi diswikakaja bwa lukongo elu. Tukaadi batapulule bantu, ku dingumba, mu mushindu wa kabaciyiku kabidi mwa kupeta mpunga wa kuCimona to.

⁶⁵ Mpindyewu, Nzambi, Yèyè, lukongo ne lukongo lwònsò, Ùdi usakidila katupa kapyakapya kaa Mukanda Wende. Byònsò bidi byenda cyapamwe.

⁶⁶ Mushindu uvwa mubidi wanyi mwibakiibwe's. Mbangambile ne wakabangila ku mufuba wa mwongo, kadi cyònsò kacivwa anu mufuba wa mwongo to. Cyakuumuka aku e kuya ku mbadi, ne kuumukila ku... bisulusulu, ne ku byanza, ne maboko, ne makàsà, ne bikwabo, ki kulwaci kwikala muntu mûndi emu.

⁶⁷ Nenku ki mwakamweneshiibwa Nzambi ku cibangidilu nanku. Ki ndekeelu wa byònsò kumwenekaYe bu Yehowah, Nzambi Taatù. Pashiishe kumwenekaYe bu Nzambi Mwànà, mu Yesu Kilisto. Mpindyewu Wămwèneki bu Nzambi Nyuma Mwimpè. Nzambi umwèumwè awu, dîbà dyònsò, mamwèenshiibwa asatu a Nzambi umwèumwè awu—umwèumwè awu.

⁶⁸ Mpindyewu, tudi tusangana mu cyôci eci, ne, lukongo ne lukongo lwònsò, Nzambi mmwabanye Dìyì Dyende kubangila anu ku cibangidilu.

⁶⁹ Anu bu mwakalwa dilondangana dya nshintulukilu amu. Anu muvwa cintu cya kumpala cyakafuka Nzambi, pâmŵăpa, civwa... Twănjîbi kwamba ne Yèyè wakafuka mwoyi wa bukwamici, dyambedi. Pashiishe kufukaYe mwoyi wa bukwanyama, musangu wàkalondà. Pashiishe kufukaYe mwoyi wa bukwabantu, musangu wàkalondà. Cyenze bu dilondangana, byenda bibànda kuulu.

⁷⁰ Ki mudibi kabidi byenzeke mu Nzambi ne Ekeleeziya Wende. Dibingishiibwa ne Luther. Dijidiib-... Ùkoka bwa kupatula Mukaj'Ende musela's, mpindyewu. Ùdi munkaci mwa kufuka Mukaj'Ende musela. Dibingishiibwa ne Luther; dijidiibwa ne Wesley; ne bikwabo, nudi numona's. Yèyè, dilondangana dya dishintulukika dya Nyuma wenda ufidiibwa ku ndambu ku ndambu mutambidile, bwalu Mubidi udi munkaci mwa kwibakiibwa, wenda ulwa mutangile ku Mutu, ùdi mwikàle Kilisto, Mubidi wa Kilisto.

⁷¹ Mpindyewu, Yèyè, bu mukaji, piikalaYe musediibwe kudi Kilisto Dìyì, Yèyè kèna mwa kwikala musediibwe kudi dingumba dya ekeleeziya musangu umweumwe awu nansha, bwalu Yèyè mmuswikiibwe kùdì dyôdì adi. Neikalè mwa... kèna mwa kusòmba ne balume babidi musangu umwe to. Badi babengangana, ewu ne ewu. Umwe mmutuma kudi Nzambi, mukwabo mmwenza kudi bantu, pa nanku's badi babengangana.

Mmwambe ne: “Dîyì dya muntu yònsò ìikalè mashimi; Dyanyi Mèmè ìikalè Bulelela.” Nzambi ngudi mwambe aci.

⁷² Babengangane ewu ne ewu anu bya menemene ebi, anu muvwa mikenji ne ngàsà bibengangane, mudi Pòlò wamba kaaba aka. Umwe udi ne cya kwikala mufwe, bwa kwangata mukwabo. “Kadi yêyè anu mudidinge mubasambakaje, nebamubiikile ne nngèndààmàsàndi.” Kaa! Elaayiku meeji pa bwalu abu. New York, Arizona, mu ditunga dijima, elaayiku meeji pa bwalu abu. Nzambi mmwambe ne: “Yêyè anu mudidinge musediibwe kudi babidi musangu umwe, nebamubiikile ne nngèndààmàsàndi.” Ngèndààmàsàndi kaayi wâbwela mu Dyulu? Nzambi mmufwanyineku kusela ngèndààmàsàndi anyi? Ncya bushuwa ne to. Yêyè mmutulombe bwa katùcyènji to. “Nebamubiikile ne nngèndààmàsàndi.”

⁷³ Pa dîbà adi, bende bânà, piikalaye ngèndààmàsàndi, bende bânà's mbaa mu masandi. Baa mu masandi! Baa mu masandi pa bidi bitangila cinyi? Kî mpa bidi bitangila ekeleeziya to, kadi mpa bidi bitangila Dîyì. Yêyè mmulela mu masandi. Cimfwanyi kaayi cya Bwakabuulwibwa 3 ewu kaaba aka, cya cikondo cya ekeleeziya wa Laodikiya wa dituku dya ndekeelu's we! Kasumbu kaayi kalela mu masandi's we! Disopakaja kaayi dya cyena mangumba's we! Baa civumvu, benza maalu a lukutukutu ne badibiikila mudibo beena Kilisto, kadi bavila Dîyì dya Nzambi: “Biikàle ne cimwenekelu cya difwana dya Nzambi, kadi bavila bukole bwadi,” mwakamba muprofeta ne ki mwikalabo's.

⁷⁴ Dibaka ncilele cidi citambe kwikala cya kale pa buloba. Dibaka dyakenjiibwa dyambedi, ne dyakavwijiibwa cilele, mu budimi bwa Edena.

⁷⁵ Mukaji mmwomekela ngiikadilu kampanda yidiye kayi ne cya kukooyishaku to. Mukaji utu weyemenyiibwa mpa cyôci aci. Kakwena cifukiibwa pa buloba apa cidi bu muntu mukaji to. Kakutu mbwa mukaji, kakutu mukaji nî ngwa cinyi nî ncinyi, udi mwomekela ngiikadilu yidi myomekela muntu mukaji to.

⁷⁶ Muntu mukaji kavwa nansha ku—ku ntwadijilu wa bufuki to, bwalu Nzambi uvwa mumanye ne yêyè neadishinde. Bintu bikaji bikwabo byònsò kabivwaku bifwanyine kwenda masandi to. Anu yêyè ki umwepele udi mwa kwenda masandi. Bu ne yêyè uwaku mwenjiibwe mùdì wa ku cibangidilu awu, nunku aci's civw'a kwikala cya cipenda lungenyi lunene lwa Nzambi. Nwamonu anyi? Yêyè wakenjiibwa mwikàle cintu cyangata ku muntu mulume.

⁷⁷ Kadi bu mwakeediibwàye ku alu luseke, yêyè pende ki kupeeshiibwaye bujitu bunsantu bwa kudi Nzambi, bwa bupikudi. Ùdi ne ngiikadilu yidiye kayi ne cya kukooyishaku to.

⁷⁸ Yêyè mudidinge anu muyinyangakaje, wakooyishiibu bwa matuku ende ònsò a mwoyi. Nansha yêyè mwa kufwidiibwa luse munyi, kèna mwa kubingishiibwa to. Nèndengè bwalu abu

mu katanci kakese emu. Ndi ne Mufundu pa cyôci aci, mu ndambu wa tusunsa. Ûdi mwa kufwidiibwa luse bwa dikooyika dyende adi, kadi kâna mwa kubingishiibwa mu mwoyi wa panu ewu nansha. Neciikalê misangu yônsò anu kacya cyamulamata. Monaayi mpindyewu. Yêyê ngudi mupeeshiibwe cyôci eci. Ûdi mwa kufwidiibwa luse, kadi kâna mwa kubingishiibwa to.

⁷⁹ Mubidi wêndê awu mbamupeeshewu, bu cibucilu cinsantu cya kudi Nzambi. Mukaji wa mbwa nansha umwe, wa nyuunyi nansha umwe, wa nyama mukwabo nansha umwe, wa cifukiibwa cikwabo nansha cimwe katu mushindu awu to. To. Yêyê ki helê. Ku cyôci aci, yêyê udi. . . Kablingila kadi kenza ne ciikalê cinsantu cya menemene, yêyê ngudi ne cya kutwala mwoyi pa buloba apa. Mubidi wende yêyê ki budimi bwa dyela mamiinu a mwoyi, ki bwa cinyi mbwa kablingila aku bwakapeeshiibwaye cibucilu cinsantu eci.

⁸⁰ Mpindyewu mwaba ngwôwô ewu unudi mwa kubenga kuciitaba, bââbûngi beenu, nwênù beena teoloji. Cyôci aci ki cidi cikooyishe bukwabantu bwônsò nkòong, mmasandi a ku cibangidilu awu. Budimi bwende bwa dyela mamiinu bwakanyangakajiibwa. Yêyê kulela mapasa abidi awu: Kaayina ne Abele. Cyenzedi cimwe, bâna babidi. Kenketaayi Mifundu. Uh-huh.

⁸¹ Monaayi mpindyewu. Tudi tusangana ne mubidi wende mbudimi bwa dyela mamiinu, ne bwa bwalu abu ncibucilu cinsantu, kabiya bikengela kucinyangakaja to. Mpindyewu, ndi ngaakula mpindyewu, nya ne cyôci eci ku cifwanyikijilu, bwa kunuleeja mwaba udi Ekeleeziya mwimanyine. Bândi ngamba kî nnwênù bakaji aba to. Cyônsò ciwikala aci, aci cidi anu pankaci peebe wêwê ne Nzambi, anyi nwênù balume. Kadi ndi ngaakula bwa Ekeleeziya ne Kilisto.

⁸² Mpindyewu, mmupeeshiibwe cyôci eci, bwa kutwalaye mwoyi udi anu Nzambi Yêyê nkaayende mwa kufila. Bayende udi mwa kwikala mutwadi wa civuba, kadi Nzambi ki udi ne cya kupatula mwoyi. Nya bushuwa. Wôwô awu udi ne cya kulwa, mwoyi wônsò udi ne cya kufumina kudi Nzambi. Mwoyi kana wônsò ewu udi ne cya kufumina kudi Nzambi. Wôwô mmunyangakaja, ne cyôci aci ki cidi ciwuwija wa mpekaatu, kadi mwoyi udi ne cya kufumina kudi Nzambi. Yêyê ki Mfukyamukele wa mwoyi. Mpindyewu yêyê ki udi ne cinsant- . . . aci. . .

⁸³ Ndi muswe nteele bintu bisatu mwaba ewu bidiye kayi ne cya kulekela to. Mpindyewu, ndi ngaakula, ikalaayi nwênù bateeke ekeleeziya mu meeji pândi ngambila cyôci eci mukaji wa mu mubidi apa, mudi Pôlô wamba mwaba ewu emu, mu nshapita wa 7 wa Loomo emu.

⁸⁴ Yêyê udi ne cibucilu cinsantu cya ngiikadilu mulenga udi mumwomekela kudi Mukalenge wende, ngiikadilu mulenga

kampanda. Kakwena cintu cikwabo nansha cimwe cidi naaci to pa kuumusha muntu mukaji. Cya bushuwa. Ncimwomekela kudi Nzambi. Kêna ne cya kunyangakaja ngiikadilu mulenga awu to.

⁸⁵ Yêyê nansha mwenze cintu kampanda cya cibi, ùdi ne cya kucitondela bayende kumpala kwa kumuselaye, nenku kucilongolola. Bya mwomumwe ne ekeleeziya uvwa musediibwe kudi mikenji awu, bikengela alwe pende kumpala kwa Kilisto, kumpala kwa dibaka diibîdi adi. Bikengela acitonde. Yêyê kayi mucitonde to, kadi kusômba ne bayende bidimu dikumi kadi kushiisha kucitonda, mulume awu udi ne bukenji bwa kumwipata ne kusela mukaji wa cyanaana. Aci's m'Mufundu. Masandi a mu bajikê atu nnsômbelu wa bukooya.

⁸⁶ “Yozefu, kuciinyi nansha, angata mukajeebe Mariya kwebe, bwalu udiye mwimite munda mwende awu ngwa kudi Nyuma Mwîmpê.” Úvwa wela meeji a kumwipata mu musokoko, nwamonu's, paanyima paa yêyê mumane kwitabangana nende bwa dibaka. Pawikala mwitabangane nende bwa dibaka, bwa Nzambi, wêwê ukaadi mumusele.

⁸⁷ Monaayi mpindyewu. Yêyê udi ne cibucilu cinsantu cya ngiikadilu mulenga udiye mupeeshiibwe, cimwomekela kudi Mukalenge. Nzambi ngudi mumupe ngiikadilu mulenga awu. Anu mwakadibi mu budimi bwa Êdena amu, yêyê ki udi mwa kwamba ne “eyo” anyi ne “to.” Yêyê udi ne cibucilu cinsantu cya bukaji cimwomekela, cidiye kayi ne cya kunyangakajaku to. Bukaji bûndi ngamba kaaba aka ebu nngenzelu wende wa maalû, ngiikadilu wende wa padiye ku luseke lwa bantu balume. Kayi ulekeela muntu mulume yônso. . .

⁸⁸ Ûbandila ku bisanji bya télévîsion ebi ùmòna mudi balumyana badi bende luumu baa mu sèndemâ aba batwangana mishiku, ne buupukilangana, ne babunguluka, eku ne eku, pambidi paa bakaji aba. Mukaji udi wenza aci awu, ngwa ngiikadilu mubi. Mmufwanyine kwikala wa ngiikadilu mulenga, pa kuumusha aci. Kadi, nwamonu's, munda mwa mwoyi wende amu. . . Padibi ne, tujilu atu, tujilu twa masandi atu, tudi tusanganyibwa mu mishiku amu. Mulume udi utwa mukaji mishiku awu, mu bushuwa bwa bwalu, mu mushindu mushaadile, yêyê awu wamanyi kwenda masandi. Tujilu twa masandi tudi tusanganyibwa mu mishiku ya muntu mukaji ne mu mishiku ya muntu mulume. Mulume mmufwanyine kumutwa mishiku pa cyanza, aci kî ncifwanyine kutwangaja tujilu twabo twa masandi to. Kadi tujilu twa masandi tudi tusanganyibwa mu mishiku. Kadi monaayi anu lukutukutu lwônso elu mu—mu Hollywood emu leelu wa Ndaaya ewu, lwa dibunguluka ne dyenza dya mananga ne bakaji elu, ne bikwabo, ne bânà baa bakaji batekete biikâlê babandila biine byônso abi. Kabyenaku bikemesha to bwa mudi wetu nsômbelu mulenga mushaale wa kanyawu, ne wa bukooya, nwamonu's, bwalu's mbiteekiibwe

kumpala kwa bânà. S'neya bushuwa. Bidi ne cya kwikala mushindu awu bwa matuku a ndekeelu.

⁸⁹ Mpindyewu nwênù ikalaayi balame ekeleeziya mu meeji enu. Yèyè ngudi utwangana mishiku ne ubunguluka, ne ùkadibwejakaja mu bintu bikwabo byônsò cyanaana bidi kabiya Dîyì to, ùlekeela dyabulu, ne dilonga dya tulaasa ne dikebulula dya mu maalu a mamanya, ne bikwabo.

⁹⁰ Padibi ne, maalu a mamanya, dilonga dya tulaasa, byônsò abi, kakuyi mpatà to biikàle bibengangana ne Nzambi. Kakuyi mpatà to ndongolwelu yônsò nkòòng wa dishidimuka utudi nende leelu ewu mmufwilakanyi ne Kilisto. Ndongolwelu wa dilongeshangana dya tulaasa mmufwilakanyi ne Kilisto. Dishidimuka ndifwilakanyi ne Kilisto. Bidi bilwishangana ne Nzambi. Wêwè udi wamba ne: “Udi ulwishangana ne dishidimuka?” Nzambi neikale ne dishidimuka kampanda, dimwe dya ku matuku adi panshi aa, mwikala lufu kaluyiku luswikakanemu to. Edi dishidimuka dya cyena leelu ndilwile kùdi Sataana. Nènnùjaadikilè cyôci aci, bu Mukalenge mwa kwanyisha, diloolo edi, mu Bible. Bintu byônsò ebi mbya Sataana. Dyetu dishidimuka dipyadipya adi dyôdi kadyakwikala naabi nansha cimwe to.

Yèyè udi ne bukaji bunsantu.

⁹¹ Kabyenaku bikemesha to padi balume benza maalu ku luseke lwa bakaji mushindu udibo benza awu, mbwalu bakaji badi benza maalu ku luseke lwa balume mushindu udibo benza awu. Yèyè nyawu uleeja ngiikadilu wende padiye upatuka mwaba ewu muvwale kaputulu, ne tulàmbà tumwonye pambidi, ne bilàmbà bya bantu balume ne bikwabo, ùpàtuka mu mùsèèsù, wenda ujeekeja nyima. Bidiye wamba nansha biikàle binganyi, yèyè mmufwanyine kwikala mudilame ne mwèndè mwônsò kabàyi bamulengè kudi mûngà muntu to anu bayende, kadi, ku mèsù kwa Nzambi: “Yèyè nngèndààmàsàndi.” “Ewu yônsò udi utangila mukaji bwa kumwalakana wamanyi kwenda nende masandi munda mwa mwoyi wende.” Kadi yèyè's ngudi mudizanjike bwa kwikala cyôci aci.

Ne cyôci aci menemene's ki cidi ekeleeziya mwenze ne maalu a pa buloba.

⁹² Monaayi. Aci ncidi cimwomekela: bujima bunsantu, bukaji bunsantu, ne pashiishe buumaamù bunsantu, kutwa bayende mushinga.

⁹³ Anji tangilaayi numone leelu ewu. Mu bimenga kampanda, bimenga byàbûngì, badi mene benza maafêtes manene mu bidibo babiikila ne nkasumbu kaa bantu basunguluke abi, biine abu kabidi, bidimba bya ekeleeziya. Bateeka bifulu byabo panshi, bakwacika bônsò maala kadi kwela nsapi yabo mu cifulu amu. Mukaji yônsò uya wambula nsapi umwe mu cifulu amu, bwa mulume wikalayè mwa kusômba nende mu mpoosò. Mishindu

yônsò ya maafêtes a nanku awu! Kadi paabi, ndi mwaba ewu ne byàbûngi be bya dyamba, bu Mukalenge mwa kwanyisha, ncyèna ne dibà dya kubyondola to. Bukooya kaayi!

⁹⁴ Ne ekeleeziya pende mmubi anu bya mwomumwe, cya bushuwa, wenda masandi ne bintu byônsò, pende kayi nansha ne bwalu bwa kukabwelakanamu to. Bivwa bikengela kushaalaye ne Dîyi.

⁹⁵ Bitanda binène bîdi ànu bîmpè. Mpitaadi yidi anu bîmpè. Bintu bikwabo byônsò ebi bîdi anu mbîmpè. Ndongamu ya bulongeshanganyi bwa tulaasa, abi's bîdi anu bîmpè. Tudi ne cya kusombela panwapa, bikengela twikalè tubala, tufunda. Aci kaayi ncimwe cya ku bibucilu.

⁹⁶ Bu mudi ne, kabivwa bikengela bwa twètù kwikala bavwale bilàmbà to, ku cibangidilu kwaka. Nènyiishè pa cyôci aci, pamba lumingu elu kujika, bu Mukalenge mwa kwanyisha. Kadi bîdi bikengela tuvware bilàmbà bwalu Nzambi ngudi mutupe bilàmbà. Kadi, ku cibangidilu, katuvwa naabi dijinga nansha. Tuvwa babwikila.

⁹⁷ Mpindyewu mukaji mmubwikila bwa kayi umona mpekaatu wende to. Kî mmumanye nansha ne udi munkaci mwa kwenza mpekaatu to, nwamonu's, anu muvwaye musangu awu amu. Ku... Mpindyewu mmubwikila kudi dyabulu; musangu awu ùvwa mubwikila kudi Nzambi. Dishilangana pa cyôci aci.

⁹⁸ Mpindyewu tudi tusangana ne yêyè mmupeeshiibwe cibucilu cinsantu eci cidiye kayi ne cya kunyangakaja nansha: cya bukaji, cyenzedi, kwikala ne ngiikadilu wende, kukolessa bânà bende, kwikala wa batwa mushinga kudi bayende.

⁹⁹ Matuku atudi aa, kabàcyèna bàtwakù abi mushinga to nansha kakese. Bivwa bikengela nwênù kwikalaku basòmbè musangu kampanda mu birô byanyi bwa nwênù kumona padi balume babwelamu ne bakaji baabo, padibo bateeta kudilongolola kumpala kwa Nzambi ne kutonda balume bônso bakaadibo balaalelaale naabo abu, ne bikwabo byônsò, kacya baaselangana. "Kaa," mùdi wamba, "aci's cidi. . ." To. S'mbeena Mpenta. Uh-huh. Bakwabo kabaakulwa to. Pa nanku's cidi. . .

¹⁰⁰ Mêmè cîndi ngamba mmushindu udici mwa kuseesuka, paukaadi, mukafike ku dikabwelakana ne maalu a pa buloba, ekeleeziya, ne myodele yônsò ne bikwabo bitukaadi naabi ebi. Katucyena kabidi muvwa Mpenta wa ku cibangidilu awu to anu mudi kutooke kushiilangane ne bufuku. Tudi bakalalukile mwaba kampanda, bakabwele mu cimvundu cinene cya mîdimà mwaba kampanda, ne bajimine.

¹⁰¹ Cibucilu cinsantu kaayi's we! Bujitu kaayi budi mukaji mwambule's we! Mpindyewu monaayaaku bwa cinyi yêyè udi cimfwanyi cya Ekeleeziya, udi pende ne bujitu bwambula bumwebumwe abu. Anu mudi mukaji mwikàle ne bujitu bunsantu budiye mwambule pa bîdi bitangila buumaamù

bwende, pa bidi bitangila ngiikadilu yende milenga, kudi bayende amu, Ekeleeziya udi ne bujitu bunsantu budiye mwambule pa bidi bitangila disambila ne pa bidi bitangila Dîyì, ne pa bidi bitangila Kilisto, anu mushindu umweumwe udi mukaji naabu amu.

¹⁰² Nenku anu mudi mukaji ulaluka uya ne mulume mukwabo amu; padi ekeleeziya ulalukila pa ndongamu ya byapu eyi, ne ndongamu ya diibaka dya nzubu ne tulaasa eyi, ne bikwabo. Ncyèna naabi cilumbu to. Bidi anu bilenga. Bidi bikumbaja anu twabi twipacila. Kadi kî mbyôbi bidi . . .

¹⁰³ Yesu kaakambaku ne: “Ndaayi, nukaase tulaasa” to. Yêyè wakamba ne: “Nuyiishaayi Dîyì.”

¹⁰⁴ Ki mwaba ngwôwò awu udibo baCilengulwila. Kî nkwenza byapu, mpitaadi, ne bikwabo to. Abi bidi anu bilenga, kadi kî mbyôbi abi bidi mudimu wa Ekeleeziya to. Mudimu wabo ngwa kuyiisha Evanjeeliyo, kadi twêtù tudi bakenze byônsò pa kuumusha cyôcì aci. Nenku tukaadi baseesukeku, anu mwakenza Sataana amu, ne babisambakaje ne ndambu wa Evanjeeliyo, ne cikwabo cintu kampanda, ne cikwabo cintu kampanda, too ne mwalubi kufika cînkûtunkûtu mùyòmbelè cya munda mutupu. Dinyanguka, ne ku beetu twêtù bônsò mene, buloba bujima! Tangilaayi numone mùyaayà bàà pa buloba.

¹⁰⁵ Mwaba mbala cikandakanda cya *Reader's Digest*, mwaba ewu anu abidi adi panshi aa, mwaba udibo bafunde ne nsongaakaji yikaadi kayiciyi yiya ku ngondo, ne bantu balume, nshintulukilu wa mwoyi wa panu, pankaci paa bidimu makumi abidi ne makumi abidi ne bitaanu. Mubidi wabo ukaadi mu ngiikadilu wa mubidi wa muntu mushindame. Dinyanguka (Bwa cinyi?) bwa dikebulula dya maalu a mamanya pa byakudya ne bikwabo bidi binyanguke, byumuke ku bintu bya mu bufuki bivwa bikengela twêtù kwikala kwela mu mubidi wetu. Katucyena cîngà cintu to anu mushiki wa dinyanguka diikàle dipùnga ne lufu.

¹⁰⁶ Mpindyewu, ki cidi ekeleeziya kabidi, ncyôcì aci. Ûdi mu ngiikadilu umwèumwè awu.

¹⁰⁷ Yêyè udi cimfwanyi. Ûdi ne ngiikadilu milenga imweimwe ya mushinga mukole ayi ku Nyuma, yidiYe mupeeshiibwe, bwa kulaminyina Nyuma ne Dîyì, ne kubenga kwenda masandi ne cintu nansha cimwe cya pa buloba anyi cintu kana cyônsò eci. Shaala virgo pa bidi bitangila Dîyì, bu mudibi bikengela bwa mukaji kushaawaye ne ngiikadilu milenga kudi bayende. Ncibucilu cinsantu, bwa kutwa Dîyì dya Mukalenge Wende mushinga kumutu kwa twitabaayi yônsò, lungenyi lwônsò, dingumba dyônsò bidiku bìdi bikwàtakaja kudi bantu ebi. Ekeleeziya mmupeeshiibwe cibucilu aci.

¹⁰⁸ Bôbò bamba ne: “Ee, ekeleeziya wanyi. . .” Cidi ekeleeziya webe witabuuja nansha ciikàle cinyi. Cyôcì cibengangana ne Dîyì dya Nzambi, shaala kule naaci.

¹⁰⁹ Bible mmwambe ne: “Yesu Kilisto udi umwèumwè awu makeelela, leelu, too ne kashidi.” Maako 16 mmwambe ne: “Bimanyinu ebi nebifile badi biitabuuja.” Ekeleeziya yêyê uyiisha bishiilangane ne Aci, kwidikijiku to. Fwaku pa bidi bitangila cintu aci. Lediibwa cyakabidi, mu Diyì dya Nzambi. “Ndaayi pa buloba bujima nukayiishe Evanjeeliyo kudi cifukiibwa cyônsò.” Too ne kwônsò aku ki kuvwaaDi ne cya kuya. “Bimanyinu ebi nebifile badi biitabuuja, pa buloba bujima, ne cifukiibwa cyônsò ciikalà mwa kwitabuuja aci.” Nudi numona mutudi baseesukeKu anyi? Bushuwa. Kadi Yêyê ngudi mwambule bujitu bwaDi.

¹¹⁰ Kadi mpindyewu tangilaayi cidi bwalu, Hollywood, mmunyenge bakaji beetu bintu bya ngiikadilu mulenga abi.

¹¹¹ Ndi musòmbè mwaba ewu ntangila mukaji mukole munanga, Mwaneetu wa bakaji Schrader, bààbúngi baa ku bakaji abu mwaba ewu, ne paanyima pààpa, ne Mwaneetu wa bakaji Moore mwaba ewu, bakaji bàkaadi bakole badi bavuluka kukaadi bidimu. Bu baamamwábò, anyi mene bóbò, bafwanyine kwikala bapatuke mu mîsèèsù, mushindu udi bamwe baa ku bakaji aba bendakana leelu ewu ewu, bidimba bya ekeleeziya, nunku’s mbakwate mukaji awu bamukangile mu nzubu ne udi ne mukupa’s. “Mmupwe mwoyi bwa kuvwala jipà wende.” Ee, piikalabi ne civwa mmukupa musangu awu, s’mmukupa leelu ewu.

¹¹² Ee, tangilaayi, buloba bujima budi bujaadika ne budi ne mukupa. Tangilaayi dishipangana ne bikwabo bidi munkaci mwa kwenzeka mpindyewu pa buloba bujima ebi. Nwamonu anyi? Katombòtombò’s!

¹¹³ Cintu cyônsò mu kaabujima’s cidi cilwa bwa kuuja Bwakabuulwibwa. Tudi mwa kufikaku, lumingu elu. Paabi, bintu bidi byenza bwôwà pa kubimona abi, abi kí mbya mu bufuki emu to. Abi’s mbintu bya nyuma, bìdì bìfikishà bantu ku dyela mbwebwe ne mikuna mbila, ne bintu bikwabo byônsò, bwa kulwabi kubaponena.

¹¹⁴ Katombòtombò pa kòkò ne mu kaabujima bwaku, kùikalà baa pa buloba aba mwa kubwela, kakuyi dijanguluka to, s’mmukaadibo bamba kwikala mpindyewu emu. Mona’s, s’nudi numona mudi bidyacilu bya makàsà bya cyôcì aci byenda byenda amu. S’ki cyôcì aci. Cidi—cidi cyenda cyenda pambelu apa mu mîsèèsù, buludi too ne pa cibasa cya mu ekeleeziya, katombòtombò mu kaabujima, benza bintu bidi muntu wetu wa maci ne mèsù ewu kayiku mufwanyine kudicinkila ne udi mwa kwenza kadi kwikala mushidimuke to.

¹¹⁵ Tangilaayi numone cidi Hollywood mwenzele mukaji. Tangilaayi numone mudici. Yêyê’s ukaadi mwibe ngiikadilu milenga ya mukaji. Anu nanku anu nanku, ki mutudi bafwanyine kutungunuka twenda tuya’s. Nwamonu anyi?

¹¹⁶ Byònsò ebi yêyè ukaadi mubijimije. Mmubijimije bishi? Bwalu kuvwa cyamu cya mudimu cya budimu cidibo babiikila ne ng'eeleeziya, bu mwakadibi mu budimi bwa Edena. Muntu wa budimu, dyabulu, mmubwele mu ekeleeziya anu menemene mwakabwelaye mu budimi bwa Edena amu, ne mumubwejemu ku dimuseeswisha. Mmuseeswishiibwe. Mukaji udi udyelela meeji. . . kî nku bukole kudiye mu ntupakanyi to.

¹¹⁷ Eva kavwa ne meeji a kwenza bibi to. Kacivwa ku budiswile to. Kadi yêyè. . . Bible mmwambe, mu Timote Mwibîdi, Timote wa Kumpala 3, ne: “Wakaseeswishiibwa.” Ne *museeswishiibwe* kî mpaudi ucyenza ku budiswile to. Mpaudi useeswishiibwa kadi ucyenza.

¹¹⁸ Nenku ki cyôci aci menemene cidi cyenzeke leelu ewu. Mmuseeswishiibwe, kudi télévision, kudi bikandakanda, kudi bantu aba, aba, bintu byònsò bya bilenga bidibo benza ebi, pambelu mu mùsèèsù. Nsongaakaji ya cyena leelu, batangila mu bikandakanda ne batangila maafôtô. Batangila mu mùsèèsù. Bamonâ bilâmbâ mu makajiinyi. Mushindu udi Sataana, cyamu cinene cya mudimu cya—cya iferno aci, mutuuluke munkaci mwa bantu ne mubaseeswishe kadi kubabweja mu bintu abi's we! Kadi mukaji udi udyelela meeji ne yêyè udi anu bîmpè. Kadi pende's mmufwe kadi kayi mucimanye to. Ûdi usanganyibwa kule ne Nzambi. Nudi numona mudiye mujimije byònsò ebi, ne mushindu uvwaci ne budimu anyi?

¹¹⁹ Leelu ewu, ndi muswe bwa numone. Yesu wakaakula bwa bwalu bwaci. Kabidi, panwikala baswe kucibala, Yesu mmuteele wamba ne cintu eci necyenzeke (Nukaavwaku bamanye nanku anyi?) mu mêmâ Ende a ndekeelu, anu pabwîpi menemene ne dipoopediibwa Dyende dya pa nkuruse. Twânjàâyî anu kucibala, Luuka Munsantu, mu nshapita wa—wa 23, bwa katanci kakese cyanaana, byenze bu dileesona dya kalaasa kaa Dyalumingu. Kubangila ku mvensa wa 27, ngeela meeji ne ndi mwenze kamanyinu mwaba ewu. Yesu wenda uya mutangile ku Kalvariyo. Teelejaayaaku pândî ncibala apu. Eyo. Luuka Munsantu 23.27, ngeela meeji, ki mutudi tucipetela. Kabeji kaanyi kândi mufunde kadi kacileeja mushindu awu. Eyo. Ncyôci eci.

Nenku bavwa bamulonda kudi cisumbu cinene cya bantu, ne. . . bakaji, bàvwâ kabidi bàleejâ dibungama dikole ne benda badilakana bwa bwalu bwende.

Kadi Yesu paakakudimukaye kudibo wakamba ne: Nwênû bânâ baa bakaji baa Yelusalema, kanudidi bwa bwalu bwanyi mêmè nansha, kadi dilaayi bwa bwalu wenu nwênû biine, ne bwa bwalu bwa bânâ beenu balela.

Bwalu, monaayi, dituku—matuku alwalwa, . . . ikala bôbô abu mwa kwamba ne: Disanka ndya bakaji

*nkumba, ne difu ditù kacya kadiyi dilele, ne mabeele àtù
kacya kaayi manji kwamusha.*

120 Elaayi meeji, leelu ewu, bwende yèyè mbundu bwa kwikala ne mwânà. Nwamonu anyi?

*Pa dîbà adi nebabange kwambila mikuna ne:
Tùpònènaayikù; ne tùsokòkaayik-...ne tukuna ne:
Tùbwikilaayikù.*

*Bwalu piikalabo benzela mucu mubishi maaluu aa, bôbô
ncinyi cenzelabo udi mûme?*

121 Wakula bwa dituku diikalà bakaji kabaciya mwa kuswa kabidi bânà to. Mbaswe kabwa anyi kampuusu, anyi cintu kampanda cya mushindu awu, kadi kî mmuswe kabidi bânà to. Bwa cinyi? Ûdi “Maamù Mukulakaji wa Mabeele-Nshesheete” bu yèyè mwa kulela mwânà. Nwamonu anyi? Kî mmuswe to. Awu ki—awu ki mēyì a kadyuwu a Hollywood. Kî mmuswe bwa mukajende kwikalaye “Maamù Mukulakakaji wa Mabeele-Nshesheete” to. Pa nanku yèyè, mulume anyi mukaji neadikoshe tumwe tutupa twa mubidi wende awu, ewu anyi ewu, aci necimulame kayi ulela bânà to. Kî mbasweku bânà to.

122 Yesu wakacyamba. Kadi cyakambaYe ncinyi? “Pa dîbà adi nebabange kwela mbila bambila mbwebwe ne mikuna ne “Tùpònènaayikù.”

123 Yèyè neangata byà kudipangisha naabi lululu, bwa wamona mwa kwikalaye uya mu maafètes. Kêna mwa kwitaba bwa kwikalaye utacishiibwa ne mwânà nyawu ukeba kwamwa dibeele to. “Aci necimukonyangaje mubidi. Piimitaye difu, neciikalè, cidi cimukonyangaja mubidi. Kaakwikala ne mmwenekelu uwayne nende pa ciibidilu to.” Ne bayende pende, cimbùluntùntù cya cìmùlekela ùshaala nanku. Kaakumulelelaku mwânà to.

124 Yesu wakacyamba. Nenku Yèyè wakamba, ne—ne, pavwabo benza ciine eci apu, pa dîbà adi nebabange kwela mbila bambila mbwebwe bwa kubaponenayi. N’Dilwa dya Mukalenge adi.

125 Badi batuula mintuta ne mintuta ya mfranga bwa tumpuusu, tubwa, twa dyengeleka. S’ncya bushuwa. Ûdi ne cya kwikala wengelekaku cintu kampanda, bwalu nngiikadilu udi Nzambi mumupeeshe.

126 Ntu mmona cintu. Ntu ntwà buluwà bwa nyama minene. Nyama wa ours mukole mu muvù wa cidimu wa mabeji apoopoka amu, pakaadiye mumane kusangila ne ours mulume, ùkaadi pa dîbà adi ne twânà tudiye mulele. Twânà atu tukaadi bunene bukumbane, pàmwāpa twikàle ne bujitu bwa kilô makumi anaayi ne itaanu anyi mipite apu. Yèyè neàtwipàtè bwa kuya kadilaadilatu paa nkaayaatu mu muvù wa mashika, bwalu neikalè ne cya kulela tukwabo twânà. Ntulediibwe mu

ngondo mwibîdi. Nyama wa ours awu kêna ne cidiye mumanye pa bwalu abu to.

¹²⁷ Twôtô atu tùdi tûlediibwa mu tufuku tukese. Mushindu mwine udi Nzambi utufikisha ku didikangwila twine tufuku tukese etu, nkaayaatu, tukese... nkenze bu kafuku kakese kaa kaabudimbwa. Tùdi tûdipetela njila wa kuyiila. Mamwātu udi mu tulu tukole. Kayi mudyeku kantu nansha kamwe to kacya ku ngondo wa dikumi, kadi nku ngondo mwibîdi kutukaadi eku. Tùdi tûlwa kudiye aku ne tûmwamwa too ne munkaci mwa ngondo mwitânù.

¹²⁸ Nenku padiye umona twânà twende atu, tumane kufika twânà twa bunene bukumbane, pàmwāpa twa bujitu bwa kilô itaanu, anyi mwandamutekete ku kânà ne kânà. Ntumwamwe yêyê. Mushindu udiye upeta miine mabeele awu, awu's mmeeji a Nzambi. Udi ne mwoyi, yêyê mwine, ne upatula mabeele awu bwa twânà atu.

¹²⁹ Kadi pashiishe piikala disangila dyende ne mulume adi kadiyi dimwimicisha, ne kayi mupete twânà to, neaye wenda ukebangana ne twa cidimu... twânà twa cidimu cishaale atu, ne kutwengeleka mu bule bwônsò bwa muvù mujima wa luuya awu, bwalu ndisakiibwa dimupa kudi Nzambi. Bikengela engelekeku anu cintu kampanda.

¹³⁰ Nenku mukaji yêyê kayi mupetele bayende mwânà to, neangate kabwa anyi kampuusu, anyi cintu kampanda. Bikengela engelekeku anu cintu kampanda. Nngiikadilu wende pende's. Kadi bwa kulelela bayende mwânà, ne kumukolesha bwa mudimu wa Nzambi, aci kaayi cyônsò mu kaabujima kacyenaku cya mu wende njila to. Bivwa bikengela anu kucyenzaye... Kaa, yêyê's mmufwanyine—kaa, yêyê's mmufwanyine kupwekeshiibwa milongo, bu yêyê mwa kucyenza, kudi kasumbu kende kadi kanange mpekaatu kaa mushindu wa bakaji baa cidimu eci cya 1965 aku.

¹³¹ Cimfwanyi cilelela cya ekeleeziya wa cyena leelu leelu wa Ndaaya ewu! Ekeleeziya wa cyena leelu pende katu muswe nanhsa umwe wa ku bàdì mwaba ewu aba, bânà bakese baa Byenzedi 2.38 bàdì beela mikunda, beela mbila, baakula mu myakulu aba pabwipì nende to. Eyowa. Eyowa. Nwamonu anyi? Eyowa. Katu muswe badi beela mbila ya disanka, badila myadi, beela mikunda ne: "Amen! Aleluuyah!" abu to. Mona's, mwânà wa mushindu awu's ngwa mufwanyine kumwipacisha dyakamwe mu dingumba dyende. Bu ne bavwaku ne wa mushindu awu mu umwe wa ku ekeleeziya ayi, mona's, nunku's mbafwanyine kumwipata ne lukasa lwônsò.

"Cyûdi ulekeela bintu bya nunku byenzeka ncinyi?"

¹³² Pa nanku, nudi numona's, mbamwimicishe ne cintu kampanda, bwalu yêyê's nyawu ulela bidimba dibà dyônsò. Kadi katu muswe nansha umwe wa ku bàdì beela mikunda, batuuta

mikobolo, benza làbàlàbà, baa mu Byenzedi 2.38, bifukiibwa bya dikenga mudiye yêyê udyambidila ne ki mudibo amu aba to. S'ncifwanyine bulelela kumufwisha bundu. Ncifwanyine kumubumbula yêyê ne ekeleeziya wende wa kasumbu kaa bantu balonge tulaasa, kaa nsômbelu wa bukalinga, kaa maalu a mamanya ukaadiye mwenamu kaaba aka awu. Mbafwanyine kumwipata, ku nsangilu wâlonda. Kêna mwa kucyanyishaku to. Pa nanku kî mmuswe kwimicishiibwa ne Dîyî to, bwalu aci ki mushindu umwepele ûdi Dîyî difwanyine kulêla.

¹³³ Mulela ku Nyuma wa Nzambi, ûdi ne Nyuma wa Nzambi munda mwende. Kakuyi bya dikashaala mwena ekeleeziya wa maalu a mu mutu ne byà dyendela mu twitabaayi, bya nsuki mibebula, byà didilaaba dya bilaabu kwîsù to; kamwena cintu cya mushindu awu mu Cyôci cyônsò aci to. Kwêna usangana aci mu Dîyî dya Nzambi to. Udi usanganamu mwânà wa cyena kale, mujidiibwe, mûle tente ne Nyuma Mwîmpè, mulediibwe kudi Nyuma wa Nzambi, wela mikunda, utuuta mikobolo, wela mbila, utumbisha Nzambi.

¹³⁴ Aci cyônsò nkòòng bwende yêyê kî ncyà wolola cyanza upeta to. Kî mmusweku Aci to. Kaa, to, mukalenge! Bwâlâ's, cya bushuwa. Cidiye wenza pa dîbà adi ncinyi? Pa nanku yêyê udi ulela kasumbu kaa ba-Izabela, bavwadi baa mipanu, baa kwîsù kulaaba bilaabu, bavwadi baa tuputululu, "tumpuusu" tulêla mu masandi, mudibo batubiikila's, ngeela meeji ne mmwômò. Nwamonu anyi? Ngeela meeji ne badi bababiikila ne ntumpuusu. Nwamonu anyi? "Monaayi kaka kampuusu kàyaayà kwaka kaka," mutubo bamba, anyi cintu bu nanku awu, nudi bamanye's.

¹³⁵ Mmulediibwe, anyi musediibwe, mwikàle upetangana ne bayende wa kumpala awu, Adama wa kumpala awu, ku mukaji ngèndààmàsàndi awu, Eva, mukaji wa kumpala wa Adama awu. Wêwè udi wamba ne: "Ngèndààmàsàndi?" Kadi's ncyà bushuwa ne ki civwaye. Kadi, kaa, yêyê udi ulaka mukana wamba mukaadi ewu Adama, Adama wa kumpala ewu, mumane kufwa. "Kaa, s'ncyà bushuwa, yêyê's ufwiile kale kwine kwônsò aku. Mêmè's ndi mulediibwe cyakabidi, cyakabidi," mudiye mwambe, "ne ncyà bushuwa ne ndi musediibwe kudi Adama Mwibîdi, Kilisto, Dîyî."

¹³⁶ Mushindu kaayi? Monaayi cidiye yêyê munange. Tangilaayi wende munanga, panudi baswe kumona udiye muteekele dyende dinanga. Dîyî dyamba *Eci*, kadi yêyê wamba ne: "Wanyi ekeleeziya udi wamba *cikampanda*." Nenku udiye yêyê muteekele dinanga ki nganyi? Wende bayende nganyi? Mamuma ende sungasunga's adi ajaadika cidiye. Cya bushuwa menemene, adi aleeja cidiye. Monaayi. Yêyê mmulediibwe, dyambedi, kudi Adama, bwalu adi's ki dilediibwa dyende dya mu mubidi. Nwamonu anyi? Ne yêyê kacya katuku mwanji kushiyangana ne cyôci aci to. Mmunangî wa maalu a pa buloba. Ûlaka

mukana wamba mudiye mulediibwe cyakabidi, kudi Kilisto. Kadi munanga wende, monaayi, uci di anu ng'Adama, nansha nanku, bwalu yêyê mmunange maalu a pa buloba.

¹³⁷ Ne cikwabo—cikwabo cintu, monaayi ne mbânà baa mushindu kaayi badiye ulela. Aci's cidi cyamba cidi tatwâbò, bwa ne ng'Adama wa kumpala anyi ng'Adama Mwibîdi. Ekeleeziya yêyê mulele mwânà wa kudi Adama Mwibîdi, ûdi wenza maalu bilondeshile ngenzelu wa maalu wa Adama Mwibîdi, mwakenzabo mu Dituku dya Mpenta. Ki bânà baa cya bushuwa baa Adama Mwibîdi mbôbò abu. Nwamonu anyi? Cya bushuwa. Ngiikadilu wabo mmufwanangane ne wa mulume awu ne wa mukaji awu. Eyowa's, mukalenge. Bânà bende baa bakaji, ne kwîsù kulaaba bilaabu, ne nsuki mibebula ayi, bavwale bilâmbà bya bantu balume, mipanu. Bible utu mwambe bwa ne yêyê "kâcyênji to." Yêyê udi ukosa nsuki yende. "Bidi bundu kudiye."

Wêwê udi wamba ne: "Bwikila mukana, pa abu bwalu."

¹³⁸ Aci's ncidi Dîyî dyamba. Cîndî mêmè mfunkuna's cidi anu bufuki. Aci's ki cidiye yêyê wenza.

¹³⁹ Bende bânà baa balume, bende bânà baa balume bàdî balediibwe kudiye, mbeeyemene bôbò dilonga dya tulaasa, malonga, cilongelu kampanda cya Bible, cya ku dîna's, cilongelu kampanda cinene cya tulaasa tutumbuke cidi ne cya kwikala cikaadi cya ntanta mule, cibatooyishilamu, cyamu cya mushindu kampanda cya ditooyishila. Bakèbikèbî baa cyena mangumba, batendeleedi bafwanangane ne Kaayina, balela mu masandi pa bidi bitangila Dîyî anu muvwa Kaayina amu; bushuwa's, balela mu masandi anu muvwa Kaayina amu, bushuwa, Bakèbikèbî baa cyena mangumba. Nudi numona cidi bwalu anyi?

¹⁴⁰ Nzambi katu mwanji kulongololaku dingumba kacya to. Yêyê utu misangu yônsò anu ubengangana naadi. Dîyî Dyende didi dibengangana naadi.

¹⁴¹ Kadi bôbò badi anu kacya baakwataku, pa nanku's nudi numona cidibo bapatula. Aci's cidi cileēja ne papa wabo ne maman wabo nganyi. Menemene. Menemene. Balela mu masandi anu muvwa Kaayina amu. Ki mushindu wa mwânà wâkapâtwilâye kudi Eva ngwôwô awu. Baakaya kule ne Dîyî, nenku numonaayi cyâkapâtulâ mukaji awu. Ki cyôci aci menemene cidi ekeleeziya mupatule, cintu cimwecimwe aci.

¹⁴² Ndi mwa kunujaadikilaci, ku Dîyî, bwa ne ki kudi dilonga dya tulaasa ne dishidimuka bifumine, bilwile ku luseke lwa Kaayina. Aci's ncya bushuwa menemene. Bwalu's bôbò badi balaka mukana bamba. . . Kadi bôbò—bôbò badi balaka mukana bamba mudibo bânà baa balume baa Nzambi, kadi's mbalela mu mushindu wa cyena mangumba, balongeshila mu bilongelu bya cyena mangumba, ne bikwabo byônsò. Aci's ncya bushuwa menemene. Badimuke, baa meeji matwe! Ekelekele! S'ki muvwa

kabidi nyoka's, tatwàbò awu. Cya bushuwa's. Biikàle anu bayiishi badimuke ne beena maalu a mamanya bu Kaayina. Nwamonu anyi? Cidi menemene anu cintu cimwecimwe aci.

Wêwè udi wamba ne: "Mwaneetu Branham, aci ncilelela anyi?"

¹⁴³ Buululaayi mu Genese 4.16 kadi nujandule. Alukilaayi mu Genese 4.16 emu, katanci kakese cyanaana, nenujandule ne byakenzeka bishi.

Nenku Kaayina kuumukaye...mu bwikadi bwa MUKALENGE, ne wàkasòmbela mu buloba bwa Noda, ku esete kwa Edena.

Nenku Kaayina wakamanyangana ne mukajende; ne yêyè wakiimita difu, ne wakalela Henoka: nenku yêyè wakiibaka cimenga kampanda, ne wakiinyika cimenga aci dînà, dya...mwanende wa balume, Henoka.

¹⁴⁴ Anu nanku anu nanku too ne ku Tuubàlà, anu nanku anu nanku, bwalu baakabanga, baakalwa bansenda baa byamu, bya mijiki, ne bikwabo. Dishidimuka dyakalwila ku luseke lwa Kaayina, cya bushuwa, diibaka dya bimenga, difulà dya byamu. Beena maalu a mamanya baakalwila ku luseke lwa Kaayina, dimiinu dya nyoka. Mpindyewu monaayaaku mvensa wa 25 awu:

Nenku Adama wakamanyangana cyakabidi ne mukajende;

¹⁴⁵ Mpindyewu, yêyè wakamanyangana nende musangu umwe ne kulelaye bânà babidi. Kenketaayi Mifundu. Wakalela Kaayina ne Abele. Cyenzedi cimwe, kadi bânà babidi. Wêwè nyawu wamba ne...

¹⁴⁶ Batu bandondele, anu abidi adi panshi aa ne, kî ncifwanyine kwikala, kwenzeka nanku to. Tudi bapete bwalu mu Hollywood. Ng'Hollywood anyi? Tudi bapete bwalu mu Tucson anu mpindyewu mene, ku tubàdi. Mukaji kampanda mmulele mwânà wa bafiike ne mwânà wa batooke, musangu umwe. Badi bamba ne kêna mwa kulelaku nanku to. Yêyè's udi kabidi mwa kupeta mamiinu abidi, a bufuke. Mbapete bwalu abu ku tubàdi patudi twakulangana apa. Ndi mumanye ne mbwa yidi mwa kucyenza. Nyama yidi mwa kucyenza. Nenku pààfiki mukaji kuntwaku, mulume wa batooke awu kwambaye ne: "Mêmè nêngàmbulè bujitu bwa wanyi mwânà sungasunga, kadi awu to."

¹⁴⁷ Ki mukaji kutodaye. Ûwa mushaale ne bayende mu dinda amu, ne muntu wa bafiike awu mu mapingaja amu. "Byôbì ne," mwakamba ngangabuka, "byôbì ne mmu ntanta wa mèbà makumi abidi ne anaayi, bidi mwa kwenzeka piikalamu dikwabo dimiinu dya bufuke." Kadi's ki yêyè awu mucyenzè.

¹⁴⁸ Nenku ki cyakenzeka menemene mwaba ewu ncyôci aci. Kaayina uvwa...Sataana, mu dinda adi, mu nyoka; ne Adama,

mu mapingaja amu. Pavwa mukaji...Nenku kulelaye bânà babidi.

Mpindyewu, *Adama wakamanyangana cyakabidi ne mukajende* (musangu mwibîdî's); *ne yêyê wakalela mwânà wa balume*,...

¹⁴⁹ Vulukaayi ne, kakwenaku mwaba nansha umwe mu Bible udibo bambe ne Kaayina uvwa mwânà wa Adama to. Mbambe ne: “Yêyê uvwa wa mubi awu,” kayi wa Adama to, “dyabulu.”

...*wakamanyangana cyakabidi ne mukajende* (musangu mwibîdî), *ne wakamanyangana...ne wakupeta mwânà wa balume, ne wakamwinyika dinà ne Sete: Bwalu, mwakambaye, Nzambi wâmpèèshi... (Awu kî nyêyê uvwa Dimiinu dilelela to.)...wâmpèèshi dimiinu dikwabo pamutu paa Adama, udi Kaayina mushipe. Pa nanku...*

Nenku kudi Sete, kudiye kabidi kwakalediibwa mwânà wa balume; ne wakamwinyika dinà ne Enosha: nenku pa dîbà adi ki paakabanga bantu kusoka dinà dya MUKALENGE.

¹⁵⁰ Kî mmunkaci mwa beena Kaayina, ndelanganyi ya lukongo alu to, kadi mu ndelanganyi ya Sete.

Pa nanku: “Kaayina ki mubi awu.” Ki paakalwa nyoka mpôpò apu.

¹⁵¹ Mpindyewu monaayi. Bible udi wamba anu patooke mwaba ewu, ne: “Bayende wa kumpala udi ne cya kwikala mufwe,” kayi anu mwipaciibwe cyanaana to. Bidi bikengela ikalè mufwe.

¹⁵² Ndi mufume ku diyiisha pa *Dibàkà Nè Dishipa Dyà Dibàkà*, ne nwênù bônso nudi bamanye bwalu abu. Pândi ngaakula mpindyewu apa, menemene, kî ng’anu ne disangisha didi kaaba aka edi to, kadi mmu ditunga dijima. Eyo. Mpindyewu nudi numona cyakenzeka mwaba awu aci, mu *Dibàkà Nè Dishipa Dyà Dibàkà*. Pavwabi...?...Bitampi Mwandamutekete paakakangukabi, byakapatula Bulelela bwena diinà pa bwalu abu.

¹⁵³ Pa nanku, bwa kwikala musediibwe kudi Adama Mwibîdî, Kilisto, Dîyî, udi ne cya kudîtapulula wêwê mwine ku lufu, kudîtapulula ne bayeebe wa kumpala wa cyena mangumba awu, bwalu kakwena nansha dimwe dya ku ôwò mangumba awu didi mwa kwangata Dîyî dyônso dya Nzambi to. Anji ndeejaayibi ne dyôdî diine adi didi penyi. “Kaa,” mûdî wamba, “dyanyi mêmè.” Mukwabo muntu’s neâmbè pende ne, ndyende yêyê. Atèèkaayaaku pamwe, kadi nusangane munudi nwênù bônso babidi bapiile, panudi anu ne nwadyênjî dingumba apu. Balaayi Bwakabuulwibwa 17. Pa nanku, wamonu’s, bidi bikengela wikalè mufwe ku cintu aci.

¹⁵⁴ Mpindyewu, kî ng'edi disangisha dya pa kaaba dîndi ngambila to. Ndi ngambila baa mu ditunga dijima. Udi ne cya kwikala mufwe ku bayeebe wa kumpala awu. Pawikala mudisange ne Kilisto kadi mucikàle musediibwe kudi dingumba kampanda, udi ngèndààmàsàndi. Udi Laodikiya.

¹⁵⁵ Twètù bu Ekeleeziya mu ditunga dijima, tudi tulonda Yesu Kilisto, Dîyì. Bwa kwikala mu Mukaji-musela, bidi bikengela wikalè musediibwe cyakabidi kudi Dîyì dya Nzambi, dîdì Kilisto. “Ku cibangidilu kwakadi Dîyì; Dîyì dyakadi ne Nzambi, ne Dîyì dyakadi Nzambi. Ne Dîyì dyakavwijiibwa mubidi ne dyàkasòmbela munkaci mwetu.”

¹⁵⁶ Paucidi anu kacya wakwata ku bilele bya mangumba bya bantu abi apu, udi ubiikidiibwa, mu Dîyì dya Nzambi ne, “ngèndààmàsàndi.” Paucidi anu mukebi wa twitabaayi ya cyena mangumba apu, mwikàle mwena ekeleeziya wa cyena mangumba udi uvila Dîyì, udi “ngèndààmàsàndi,” cidi Bible mwambe.

¹⁵⁷ Yesu wakamba ne: “Kwêna mwa kukwacila nzambi ibidi mudimu musangu umwe to. Anyi udi ukwacila Nzambi mudimu anyi mamona.” *Mamona* mbwena kwamba ne “maalu a pa buloba.” “Ewu udi munange maalu a apa buloba, anyi bintu bya pa buloba, dinanga dya Nzambi kadyena nanshà mene munda mwende to.” Dimiinu dya Nzambi (dinanga dya Nzambi) kadyena mwa kwikala munda mwende musangu umweumwe ùdì dinanga dya maalu a pa buloba mwómò awu to. Padi Dimiinu dya Nzambi dikwata mudimu munda mwebe apu, aci n'Dîyì dya Nzambi. Dinanga dya maalu a pa buloba kadyena mwa kwikalamu musangu umweumwe awu to. Mpindyewu nsuki mipi, ne tuputulu, ne kwisù kulaaba bilaabu bidi penyi mwaba awu? Mpindyewu bidi penyi mwaba awu?

¹⁵⁸ Kwêna mwa kwikala mulenga kuyi kadyuwu kudi Kilisto, Dîyì dya Nzambi, kadi kwikala ukwacila dingumba dyenza kudi bantu mudimu musangu umweumwe awu to. Aci's cidi cibengangana ne Dîyì. Pòlò ngudi mwambe kaaba aka. “Mpenyi piine apu?” Loomo 7.

¹⁵⁹ Anyi kwêna mwa kulela bânà baa balume baa Nzambi, baa Dîyì Dyende, ubalelela kasumbu kaa cyena mangumba kalela mu masandi aka to. Kwêna mwa kucyenzaku to. Mu cyamu cyebe cya ditooyishila nzoolo aci, kwêna mwa kupatwilamu mwânà wa balume wa Nzambi wa ku Dîyì to. Ûndì ngambila ewu ng'eekeleeziya. Kadi peebe's uciidi anu mutungunuke ne kulaka mukana wamba mùdì mutendeleedi wa dikema. S'ki muvwa pende Kaayina nanku, mwânà wa balume wa Eva wa mu bundumba awu, mutendeleedi webe wa dikema, mwibake byoshelu ne mulambule milambu, ne mufile byadiikumi byende ne mwenze bikwabo byònsò bidi mutendeleedi kana yònsò ewu

mufwanyine kwenza abi. Kadi yêyè's wakapangila kulama Dîyi adi. Wakapangila kupeta dibuulula.

¹⁶⁰ Paabi dibuulula ki cintu cimwepele ciine, dibuulula dya Dîyi. Ncinyi cidi... Dibuulula ncinyi? Yesu wakamba ne: "Pa lubwebwe elu Nêngiibakilêpu Ekeleeziya Wanyi, ne biibi bya iferno kabyena mwa kuMutamba bukole to." Diitabuuja ndibuulula; bwalu Diitabuuja ndikubuulwila.

¹⁶¹ "Abele, ku diitabuuja, wakalambula ku dibuulula (diitabuuja), wakalambula Nzambi mulambu mwîmpè mutambe wa Kaayina."

¹⁶² Kaayina wakadyambidila yêyè ne civwabo badye mbimuma bya pommès. Bacitu bôbô anu ne mmwenenu umwêumwê awu, kadi kacivwa ng'aci to. Civwa mmasandi, dimiinu dya nyoka. Nenku mwaba awu pààkakàngukà Bitampi Mwandamutekete, byakacyamba patooke ne byakacijaadika. Mukanda wanyi wâfumu ku dipatuka pa bwalu abu. Ngeela meeji ne tudi naayi cinunu mwaba ewu patudi twakulangana apa. Nwamonu anyi? Monaayaaku. Aci mbilondeshile Mifundu, kuumukila anu ku Genese e kwobeka ku Bwakabuulwibwa.

¹⁶³ Ku cikondo cya kunshiikidilu, mici yônsò ibidi ayi yidi yikafika ku cipidi cya dimiinu ne neyidijaadike yôyi miine. S'ki twêtù aba, leelu ewu mene, Laodikiya ne Mukaji-musela, bitooke tòò ne bilenga anu bya menemene ebi mudibi mwa kwikala mu Mifundu, ne biine abi kumpala kwenu menemene. "Kwêna mwa kukwacila Nzambi ne mamona mudimu to." Kwêna mwa kwikala mwena Kilisto mwena kwitabuuja wa Bible mwikâlè mulenga kuyi kadyuwu kadi kuswikakana mu buluba bwa cyena mangumba nansha. Kwêna anu mwa kucyenza musangu umweumwe awu to. Bikengela bwa umwe ikalè mufwe, ne mukwabo ikalè ne mwoyi.

¹⁶⁴ Anyi mene kwêna mwa kulelaku mwânà wa balume wa Dîyi dya Nzambi to. Anyi mene ekeleeziya kêna mwa kulelaku to. Bôbô kî mbaswe umwe wa ku baa nanku, bânà beedi baa mikunda, beedi baa mbila ne baakudi baa mu myakulu, ne bintu byônsò abi to. Bôbô, kwêna mwa kwenzaku abi mu ekeleeziya wa cyena mangumba to. Kabaakukwitabilaku to. Bôbô kabatu babatwala mushindu awu to. Batu baya naabo kumpala aku kadi kubalabula ku cyanza ne kwamba ne: "Wêwè mwitabuuje, wâMupecì. Paudi anu ufundisha dînà mu mukanda, ki cyônsò cidi cikengela wêwè kwenza ncyôci aci." Nwamonu anyi? M—mbânà balela mu masandi pa bidi bitangila Dîyi, cibì biikâlè batungunuke anu ne kulaka mukana bamba mudibo batendeleedi.

¹⁶⁵ Pa nanku, mwimicisha ne lungenyi ne dimanya dya Sataana, ki cikaadi ekeleeziya mulwe kushaala's! Badi batuma bantu baabo ku tulaasa, bwa kuyiilabo mwa kwamba "amen" mu mushindu mujaalame menemene. Badi babalongesha mwa

kwambabo biine byònsò ebi, ne mwa kwikalabo beena mamanya a mu mitu a menemene. Ncinyi ciine aci? S'ndiimicishiibwa dya kudi dyabulu. Sataana wakiimicisha Eva ne cinyi? Bwa kubengaye kwitabuuja Dìyì, bwa mamanya a mu mitu, mmwenenu ya mu mitu, nenku aci kunyangakajaci bufuki bwònsò nkòòng. Aci's ncidiye mwenze anu menemene mu Dìyì leelu wa Ndaaya ewu, ekeleeziya. Ùkaadi mudìmicishe yêyè mwine ne tulaasa twa Bible ne tulaasa tutumbuke, ne bintu bya mushindu awu, dibala, difunda, makumi, kabaciyi bamanye kantu pa bidi bitangila Nzambi to anu mudi Hottentot kayi mufwanyine kumanya mwanu wa beena Ejipitu wa mafuku cinunu ne bumwe to. Mbamaye twitabaayi yabo yònsò, mikanda yabo ya masambila, ne bikwabo byònsò, kadi bimbuluntuntu pa bidi bitangila Nzambi.

¹⁶⁶ Mbamanye padi Dìyì dishindikiibwa, paakaakula Nzambi kale wawa ne paakaabanyinaye lukongo ne lukongo Dìyì Dyende pavwa nkongo yenda yilwa apu. Ki Noa ulwâlwa ewu, ki kuyiishaye baa lukongo alu.

¹⁶⁷ Mpindyewu, kadi bu Môsà mulwe, ne mwambe ne: "Twibakaayi bwâtù"? Nunku's mmutuute mpelu mu bukula's. Kadi yêyè uvwa muprofeta. Ûvwa ne dibuulula dya kudi Nzambi.

¹⁶⁸ Nzambi wakacishindika ne m'Bulelela. Yêyè wakapatula bânà abu, wakapatula Izaleela, ne wakaleeja Dikunji dya Kapyà kumpala kwabo, ne wakashindika muprofeta awu; ne wakamba anu menemene civwaYe mwa kwenza, ne Wâkacyènza.

¹⁶⁹ Bòbò kwamba ne: "Nzambi kaakulu Yêyè to. Môsà aakule, bwa katwikadi twâlwa kufwa."

¹⁷⁰ Yêyè kwamba ne: "Ncyakwakula kabidi naabo mu mushindu awu to, kadi nêmbàjuudile baprofeta, ne bòbò abu ki biikala baakula."

¹⁷¹ Ki Yeshaayi udi mwimane pààpa wawa, kwambaye ne: "Nsongaakaji virgo neimite difu." Muntu bu yêyè awu mu dituku divwa...Nsongaakaji virgo neimite difu mushindu kaayi? "Bâtùlelèdì Mwânà wa balume: Mwânà walediibu, Mwânà wa balume wáfidiibu. Dîna Dyende nedibiikidiibwe ne: 'Mubedyanganyi, Mfumu wa Ditalala, Nzambi wa Bukole, Taatù wa Kashidi.' Pa nkwasu wa butumbi wa tatw'Èndè, Davidi, ki paakookeshilaYe. Kakwakwikalaku ndekeelu ku Bukalenge Bwende nansha." Necyenzeke munyi? Yêyè kavwa mumanye to. Yêyè wakamba anu civwa Nzambi mwambe aci. S'cidi cipicila didifwanyikijila dyònsò, dya mamanya a mu mitu. S'cidi cipicila dikebulula dyònsò dya mu maalu a mamanya. N'Dìyì dya Nzambi.

¹⁷² Mpindyewu tudi tulongesha balongi beetu baa ku seminere teoloji wa Bible wa mishindu yònsò ne bintu bya mushindu awu, teoloji mukwatakaja kudi bantu, mbilwe kutwala musumba wa

maekeleeziya miikàle anu Laodikiya pyòpyopyò, anu muvwa Nzambi mwambe ne nebìikalè amu. Kaa, ekelekele! Pàndi mêmè ntangila aci, s'cidi cimpeesha kaaluzakalu's. Biimicisha ne mmwenenu ya mamanya a mu mitu! Bikengela wikalè mupete dipolome dya tulaasa tubandile kumpala kwa wêwè kupeta mushindu wa kumùbwela. Bikengela wikalè ne... bikengela wimane kumpala kwa ngangabuka wa mitu kumpala kwa wêwè kuteekiibwa mu mudimu.

¹⁷³ Nudiku mwa kudifwanyikijila Peetelo, Yakobo, ne Yone biikàle baya kumpala kwa ngangabuka wa mitu anyi? Nudiku bavuluke lukama ne makumi abidi bàvwà kuulu kwaka, kabayi bamanye nansha mwa kufunda mênà abo abu anyi? Biimane kumpala kwa ngangabuka wa mitu, bwa kumonaye ne bavwa... ne byònsò byabo... bwa ne dyandamuna dya bwongo bwabo ní divwa dijaalame menemene, ne bikwabo anyi? Bòbò bavwa ne dyandamuna kampanda dya bwongo, kadi kacivwa mmwenenu kampanda wa maalu a mamanya anyi wa dikebulula dya mu maalu a mamanya nansha. Civwa nku Bukole bwa Nzambi. PavwaBu bubalenga, kabavwa bamanya cintu nansha cimwe cya dyenza to anu kukumbaja civwa Nyuma Mwîmpè mwambe bwa kwenza. Kabavwa bòbò batuma yabo ntema ku mamanya a mu mitu, ku civwa ekeleeziya wamba, ne civwa baakwidi bamba, civwa *cikampanda* cyamba, civwa *cikansanga* cyamba to. Bavwa basakiibwa kudi Nyuma; bantu baa kabayi ne bwôwà to.

¹⁷⁴ Yone wa Kumpala 2.15, Yêyè mmwambe ne: “Wêwè munange maalu a pa buloba anyi bintu bya pa buloba, dinanga dya Nzambi kadyena nansha mene munda mwebe to.” Nwamonu anyi? Pa nanku, mmunyi mùdì mwa kwikala mwimicishiibwe ne Dîyì dya Nzambi didi dipiisha maalu a pa buloba adi, dipiisha Hollywood, dipiisha myodele yende yònsò, dipiisha maafêtes ònsò ne lukutukutu lwònsò elu, ne byònsò bidibo bamba ne mbidibo naabi mu dînà dya ntendeleelu ebi? S'Didi dibipiisha. Mmunyi mudi Dîyì mwa kwimicisha muntu: mmunyi mudi mukaji wa nsuki mibebula, kwisù kulaaba bilaabu, muvwale tuputulu?

¹⁷⁵ Mmunyi mudi muyiishi, upatuka apa bwa kuya ku seminere, kadi utangila Byenzedi 2.38 ne umona ne kakutu muntu nansha umwepele mu Bible ukaadiku mubatiijiibwe mu myânzù ayi to, kadi mutungunuke anu ne kwamba mudiye mwimicishiibwe ne Dîyì dya Nzambi? S'mmashimi adiye ukwambila awu! Yêyè ukaadi mumane kusumbisha bwanaabute bwende. Ūkaadi mumane kwenda masandi bwa kulwishangana ne Cintu ciine cituye mwambambe aci. Ūkaadi mumane kwipaciibwa, bashipe nende dibaka.

Nzambi neapete Ekeleeziya mulenga kayi kadyuwu, anu menemene, Mukaji-musela.

176 Bible mmwambe ne: “Dîyi kadyena munda mwebe to.” Pa nanku mbânà baa mushindu kaayi baudi wêwè ulela abu? Baa diimicishiibwa dya cyena mangumba’s. Kî nkwenzekeku lufu bwa kukutapulula ne munanga webe wa kumpala awu to.

177 “Ba-Jones nebêlè meeji kaayi pângààbangà kudila ne kwakula mu myakulu? Nebêlè meeji kaayi pângààbàtijiibwà cyakabidi?” Macimbu kaayi’s we! Wêwè udi musediibwe kudi ba-Jones anyi? Anyi, udi musediibwe kudi ekeleeziya anyi? Anyi, udi musediibwe kudi Kilisto, Dîyi?

178 Mpindyewu, ki bwa cinyi yêyè uciidi anu ulela bânà ba mulume awu. Mbânà baa mushindu kaayi badiye naabo? Amwe a ku mênà abo adibo babatwa leelu ewu ngôwò aa: tumpuusu, nkâlà, bilengulengu, Rickys, Rickettas. Tumpuusu, nkâlà, biine abu’s ki bidimba bya ekeleeziya. Bushuwa’s. Bônso mbânà bende, bânà baa Kaayina, mbwena kwamba ne mbânà baa nyama mudimuke awu, biikàle bakalanga baa dikema.

179 Mpindyewu tapaaku disù bîmpè bwa katanci kakese, ne cyumvwilu cyebe cya nyuma aci, ku musuuka webe aku. Anji tangilabi ku luseke lwebe aku. Ndi ngaakula ne ditunga dijima mpindyewu. Anji tangilaayiku mu tusunsa tukese, nwênù badi kuntwaku mu Branham Tabernacle amu abu, nwênù badi mu ma-tabernacles a ku Côte Ouest abu, ne mu Arizona, ne myaba yônso yinudi nusanganyiibwa ayi. Anjibi kuditangila wêwè mwine mu tusunsa tukese cyanaana. Wêwè udi wamba ne: “Awu Mukenji wûdi uyiisha, Mwaneetu Branham, ngwa mafi.” Anjibi kuditangila wêwè mwine kakese tûng. Nyuma Mwîmpè ânjibi kukenketa meeji enu awu ne Dîyi, s’nenutwe ku cya Mukenji awu. Kilisto, Dîyi dilaaba adi, ânji akenketeku kondo keebe wêwè mwine kaa mwoyi aku. Abwele munda mwebe amu, umone ne Cyôci aci ncyà bushuwa anyi kî ncyà bushuwa. Nenku aci’s cidi anu cintu cimwepele anyi bibidi bîndi muteele, pààbì nkama ne nkama.

180 Bible udi utwa ku cya mukaji udi ubebula nsuki yende anyi? [Disangisha didi dyamba ne: “To.”—Muf.] Bible udi witabuujja, utwa ku cya mabatiiza asatu, mu dînà dya “Taatù, Mwânà, Nyuma Mwîmpè” anyi? [“To.”] Kakutu cintu bu nanku to. Bible udi tuvwa ku cya mukaji udi uvwala bilàmbà bya muntu mulume anyi? [“To.”] Ee, angataayaaku anu bisatu abi, padiku bikwabo nkama ne nkama. Bikenketaayi ku Bukênkè bwa Dîyi dya Nzambi.

181 Wêwè udi wamba ne: “Mêmè ndi cidimba cya ekeleeziya.” S’ki muvwa kabidi Kaayina. S’ki muvwa kabidi Eva. Bible udi udyanjila kwamba ne, mu matuku a ndekeelu, Laodikiya neikalè mushindu umweumwe awu.

182 Lekela Nyuma Mwîmpè akenkete kondo keebe kaa mwoyi aku, nenku neutwe ku cya Danyele 5.12, paakabwela mukalenge-mukaji kumpala kwa Beeleshasa, e kwambaye ne uvwa

musangane ne kuvwa muprofeta, Danyele, uvwa munkaci mwabo amu, ne yêyê uvwa kamana-mpatà. Lekela wêwê anu Nyuma Mwîmpè, Yêyê ki Muprofeta wa dituku edi, Mulekele abwele munda mwa mwoyi webe amu mpindyewu mene ne akenkete ne Dîyi dya Nzambi, nenku mpatà ya bidi bitangila Mukenji ayi neyikujike yônsò. Yêyê udi umama mpatà yônsò. Wêwê neujandule ne, cidi anu menemene pa Dîyi bwa dituku edi.

¹⁸³ Kwêna mwa kuyiisha mukenji wa Luther leelu ewu nansha. Ûdi ùbwelaMu, kadi aci mmakàsà. Uh-huh. Uh-huh. Kwêna mwa kuyiisha wa Wesley nansha. Kwêna mwa kuyiisha wa Mpenta nansha. Twêtù tudi baye kule kupita apu. Bôbò bakaadi bamane kudivwija mangumba ne bamane kufwa. Bôbò ki cikolakola.

¹⁸⁴ Cicolakola ncipatuke ne kabèji kaa mutoloku, aci ki ngiikadilu wa kumpala wa ekeleeziya. Mpindyewu, aci kî ncifwanangane ne lutete lwa kumpala lwàkayà mu buloba alu to, blé awu.

¹⁸⁵ Ciibìdì cyàkapàtuka civwa mbungungu bwa bilòngò. Aci kacyena anu cifwanangane ne lutete nansha. Ncitambe kufwanangana naalu. Cidi citamba kwenda kufwanangana ne lutete lulelela. Kadi tubeji twa mutoloku atu bushuwa kî ntufwanangane ne lutete luvwa luye mu buloba alu to. Ncitwadi cya mwoyi uvwa mu lutete. Kadi ncyenze cinyi? Ncidivwije dingumba, anu mudi bufuki bukwabo bwônsò bwikàle bukumbanangana naaci. Cikaadi cifwe.

¹⁸⁶ Pashiishe cinyi? Mwoyi mmubande buludi too ne mu mwepu. Wôwò udi ne tubulu tukese—tukese tulembelelepu, tumweka bu tutete tukese—tukese munda amu. Ncyenze anu bu lutete lwa bushuwa alu, kadi kî ndwôlò to.

¹⁸⁷ Pashiishe udi upweka ubwela mu cizubu. Nenku udi upatula cinyi? Cizubu.

¹⁸⁸ Mpindyewu, angata lutete lwa blé, padi blé ucibangilaku kupatuka apu. Ne Yesu wakamba ne: “Lutete lwa blé...” Nenku wangata blé awu umukangula. Umuumusha ku cikolakola. Umutangile. Udi wamba ne: “Tudi ne lutete lwa blé.” Wadimuka’s. Ncifwanangane anu menemene ne lutete, kadi kamwena cya lutete munda amu nansha cikese to. Neizubu.

¹⁸⁹ S’ki beena Mpenta mbôbò abu: “Menemene mu mushindu wa ne,” mudi Maataayi 24.24 mwambe, “bifwanyine kuseeswisha too ne Basungula biine mu matuku a ndekeelu, bu ne bivwa mwa kwenzeka.” Kadi umusha ku dibeji ku dibeji, kwêna ne lutete nansha lumwe to. Lutete ludi paanyima apu lwà paanyima paaci apu. Nwamonu anyi?

¹⁹⁰ Nenku pa dîbà adi Mwoyi udi upatuka mu dingumba adi, ubwela mu lutete. Pashiishe cidi cyenzeka ncinganyi? Pakaadi lutete lubanga kukola, ne kulwa lunene bwa Cyôci aci cimone mwa kubwikila cintu kampanda, dingumba didi

didikoka dyumuka ku Cyôci aci. Bwa cinyi katwena bapeteku dingumba dipatukila mu Cyôci eci? Kadyadyakwikalaku to. Ndutete. Kalwena mwa kuya kabidi kule kupita apu to. Tukaadi ku cikondo cya nshiikidilu. Pa nanku bikengela mpindyewu Lwôlù alu lwénzè cinyi? Lushaale lwadija mu Bwikadi bwa Mwânà, bwa kubobeshiibwa, aci mmwômò, bwa Dîyì kubobeshiibwadi munda mwa mwoyi webe, bwa kupatuladi ne kuleejadi nsòmbelu utudi twamba ewu. Eyowa's, mukalenge.

¹⁹¹ Pa dîbà adi kwakwikala kabidi ne mpatà to, bu wêwè mwa kulekela Nyuma Mwîmpè ukubulwilaDi, mwakamba mukalenge-mukaji pa bivwa bitangila Danyeale.

¹⁹² Wêwè udi mwa kwamba ne: “Biine byônsò ebi bidi bwalu kaayi ne disangisha dya disakidila? Byûdi wamba ki binganyi's, Mwaneetu Branham? Mona ne, nyewu tukaadi pa dîbà citeema kushaale tusunsa dikumi ne tutaanu. Kuyi ne cyûdi mwambe pa bidi bitangila disakidila.” M'Mukenji wa dikema's bwa bwendèlâ ebu, bwanyi mêmè! Eyowa's, bushuwa menemene.

¹⁹³ Baataatù beena lwendu bavwa ne kusakidila kwàbûngì bwa nsòmbelu wabo wa mushindu mupyamupya wâkapetabò. Bu mukaavwabo batapuluke ne mangumba ne twitabaayi bya kale bya ba-Anglais abi, bavwa ne mushindu wa kusediibwa kudi Dîyì dilaaba dipyadiya bwa cikondo cyabo; aci's ncyâ bushuwa, Dîyì dilaaba dipyadiya dya cikondo cyabo, bwa dituku dyabo.

¹⁹⁴ Ki mutudi peetu mwa kwikala ne kusakidila, twètù bu beena lwendu, muvwa Abraham, baditapulule ne maalû a pa buloba, ne bônso batuvwa baswikakane naabo. Abraham uvwa mwena lwendu. Nzambi mmututapulule ne ntendeleelu mifwe yônso. Ndi ngaakula mu ditunga dijima mpindyewu, twitabaayi mifwe yônso. Bwa kututuma ku cinyi? Mmututapulule, ne mutukangwile ditunga dipyadiya, Mukenji mupyamupya bwa dituku edi.

¹⁹⁵ Mpenta ukaadi mûme ne mufwe, bu muvwa Luther, Wesley, ne bakwabo bônso. Ûkaadi anu musûmbâ wa ekeleeziya mikungwija kaaba kamwe. Bantu bîmpè bacidimu, kadi, bikengela bwa bapatukemu.

¹⁹⁶ CidiYe mwenze ncinganyi? Yêyè mmukangule Bitampi Mwandamutekete bya Mukenji wa ndekeelu. Nudi numona aci anyi? Bitampi Mwandamutekete, bidi ne, maalû masokoka ônsò a ekeleeziya mwandamutekete avwa makanga ne Bitampi Mwandamutekete. Balongolodi kabaakapeta dîbà dya kucyenza mu matuku abo awu to. Bôbò kabaakalaala ntanta bule bukumbane to. Kadi dibulula dibeneshiibwe dya Bitampi Mwandamutekete edi, ndikangudiibwe bwetu twètù mu matuku a ndekeelu aa, ku ciprofeta cyâkâmba bwa kuya ku Arizona.

¹⁹⁷ Mushindu wûmwà mukonke Nzambi, dituku adi: “Cyûdi wenza naanyi muneemu mu cipeela emu ncinyi?”

198 Nutuku bamanye ne Mòsà ngwâkafûnda Dipungila Dipyadipya. . . anyi Dipungila Dikulukulu anyi? Ncya bushuwa ne yêyè ngwâkadifûnda. Mikanda inaayi ya mbangilu ayi yidi yifila mikenji yivwa yitangila bintu byônsò: Genese, Ekesoode, Lewitiki, ne Dutelonoma. Yêyè ngwâkafûnda Dipungila Dikulukulu. Bwa kwenzaye ciine aci, byakakengela kushiyananaye ne bavwaye muswikakane naabo ne bananga bende, ne kuyaye mu cipeela.

199 Pôlò ngwâkafûnda Dipungila Dipyadipya. Aci ncya bushuwa. Wakafunda Loomo, ne Loomo ne mikwabo yônsò ya Cyôci aci ayi, Ebelu ne Timote, ne bikwabo. Ne bwa kwenzaye ciine aci, byakakengela kuditapululaye, ne kupweka kuya mu Arabie, mu cipeela, munda mwa bidimu bisatu, bwa kupeta dibuulula dya kudi Nzambi.

200 “Kaa,” mûdì wamba, “kadi Maataayi, Maako, Luuka, ne Yone?” Bôbò abu bavwa bafundi bavwa bafunde anu bivwa Yesu mwenze cyanaana.

201 Pôlò yêyè wakaditapulula ne wakakungwija Dîyì kaaba kamwe. Ncya bushuwa. Ee, pashiishe, tangilaayi, piikalabi ne byakakengela aci, ne kubakengelabi bwa kuya mu cipeela, kule ne bananga baabo. . .

202 Nwavulukaayi cya ne, *Tudi Dîbà Kaayi, Mukalenge?* Mbanganyi bakaadiku bacyûmvwè? Bâmbè ne: “Amen.” [Disangisha didi dyamba ne: “Amen.”—Muf.] Civwa cya bushuwa menemene anyi? [“Amen.”] Pa nanku tudi ne dibuulula mu matuku a ndekeelu aa, bwa Mukenji wa Mukalenge Nzambi bwa kukungwija Mukaj’Ende musela. Cyôci aci kacituku cilayiibwe bwa cikondo cikwabo nansha cimwe to. Neilaayiibwe mu eci cikondo: Maalaki 4, Luuka 17.30, Yone Munsantu 14.12, Yowela 2.38. Milayi ayi yidi menemene anu mwakadimanyisha Yone Mubatiiji mu Mifundu.

203 Yesu wakaDimanyisha Yêyè mwine. Cyakambabo ncinyi? “Tukatukilaayi apa ne muntu wa mushindu awu awu!” “Yone’s mmuntu wa mu cisuku.” Ekeleeziya kavwa mukumbane bwa kucyakidila to. Ki citebelu ncyôci aci. Nansha ekeleeziya pende kaakucyakidilaku leelu ewu nansha.

204 Kadi, kudi Basungula, kudi Basungula nkudi Nzambi utuma dibiikila. Bôbò mbadimanye: ubiikila Mukaji-musela mulenga ukayi kadyuwu, Dîyì, Ekeleeziya wa dituku dya ndekeelu, Inâbânzà musungula wa Mukalenge wetu Yesu Kilisto, Dîyì. Piikala. . . Yesu udi Dîyì. Mbanganyi badi biitabuuja aci? [Disangisha didi dyamba ne: “Amen.”—Muf.] Eyo. Nenku, Mukaji-musela utu misangu yônsò anu citupa cya Mubaki, pa nanku Mukaji-musela kaakwikala dingumba to. Nebikengele bwa kwikalaci Dîyì, dimweneshiibwe, bwa kwikala Mukaji-musela wa Kilisto. Yêyè ngwâkalaya bwa kucyenza. Wakamba mushindu uvwaYe mwenze. Kacya Yêyè kâtukù ukwata mudimu

ne . . . ujimija citembelu Cyende to. Ûwwa misangu yônsò ucyenza anu bilondeshile citembelu aci. Ûkaadi mucyênzênze, musangu wônsò, anu bilondeshile citembelu aci. N'Yêyê ewu ucyenza cyakabidi, mwikàle ubiikila Mukaj'Ende musela mulenga ukayi kadyuwu awu bwa apatuke mu dituku dya ndekeelu, Leebeke wa mpala mulenga awu udi mwindile Izaka Wende. Ncikondo cilenga kaayipu's we!

²⁰⁵ Mwaba ewu mene, ki udici cipatula patooke mikanda ibidi yikala kunudi kayiyi yumvwika panwabala mukanda wa *Bikondo Mwandamutekètè Byà Èkèleeziyà* awu. Mikanda ibidi ayi: Mukanda wa Mwoyi, udibo bambe, ewu wamba ne udi mwa kufundishamu dîná dyebe, kuyi mwa kukupudiibwamu to kashidi; mukwabo pende wamba ne udi ukupula dîná dyende pa Mukanda wa Mwoyi. Eci cidici cipatula patooke menemene, mwaba ewu mene. Nêngǎnjì kwimanaku ndambu wa tusunsa, pàmwápa, pa tuntu ndambu tudi pa kabeji mwaba ewu, bwa kulenga cyòcì eci kumpala kwa twètù kujikija.

²⁰⁶ Mwoyi ncintu cinsantu, bwa Nzambi, nenku cidici cifundiibwa mu mukanda. Nzambi ki Mfukyamu kekele wa Mwoyi. Nudi nwtatabuuja nanku anyi?

²⁰⁷ Mwoyi wetu wa mu bufuki panwapa, utudi naawu ewu, udi anu ncintu cikudimika cyanaana. Mu bushuwa bwa bwalu bivwa bikengela kwikalawu mwoyi wa cya bushuwa, kwine kwônsò aku, kadi mmukudimika mu dilediibwa dya mu bufuki edi. Mwoyi wa kumpala, anyi disangila dyebe dya kumpala, wêwê uvwa muswikakaja ku dilediibwa, kudi bufuki, cyenzedi cya mu bufuki. Muntu wa mu bufuki muswikakaja, mulume ne mukaji pamwe, baswikakaja pamwe mu disangila dya mulume ne mukaji, dyàkatwàlà mwoyi webe wa kumpala panwapa, ne aci nciswikakane ne mpekaatu ne lufu. Mmuniyî mùdìku mwa kupanga kumona dimiinu dya nyoka adi's?

²⁰⁸ Panudi numona mukaji, cintu cyangata ku cikwabo aci; kakuyi cikaji cikwabo bu yêyê to; mwenjiibwe mushindu awu, bimanya ne ùwva mwa kuseeswishiiibwa. Nzambi uvwa mumanye. Piikalabi ne Yêyê kavwa mumanye ndekeelu kacya ku cibangidilu to, nanku Yêyê kavwa Nzambi to. Yêyê mwikàle ne mikalu, Yêyê kayi, piikalabi ne . . . Yêyê kèna mwa kwikala kayi ne mikalu kadi mwikàle kayi mumanye byônsò, kayi myaba yônsò, mumanye bintu byônsò, wa Cyendelele to. Pa nanku Yêyê uvwa mumanye bintu byônsò, ne bivwa bikengela kwenzaYe mukaji awu.

²⁰⁹ Mulume awu kavwa ne mukaji to. Mukaji ne mulume bavwa cintu cimwe. Ûwva ne nyuma wa bukaji ne wa bulume munda mwende yêyê mwine.

²¹⁰ Bivwa bikengela kutapululaYe, kwangata cintu cyangata ku cikwabo, paanyima paa bufuki bwônsò nkòong bumane kwenjiibwa. Cikaji nansha cimwe cyàkafùkiibwà kudi Nzambi,

mu bufuki bwa ku cibangidilu, kacyena mwa kwenza cintu bu cyôci aci nansha. Yêyè ngwâkenjiibwa mushindu awu, bwa kucyenzaye. Yêyè uvwa mumanye ne mukaji uvwa mwa kucyenza. Byôbi ne Kavwa mumanye to, Kavwa Nzambi to.

²¹¹ Kadi, nwamonu's, bivwa bikengela bwa byambiibwa bivwa mu Nzambi abi bileejiibwe patooke. Bivwa bikengela bwa Yêyè—Yêyè kwikala Musungidi. Ne bwa kuvwija bintu byônsò bipwangane, mushindu wakabivwijaYe awu, pa dibà adi kakuvwa mushindu wa cintu nansha cimwe kujiminaci to. Kaa, kanwikadiku bânà batekete to. Ikalaayi bantu balume ne bakaji bakulumpé. Tukaadi ku ndekeelu wa njila. Monaayi.

²¹² Mpindyewu, civwa mbufuki, buswikakaja ne lufu. Bayeebe wa ntwadijilu awu, wa bwena uvwa ne bukookeshi pa wêwè awu, uvwa ngiikadilu webe ku dilediibwa dya mu mubidi. Ku bufuki, udi munange maalu a pa buloba bwalu udi buloba abu, ne citupa cya buloba. Ncya bushuwa anyi? Majinga ebe, ku bufuki, avwa a kunanga buloba bu mûdi citupa cyabu. Udi citupa cya ku bufuki. Nudi nwitabuujá aci anyi? Nenku ki cintu cyebe cya mu bufuki ncyôci aci.

²¹³ Ki bwa cinyi bidi bikengela ulediibwe cyakabidi. Bidi bikengela bwa uditapulule; bidi bikengela ufwe pa bidi bitangila bayeebe wa kumpala awu. Kwêna mwa kwikala ne mwoyi mwikàle naaci to. Kwêna anu mwa kwamba ne: “Ee, nênsшипè nende dibaka, kadi ngiikalè mumukudike kuulu eku too ne paakumbana cikondo” to. Too, mukalenge. Kî mbya mukanda wa kushipa naawu dibaka to! Yêyè udi ufwa. Bikengela bwa ngiikadilu wa pa buloba afwe. Bikengela bwa kantu ne kantu kende kafwe. Bikengela bwa usangishiibwe, cyakabidi, ne Ngiiikadilu mukwabo.

²¹⁴ Dîná dyebe dya ngiikadilu webe wa kumpala adi, ndilediibwe, ne difundiibwe mu mukanda kampanda wa mwoyi. Ne byenzedi byebe byônsò bivwa paabi bifundiibwemu. Byônsò byûdi mwenze mu mwine ngiikadilu awu mbifundiibwe mu mukanda kampanda, udibo babiikila ne mmukanda wa mwoyi.

²¹⁵ Nudi numona, mu Danye, paakafikaye kumpala kwa “Mukulumpile Matuku, Wa nsuki mitooke bu myôsà ya mukooko awu. Binunu dikumi kuvudija ku binunu dikumi baakalwa Nende, bwa kuMukwacilabo mudimu; Mukaji mu—musela. Ne pashiishe mikanda yakabuuludiibwa.” “Ne Mukanda mukwabo wakabuuludiibwa, ùvwa m’Mukanda wa Mwoyi.” Nwamonu anyi? Kukaadi bansantu kuntwaku, Ekeleeziya, Mukaji-musela. “Mukanda mukwabo wakabuuludiibwa, ùvwa m’Mukanda wa Mwoyi.”

²¹⁶ Mpindyewu, wêwè, kadi pawakatapuludiibwa ku disangila adi, ku lufu lwa mu nyuma: Dijinga dyebe dya mu bufuki ndya kwikala kukosa nsuki yebe. Dijinga dyebe dya mu bufuki ndya kwikala kuvwala tuputulu, kudilaaba bilaabu kwîsù.

Dijinga dyebe dya mu bufuki ndya kwikala ne mamanya a mu mutu, kwikala muntu wa meeji matwe, kwikala mumanye cintu kampanda kutamba mukwebe. Ki civwa Eva ukeba ncyôci aci. Ki cintu ciine civwaye ukeba ncyôci aci.

217 “Ee, amba tũng! Kaawêwê kantu cyanaana, kaamuyiishi kaa kakwate ne bya luse aka, ukiimana peebe apu bwa kungambila mêmè amba’s? Mêmè’s ndi ne dipolome dya Ph.D., LL.” Aci’s cidi anu cikuseemeja kule kwa dikema ne Nzambi, musangu wônsò wûdì anu usakidila cintu cimwepele awu. Nwamonu anyi? Nwamonu anyi? Ncya bushuwa. Aci’s ncilelela. Nwamonu anyi?

218 Cyakangatabo kudi Eva’s ncyôci aci. Diimicishiibwa dya mushindu awu adi’s ki dyakiimiciibwaye naadi. S’ki cidi ekeleeziya leelu wa Ndaaya ewu, ku tulaasa twa Bible ne beena mamanya a mu mitu. Nenku, tangilaayi, muntu yônsò mwikàle upanganangana ne mukwende ku mēyi, cibwejakaji cinene cya menemene cya bwena cidi Bible mwambe ne, “Baabulona” aci.

219 Mukaji-musela mmumanye padiYe mwimanyine. Yêyê ngwa bantu bakese baa menemene. Kakwakwikala bààbũngì bààsũngidiibwà to; anu bakese, bakese, bakese baa menemene. Wêwê udi wamba ne: “Ee, mwaba awu, s’mbambe ne, ‘binunu.’” Eyo. Kadi’s mbapatuke mu bidimu binunu bibidi, bôbô abu paabo, mu cikondo ne cikondo cyônsò muvwaYe upatukila amu. Cyônsò. . .

220 Cikondo cya Luther ne kasumbu aku; ne pashiishe kufwaku kônsò, ne kuyabo, kudyzabò dingumba; pashiishe Wesley; ki pashiishe kulwaku beena Mpenta, ne bakwabo. Ne tuumâpà twônsò twa tukesetukese twa ba-Baptistes, ba-Presbyteriens, ba-Méthodistes, ba-Nazaréens, ba-Pèlerins de la Sainteté, ne bakwabo abu atu, nwamonu’s, twakaabulukila twônsò kwôkò aku anu mùtù dibeji amu.

221 Kadi, vulukaayi ne, paakaya lutete alu mu buloba, ne paakabangalu kuboba, cyûdì usangana cidi ne, kumpala kwa lutete alu kupetalu mushindu wa kuboba, bikengela bwa kantu ne kantu mu cikolakola aci kiikàle kafwe. Aleluuyah! Nwênù kanwenaayiku mwa kumona patukaadi twêtù biimanyine anyi? Mwoyi ukaadi cyakabidi mubwele mu lutete. Ncinyi aci? Anu menemene muvwa lutete lumwelumwe lwakaya mu buloba alu, Yesu umwêumwê awu mu mmwenekelu wa Mukaji-musela, bukole bumwebumwe abu, Ekeleeziya umwêumwê awu, cintu cimwecimwe aci, Dîyì dimwedimwe adi. Dîyì dimwedimwe adi divwa dikokiibwe mu bôbô aba ne dipatukile apa, ne dikafike too ne ku mutu mwaba ewu. Ne Mwoyi wônsò udi mupicile emu awu, mmubakule bantu baawu abu. Mpindyewu cidi munkaci mwa kwangata mmwenekelu wa mutu, bwa Dyambwibwa. Nèngààkulè pa cyôci aci maalaba diloolo, anyi diloolo dyàlondà, dimwe dya ku ôwò awu, bu Mukalenge mwa kwanyisha.

222 Ee, udi mutapuluke ne disangila dyebe dya kumpala adi, ku lufu lwa mu nyuma. Mpindyewu ukaadi mulediibwe cyakabidi, anyi musediibwe cyakabidi, ku disangila dipyadiipya dya mu nyuma; kadiyi dya mwoyi webe wa mu bufuki wa bintu bya pa buloba awu to, kadi dya Mwoyi wa Cyendelele. Mutoloku wa bwena uvwa munda mwebe ku cibangidilu awu, wakupeci.

223 Mpindyewu, mukanda webe wa kale awu wayi, pamwe ne disangila dyebe dya kale adi. Mpindyewu, dîna dyebe mu webe wa kale, mu webe. . . ndisambulujiiibwe. Mpindyewu, wêwê udi wamba ne: “Udi muswe kungambila ne mukanda wanyi wa kale awu. . .” Nzambi wâwêdi mu Mbû wa Cipwamwoyi Cyende. Wêwê ukaadi mwimane mupwangane kumpala kwa Nzambi.

224 Mpindyewu, dîna dyebe didi mpindyewu mu Mukanda mupyamupya awu; kî mmukanda wa mwoyi to, kadi Mukanda wa Mwoyi wa Mwânà wa mukooko, ûdi Mwânà wa mukooko mupikule awu. Kî mmukanda wa kale wa disangila dyebe dya mu bufuki awu to, kadi webe mupyamupya awu, Mukaji-musela. Aleluuyah! Mwoyi webe mupyamupya udi mu Mukanda wa Mwoyi wa Mwânà wa mukooko, mukanda webe wa dibaka, aleluuyah, mùdi mutoloku webe mulelela wa Cyendelele, wa kacya ku cibangidilu awu, mukwacile. Mpindyewu kwêna anu mufwidiibwe luse cyanaana to, kadi udi mubingishiibwe. Butumbi’s we! “Mubingishiibwe,” ki mudi Loomo 5.1 mwambe. Eyowa. Loomo 5.1 mmwambe ne: “Nenku biikâle babingishiibwe ku diitabuuja.”

225 Kebaayi mwaku awu numone. Mwaku awu kawena wumvwija “mufwidiibwe luse” to. Mwaku awu udi wumvwija “mubingishiibwe.” Kawena uswa kwamba ne wêwê udi mufwidiibwe luse to.

226 Cileejilu, wêwê kuumvwa bamba ne mvwa mukwacike maala ne—ne ndi mwenze bintu kampanda bya bibi, ne bikwabo byônsò. Pashiishe ulwa kûndi, ungambila. Wêwê kujandula ne ncyêna mubyênzè to, kadi ulwa kûndi, wamba ne: “Mwaneetu Branham, ngaakufwidi luse.” Umfwila luse? Ncyêna mubyênzè to, byôbi biine. Nwamonu anyi?

227 Mpindyewu, piikalabi cya bushuwa ne ndi mubyênzè, apu kaayi’s ndi mupiile. Kadi udi mufwanyine kumfwila luse, bya nciyi mufwanyine kwikala mupiile to. Kadi nansha nanku ncyêna mubingishiibwe to, bwalu ndi mubyênzè cya bushuwa.

228 Kadi mwaku ewu, *mubingishiibwe*, mbyenze bu ne kacya kutu mucyênzèku to. Amen. Kacyena citangidiibwa bu ne cidiku to, nansha kakese. Mbyenzeke bishi? Mu Mukanda wa Nzambi wa Mbû wa Cipwamwoyi awu, mukanda webe wa kale ne dibaka dyebe dya kale bikaadi bimana kushipa naabi dibaka ne bimane kufwa, ne kabyena mene nanshà mu bivulukilu bya Nzambi to. Amen. Ukaàdi mubingishiibwe. “Nenku biikâle babingishiibwe.” Cîvwa cifundiibwe ku cilumbu. Uvwa

mufundiibwe ku cilumbu. Kacya kutu mucyènzèku to, byôbi biine. Disangila dya kale adi dikaadi mu Mbû wa Cipwamwoyi cya Nzambi. Kuvwa mene musediibwe kùdidi to, wêwè mwine. Yêyè, Mubaki, wakambula bundu bwebe, Yêyè mwine, bwebe wêwè, pa kaaba keebe. Yêyè wakangata kaaba keebe, bwalu wêwè uvwa mudyànjila kuMulongolwela, bwa wêwè kwikala mu Mukaj'Ende musela, kumpala kwa difuka dya dyulu ne buloba. Bible ngudi mwambe nanku. Wêwè udi Dimiinu didyanjila kulongolola.

229 Wêwè udi mufike ku dyenza ciine eci bishi? Uvwa mukabwelemu mwikàle museeswishiibwe kudi dibaka dyebe dya kumpala, kudi muledi webe ngèndaàmàsàndi awu, Eva. Kí ncilema cyebe wêwè mwine to. Ku dilediibwa dyebe dya mu bufuki, udi mufumine kudi Eva, wákenda masandi awu. Ki bwa cinyi wêwè udi mulediibwe ngèndaàmàsàndi. Wêwè udi ngènzàmpèkààtù, anu kwine kwònsò aku. Ncya bushuwa. Uvwa mukabwelemu mwikàle museeswishiibwe. Kuvwa wêwè ne... To, wêwè, kí ncilema cyebe to.

230 Kacya kutu mucyènzèku to. Bwalu, mutoloku mukese uvwa munda mwebe awu, ki uvwa ne cya kwikala wêwè, kumpala kwa difuka dya dyulu ne buloba. Nzambi wakafunda dîna dyebe mu Mukanda wa Mwoyi wa Mwànà wa mukooko.

231 Byenze bu kaamuyiiki kaanyi kakese kaa mukanku aku, nwênù bònsò nukaadi bakùmvùmvwe. Nzoolo wa cikuka... Cidime kampanda mukulumpe wakateekela ci—cikuka cya nzoolo mayi, musangu kampanda. Nanku kavwa ne bikuka búngì bukumbane... mayi búngì bukumbane a kwelela cikuka aci to. Ki pa nanku kupetaye diyi dya mukanku, ne kuciteekelaye diyi adi. Paakalediibwa mukanku awu, ùvwa nnzoolo umweka mutambe kwikala wa lukutukutu uvwa nzoolo ayi kacya kayiyiku myanji kumona to, kaamukanku kakese kiikàle kenda kayilonda's. Nanku cikuka cya nzoolo aci civwa mwa kwenza ne: "Cyokò, cyokò, cyokò, cyokò."

232 Kaamukanku kakese aku kamba ne: "Ncyêna mumanye aci cintu ne cidi ciswa kwamba bishi to, kadi ndi anu mmulonda mwine's, nansha bishi."

233 Nanku yivwa yipatukila pambelu mu lupangu lwa nzoolo amu ne yibanga kukala mu mishiki ya tûmvì twa nyama amu. Kadi ki cikuka cya nzoolo aci: "Cyokò, cyokò, cyokò. Eci ncîmpè. Eci ncîmpè. Lwâ ushaale wa kutudi twêtù. Nanku eci ki cidi..."

234 Kaamukanku kakese kaa kale aku, kakavwa mwa kudya bintu abi to. Nwamonu anyi? Ûvwa pende—ùvwa pende anu wenda ulonda cikuka cya nzoolo aci bu muvwaye pende kayi mumanye to. Kamanyi pende cya dyenza's mulume neebe. Nanku cikuka cya nzoolo aci cipatuka kwaka, ne civwa mwa kupeta *bikampanda* anyi *bikansanga*. Kadi kaamukanku kakese aku anu... bivwa bikengela anu bwa yêyè kwitaba mwa kubidya's,

kadi kayi—kayi mumanye mwine mwa kupita naabi to. Kadi uvwa mumone tuzoolo twônsò atu tubidya, kadi kuvwa cintu kampanda cishiilangane. Kavwa mubiswe to.

²³⁵ Pa nanku, dîngà dituku, maamù uvwa mumanye ne uvwa mwele mayi abidi. Pa nanku kuditwaye mu dyenda dikebangana ne dikwabo adi, wènda ùpaapala eku ne eku, wènda ùkeba, anu mudi Nyuma Mwîmpè munene wènda amu. Dîngà dituku kupaapaleelaye kumutu kwa lupangu lwa nzoolo alu, dingumba adi. Kutangilaye panshi apu, ki kumonaye kânà kende aku. Kwelaye lubila lukole. Civwa n'Diyi dya cintu kampanda dya ditwa dyalukila dyumukila munda mwende amu. [Katupa kaa mukaba wa mêyi munda mutupu—Muf.] Kaa, Aci's cidi cyumvwika cijaalame! Kaa! Mutoloku mulelela mulela mudyanjila kulongolola, mudyanjila kulongolola kudi Nzambi, udidinge anu wûmvwè Diyi dya Nzambi's we, Dyôdi's mmujiki bwende yêyè. Ûdi umanya ne Dyôdi adi m'Bulelela.

²³⁶ Yêyè's ukaadi muumvwè bintakanyi bya cyena mangumba abi bimutonde, byôbi biine: "Shaala wa kutudi twètù. Lwâku, wikâlè wenda neetu twètù. Twètù tutu twenza fête wa kasumbu kaa ditanta. Tutu ne *bikampanda*. Tutu ne..." Kacivwa anu cyumvwika cijaalame to, bwa kalumyana aku.

²³⁷ Yêyè ne: "Mwanaanyi wa balume, kwêna wa mu aku kasumbu to, wêwè mwine. Wêwè udi wanyi mêmè. Udi wanyi mêmè."

²³⁸ Yêyè ne: "Maman, aci's cidi cyumvwika cilelela. Mêmè nêmpatukè bishi's?"

²³⁹ "Tùpikà anu cyanaana. Mêmè nênkubàkùlè." Uh-huh. Ki cyônsò cidi cikengela wêwè kwenza aci.

²⁴⁰ Diyi dya Nzambi dilaaba dishindikiibwe kumpala kwa muntu kana yônsò udi mulediibwe bwa kwikala mwânà wa balume wa Nzambi ewu, mwikâlè ne mutoloku mudyanjila kulongolola munda mwende bwa dîbà edi, yêyè's neamone Mukenji wa Nzambi anu mudibi cya bushuwa ne kudi Nzambi mu Dyulu. Martin Luther wakaWumona bwa dyende dîbà. Wesley wakaWumona bwa dyende pende. Mpenta wakaWumona bwa dyende pende. Kadi bishi wêwè mpindyewu? Uh-huh. Bôbò bakaadi bakabwele mu dingumba. S'ki Diyi didi diciipiisha edi; diikâlè dikwambila cidi cikengela twètù kwikala naaci leelu ewu, anu menemene Maalaki 4 ne milayi mikwabo yônsò bwa dîbà edi eyi. Cyûdi wêwè umona ncinyi? Kûdi wêwè utangila nku cinyi? Amen. S'ki twètù bakaadiku aba. Mikanku milelela ne myena diîna, yôyi yidi yumvwa. "Mikooko Yanyi mmimanye Diyi Dyanyi. Bwa mwenyi kayakumulondaku to."

²⁴¹ Bwa cinyi? Civwa citeekiibwe munda amu ku didyanjila-kulongolola. Wêwè uvwa mudyanjila kulongolola bwa kwikala mwânà wa balume wa Nzambi. Uvwa munda mwa Nzambi kumpala kwa difuka dya dyulu ne buloba. Udi anu

mumweshiibwe cyanaana mu dituku edi bwa luumu ne butumbi Bwende. Mmunyi mûdi mwa kucyenza kuyi utwa Dîyî Dyende mushinga, ne kuyi wimana ne Dîyî dyônsò dya Nzambi? Eyowa's, mukalenge. Bidi ne, wêwê udi citupa cya Dîyî adi, ku didyanjila-kulongolola. Bwalu, tangila, Nzambi awu udi n'Dîyî. Nudi nuciitabuuja anyi? [Disangisha didi dyamba ne: "Amen."—Muf.] Ee, pa dîbà adi, piikalabi ne. . . Yêyê uvwa misangu yônsò anu Dîyî. "Ku cibangidilu kwakadi Dîyî." Ne piikalabi ne Dîyî dyakadi Nzambi, pa dîbà adi's wêwê uvwa munda mwa Nzambi. Dîyî, citupa cyàdi cyûdi wêwê ne cya kwikala aci, ciwva munda mwa Nzambi kumpala kwa difuka dya dyulu ne buloba. Yêyê ukaavwa mukumone. Yêyê ukaavwa mukumanye. Yêyê kudyanjila kukulongolola ku cyôci aci.

²⁴² Ndi nnwambila ne, anu mwakajingulula mukanku awu dîyî adi amu, mushindu awu ngudi kabidi mwena Kilisto mu—mulelela mulediibwe cyakabidi, ujingulula Dîyî dya Nzambi diikàle dyàkwila mu Dîyî, padiye uDimona dilaaba ne dishindika. Tangilaayi. Yêyê wakabanduluka e kutangilaye *Mwamwa*. Kaakamona cikuka cya nzoole cya kale eci ciwvâ cyenza cyokò-cyokò ku luseke lwende *eku* ne: "Ikala wa kutudi uye *eku*," ne, "nda ku *cikampanda*," ne, "nda ku *cikansanga* ne ku *cikankenga*" to. Yêyê wakamona nyuunyi mufwanangane ne—ne uvwaye yêyê muswe kwikala awu, wenda ubuuka mu mpeepele, wela mbila ya mikole, mudilekelele, mwamwa muulu menemene, kumutu kwa biminini byônsò ne bintu byônsò bya pa buloba. Aleluuyah! Yêyê uvwa muswe kwikala aci bwalu ncivwâ mu yêyê bwa kwikala cyôci aci.

²⁴³ Nenu muntu udi mulediibwe kudi Nzambi, mwânà wa balume wa Nzambi, bikengela ikalè ne ngiikadilu wa Nzambi. Bikengela ikalè mufwanangane ne Nzambi. Yêyê udi utwa Nzambi mushinga. Udi citupa cya Dîyî dya Nzambi. Ne mu matuku a ndekeelu aa, mûkaadi Mukaji-musela wenda wangata mmwenekelu emu, anu menemene bukole bumwebumwe muvwaYe ku cibangidilu amu, mbulwe bwenda bupicila mu malongolodi aa, ne bikwabo, ne bupatuke bwa Mukaji-musela. Kêna mwa kwikala cîngà cintu pa kuumusha aci to.

²⁴⁴ Bivwa bikengela kwikalabo baCimone, beena Yuda abu mu matuku abo awu, paakaCimonabo cimweshiibwe kumpala kwabo aku, bu mwakamba muprofeta ne uvwa n'Yêyê. Yêyê kwamba ne: "Kenketaayi Mifundu; mu Yôyî amu mmunudi nwela meeji ne nudi ne Mwoyi wa Cyendelele. Yôyî ayi's nyidi yimfidila Mêmè bujaadiki. Piikalabi ne Ncyêna ngenza byenzedi bya Taatù Wanyi to, kanuNgiitabuuji to. Kadi nansha munudi kanuyi mwa kungiitabuuja Mêmè to, enzaayi. . . itabuujaayi byenzedi bindi Mêmè mwenze abi."

²⁴⁵ Baakamba ne: "Baataatù beetu baakadya manà mu cipeela munda mwa bidimu makumi anaayi. Twêtù tudi bamanye mwaba utudi biimanyine."

246 Yèyè ne: “Kadi’s mbafwe muntu ne muntu,” mbwena kwamba ne, batapuluke Cyendelele. Muntu ne muntu wakafwa. Kwakadi anu basatu, babidi mbaakatuka pa mùliyô umwe, mìliyô ibidi. Mbwena kwamba ne umwe pa mùliyô umwe.

247 Mona’s, dibwela dya bilume, bilume bya kudi mulume ne kudi mukaji, kutu pa ciibidilu diyi anu dimwepele didi ne bufuke. Kudi diyi dimwepele, civuba cimwepele cidi ne bufuke, piikalabi ne nukaadiku bamone disanga dya ngombe milume ne mikaji. Monaayi. Mayi mù—mùliyô mujima ngôwò *aa*; bivuba mùliyô mujima mbyôbi *ebi*; ne pa—padibi bipatudiibwa apu, bwa kulwabi pamwe ne kubwela munda mwa mukaji, bilwila mu kalangi kaa disangishila bivuba ne diyi amu ne kubwelabi munda mwa mukaji, bidi bisangila. Ku lumwe luseke kudi mayi. Mayi mùliyô mujima; bivuba mùliyô mujima. Mwômò amu mudi diyi anu dimwepele didi ne bufuke. Mwômò amu mudi civuba anu cimwepele cidi ne bufuke. Byônsò’s bidi ne mwoyi. Udi mwa kutangila kumona mudi twânà tukese twa ngombe atu tudisuba muntwamu, kaadimata kakesee kaa wêwè mufwanyine kulamika ku kaci kaa alameeta.

248 Ne Demos ne bakwabo badi munkaci mwa kuteeleja diloolo edi, ne yèyè mmuvuluke mutwakaya naabo kuntwaku. Yèyè ngwâkaya naanyi kwôkò kuntwaku, kundeejaye muvwabi byenzeka. Tulangi twa disangishila bivuba ne diyi, kadi kumwèla anu ndambu mukumbane wa wêwè mufwanyine kulamika ku lusongo lwa kaci kaa alameeta. Tùvwa binunu ne binunu bya twânà twa ngombe tulume ne tukaji muntwamu, kadi anu kamwe kaa ku twôtò atu nkadi mwa kwikala ne mwoyi. Anu kamwe kaa ku twôtò! Kadi ki musumbà mujima watu bunenewu ngwôwò ewu, *apa*. Nenku neumone, cimwepele necidikoke cipatuka munkaci mwa musumbà ùdì *apa* ewu, ciya buludi, civuba ciikàle cilwa *apa*; ne diyi nedipatuke munkaci mwa mayi makwabo aa *apa*, ne nebisangile. Ne bikwabo byônsò abi nebifwe. Kadi, paabi’s bidi ne mwoyi, kadi bifwafwa.

249 Bwalu, kudi Cintu kampanda, Kampanda ngudi mwenze *eci* ciikàle ne bufuke, ne mulongolole *eci* nunku, cyôci paaci. Ndidyanjila-kulongolola, mwaneetu wanyi. Bushuwa’s. Nzambi ngudi ne cya kupangadika ne neciikalè mwânà wa balume anyi mwânà wa bakaji, wa nsuki mikunze, wa nsuki mifiike, anyi nî ngwa bishi. Mbipangadikiibwe kudi Nzambi. Mbwalu busokoka bupite ne bwa dilediibwa dya kudi virgo, bwanyi mêmè. Kadi, monaayi ne, bikwabo byônsò abi bifwafwa.

250 Kwakapatuka bantu mìliyô ibidi, kwimbabo misambu, kwelabo mbila, kwenzabo bintu byônsò. Baakaakula mu... kabaakaakulaku mu myakulu to. Kadi baakela mbila, ne—ne baakapa Nzambi butumbi, ne baakaja maja bàbànda bapweka ku mwelelu wa mbû aku, ne baakenza byônsò bikaavwaku bakwabo bônsò benzenze ebi, kadi kwakabwela anu babidi mu buloba bulaya. Kaaleba wakabwela, Kaaleba ne Yoshuwa, anu

babidi abu. Ki umwe pa mùliyô mujima nyêyè awu. Ng'umwe pa mùliyô mujima mu dilediibwa dya mu bufuki emu. Muntu ne muntu wa kudibo uvwa ne dibenesha dya mwomumwe.

Kaa, nwênù beena Mpenta, ndi ntekemena ne kanwakutabuluka dîbà dimane kupita to.

251 Umwe pa mùliyô mujima. Tangilaayi. Badi bambe ne kudi bantu mùliyô nkama itaanu ya beena Kilisto baa ku dînà pa buloba leelu wa Ndaaya ewu. Bu Yesu mwa kulwa, nkufwanyine kwikala anu nkama itaanu cyanaana yidi mifwanyine kuya Nende, pa dîbà adi, bu makumi mafwanyikija awu mwa kwikala a cya bushuwa. Mona's, s'kudi bapite apu badi bajimina ku dituku dyônsò dicyacyà dîiliilà edi, pa buloba bujima apa. Kabeena bamanya kantu nansha kamwe pa bwalu abu to.

252 “‘Ndi ngumvwa's,’ mwakamba bafundi, ‘nudi bamanye ne...’ Bwa cinyi bafundi badi bamba ne—ne: ‘Eliya udi ne cya kwanji kulwa dyambedi?’” mwakambilabo Yesu.

253 Yêyè kwamba ne: “Eliya ukaadi mulwe kadi nwênù kanuyi bacimanye to.” Nwamonu anyi? Wakenza menemene anu cyakamba Mifundu ne ki civwa ne cya kuMwenzekela. Nwamonu anyi? “Ki mwikala kabidi Mwânà wa muntu ne cya kukenga. Ku byanza bya...” KabaakaMujingulula to. Kadi, paabo's bavwa bônsò anu mu ekeleeziya. Bônsò bavwa anu balaka mukana bamba muvwabo ne mwoyi.

254 Kadi mwena Kilisto mulelela, mulediibwe cyakabidi, musadidi mulelela wa Nzambi, adidinge anu ùmwè Dîyì dya Nzambi adi, yêyè's neapatuke buludi mu dingumba ne dingumba dyônsò, aye ku buloba bwa bufuke abu, ku Dîyì, budimi bwa dyela mamiinu abu. Yêyè's neàcyênzè anu kucyenza. Mêmè nyèna mumanye ne udi ucyenza mushindu kaayi to. Nzambi ngudi mutume dîyì bwa kwenzekaci.

255 Wêwè uvwa museeswishibwe anu kwine kwônsò aku, kudi dibaka dyebe dya kumpala adi. Mpindyewu wâmanyì cidi cilelela. Anu bu mùmvwà mwambe, kaamukanku kakese aku nkenze anu kùmvwa Dîyì dya Mubaki, kaakaya ku Dyôdi, Dîyì dya Nzambi dilaaba, dishindika bwa dituku dya ndekeelu.

256 Noa uvwa Dîyì dishindika bwa dyende dituku. Nudi nwitabuuja aci anyi? [Disangisha didi dyamba ne: “Amen.”—Muf.] Ee, wende mukenji kawakukumbanaku leelu ewu to.

257 Môsà uvwa Dîyì dishindika bwa dyende dituku. Nudi nwitabuuja aci anyi? [Disangisha didi dyamba ne: “Amen.”—Muf.] Kadyakukumbana bwa mpindyewu to. Yesu uvwa...

258 Yone uvwa Dîyì dishindika. Nudi nwitabuuja aci anyi? [Disangisha didi dyamba ne: “Amen.”—Muf.] Kadivwa difwanyine kukumbana mu matuku a Yesu to. Ncya bushuwa

nanku. To, mukalenge. “Mikenji ne baprofeta byakiikalaku too ne ku Yone; kubangila apu, Bukalenge bwa mu Dyulu.”

²⁵⁹ Bapostolo, bôbò mene bààkafùndà Bible abu. Ki Luther udi upatuka ewu, mu Dilongolola, mēyì ende, aci, ekeleeziya wende, kabyakukumbanaku leelu ewu to. À Wesley paawu kaàkukumbanaku to. À Mpenta kaàkukumbanaku to. Avwa akumbana mu abo matuku awu.

²⁶⁰ Kadi cikaadi ndituku dikwabo. Eci ndikangula dya Bitampi Mwandamutekete. Ndi mumanye ne cidi cimweka cya pabwaci kunudi, kadi Nzambi mmucishindike mu bupwangane bwônsò. Kakwena mpatà nansha mikese—nansha mikese mu Cyôci to. Anu mu bupwangane bwônsò! Ncyêna ncitangalajila disangisha dya pa kaaba didi apa edi to. Ndi ngambila bantu baa ditunga dijima. Nwamonu anyi? Enzaayi cinudi baswe kwenza aci.

²⁶¹ Mpindyewu monaaku Dîyì dilaaba dya dituku dyende, dyûdi wêwê mwikàle citupa cyàdì, ku didyanjila-kulongolola. Mbyenze anu bu ne, dyakamwe, wâmanyì. Paûmvù Cyôci aci, wâmanyì ne lukasa lwônsò ne udi mukanku. Wâfikì kabidi ku dyumvwa ne kwêna nzoolo wa cyena mangumba to, kacya anu kwine kwônsò aku. Uvwa mumanya ne kuvwa cintu kampanda cya cibi muntwamu. Kudi cintu kampanda cya cibi, ncyà bushuwa, bwalu wâmanyì ne uvwa mukwaciibwemu ku buteyi, anu kwine kwônsò aku.

²⁶² Yêyè, Mubaki, mmuumushe bundu bwebè: “Ne ùkaadi mubwélè mu Mbû wa Cipwamwoyi, ku dyowesha dya ne Mâyì a Dîyì ne Mashi a Mwoyi.” Aci ncidi Bible mwambe. Bayeebe wa kumpala ûvwà musediibwe kudiye awu, maalu a pa buloba . . . Mubaki mulaaba awu, mwine ukààvwà mudyanjile kukulongolola awu, wakwoweshi ne dyowesha dya ne Mâyì. Ku “ekeleeziya” anyi? [Disangisha didi dyamba ne: “To.”—Muf.] Aci kacyna cyumvika cijaalame to, ncijaalame anyi? [“To.”] Nudi bafwanyine kusangana aci mu kabala-matuku, kadi kî mmu Bible wa Nzambi to. “Ku dyowesha dya ne Mâyì ku Dîyì.” Mu Dîyì! Nwamonu anyi? Ku . . .

²⁶³ Udi mwimane mubingishiibwe anu menemene, byenze bu ne kutu mucyènzèku to kacya anu kwine kwônsò aku. Eci ki Mukenji wanyi bwa Ekeleeziya mpindyewu. Bu munudi . . . bu mutukaadi twimanyika dyakwila mu mpeepele, anu mu katanci kakese emu. Udi mwimane, pawikala mwimanyine pa Dîyì dya Nzambi ne mwikàle ne Dîyì dya Nzambi, amen yônsò, katoba kônsò, kasunsukila kônsò kaa dileeta. Udi mwimanyine penyi? Ndi nteeta bwa kukwambila ne, umuka ku bizubu abi. Ne patukila apa mu blé emu, mùdì mwa kuboba kumpala kwa Mwânà. Ndi ngumvwa dilwa dya katumba kaa dinowa naaku. Udi mwimane, mubingishiibwe anu menemene, byenze bu ne kutu mucyènzèku to kacya anu kwine kwônsò aku. Aleluuyah!

264 Nwênù bàdì bàmba bwa disangisha dya disakidila's! Ndi ndyumvwa bilenga bya kacya. Ndi ne kusakidila bwa cyôci aci kutamba nî mbwà ncinyi nî ncinyi cyônsò cîntùku mumanye.

265 Udi Mukaji-musela mukezuke, mulenga ukayi kadyuwu, kayi mpekaatu wa Mwânà wa Nzambi udi ne mwoyi. Mulume yônsò ne mukaji yônsò udi mulediibwe ku Nyuma wa Nzambi, ne musukula mu Mashi a Yesu Kilisto, ne mwikàle wítabuuja Dîyì dya Nzambi dyônsò, mmwimane anu bu ne kutu mwanji kwenzaku mpekaatu to kacya anu kwine kwônsò aku. Udi mupwangane. Mashi a Yesu Kilisto! Mmunyi mùdì wêwè mwa... Muntu yêyè...

266 Bu byôbì ne mvwa ne cya kufwa mu dinda, muntu kampanda kwangataye kaaba kaanyi, ncyèna mwa kufwa bwa mpekaatu awu to. Muntu ukaadi mwangate kaaba kaanyi.

267 Nenku Yesu, Dîyì, wakangata kaaba kaanyi mêmè. Wakashaala mêmè, ngènzàmpèkààtù, bwa mêmè kushaala Yêyè, Dîyì. Amen. Ndekèla nshaale mu lulamatu kùdì Dyôdì adi, kî nkùdì ekeleeziya to. Kùdì Dîyì! Amen.

268 Kaa, disangila dya nyuma adi dya Kilisto ne Ekeleeziya Wende mpindyewu, padi mubidi wenda ushaala Dîyì, ne Dîyì dyenda dishaala mubidi apu, dimweneshiibwe, dishindika. Anu cyakamba Bible ne necyenzeke mu dituku edi, ki kwenzekaci eku, ku dituku ku dituku. Mona's, cidi munkaci mwa kwenda kudyungwija ne lukasa lwa menemene mwamwa, mu bipeela byabya, ne bintu biikàle byenzeka, bìndì nciyi nansha mufwanyine kutungunuka ne kubilondesha to. Tudi pabwîpi ne Dilwa dya Yesu, bwa kudisanga ne Ekeleeziya Wende, mùdì Dîyì dishaala Dîyì. Dibiikila dya Nyuma Mwîmpè, ukenketa myoyi!

269 Udi mwimane, wêwè yônsò. Kutukù nànsha mwanji kwenzaku mpekaatu to. Nzambi kèna mumanye cintu nànsha cimwe to. Yidi mu Mbû wa Cipwamwoyi. Kacya kutuku muyènzè to. Uvwa mufundiibwe ku cilumbu bwa cyôci aci, kudi mufundyanganyi awu. Kadi mu bushuwa bwa bwalu, kacya anu kwine kwônsò aku, wêwè uvwa mudyanjila kulongolola bwa kwikala mwânà wa balume ne mwânà wa bakaji wa Nzambi. Udi mwimane kaaba aku, musukudiibwe. Nenku mukanda webe wa kale wa dishipa dya dibaka awu ukaadi muteekiibwe ku luseke, ne ùkaadi mufwe, kakuyi mpatà ne kawucyenaku kabidi to, nansha mu meeji a Nzambi miine.

270 Wêwè udi Mukaji-musela mulenga ukayi kadyuwu wa Kilisto, musukula mu Mashi a Kilisto. Mwânà wa Nzambi wa mushinga mukole, mulenga ukayi kadyuwu, ukayi mpekaatu mwimane ne Mukaji-musela-Dîyì mukezuke, udiYe musukule ne Mâyì a Mashi Ende Yêyè mwine; wâkalwa mubidi ne wâkamwêneshiibwa, bwa Wamona mwa kukwangata wêwè uvwa mudyanjila kulongolola awu mu cyâdì cya Taatù, kumpala

kwa cibangidilu, anu muvwaYe amu. Yèyè uvwa cyambiibwa cinene cya Nzambi aci, cibiikidiibwe ne “ndinanga.”

²⁷¹ Cyònsò cinudi aci, nudi basadidi baa Nzambi, cyònsò cidi Nzambi muswe bwa nwènù kwenza aci, pònsò padi kaaba keebe apu. “Nzambi mmuteeke mu Ekeleeziya, bakwabo bapostolo, baprofeta, balongeshi, bampaasata...” Mmuteeke abi bilondeshile didyanjila-kulongolola Dyende Yèyè mwine. Nenku nwènù nuvwa cyòci aci, anu kwine kwònsò aku.

²⁷² Dibaka dyebe dya kumpala adi dyakavwijiibwa cyanaana. Ki mwakavwijiibwadi. Wèwè kutuku mudyènzè to, kacya anu kwine kwònsò aku. Bwalu, kudi cintu anu cimwepele civwa mwa kucyenza, civwa n’Nzambi mwa kutuuluka panu panshi, Yèyè mwine, ne kwangata kaaba keebe mu mwenekelu wa Mwânà wa Nzambi, Yesu Kilisto, ne kukusukula ne Mâyì, ku dyowesha dya ne Mâyì ku Dìyì. Dìyì; kî ndingumba to! Dìyì ndidi dikusukule. Kadi pawikala kuyi muswe kwimana mu Mâyì a Dìyì to, neusukudiibwe munyi? Wèwè’s uci di anu ne ditoba adi bu mwakadi naadi Eva.

Kaa, Mwânà wa mukooko munanga udi upunga ne lufu ewu, Mashi Ebe a mushinga mukole

Kaàdyàkujìmijakù bukolè bwaWu to,
Too ne piikala Ekeleeziya mujima mupikula wa Nzambi

Ne cya kusungidiibwa bwa kayiku mwa kwenza mpekaatu kabidi to.

²⁷³ Mpekaatu ncinyi? *Mpekaatu* “mbupidya.” Bupidya ku cinyi? Ku Dìyì; bupidya kudi Nzambi, udi Dìyì awu.

²⁷⁴ Dikezuke, kadiyi disambakaja to; kaa, aleluuyah; ùùmuka abidi adi panshi aa bwa kuya ku maulu; amen; mwimane mudilongolole. Anji elaayibi meeji. Bivwalu byebe, bisukula ne Mâyì a Dìyì didi dimata mashi! Dìyì ndilwe Mashi. Dìyì dituuke mashi bwebe wèwè, ne wèwè udi musukudiibwe mu Dìyì didi dimata mashi. Dìyì, diikàle dimata mashi! Mwoyi wa Nzambi mu Dìyì, ne Dìyì dyakatuuka mashi bwebe wèwè, bwa wamona mwa kusukudiibwa ku bukooya bwa ndumba eyi, ne kutookeshiibwa ne kujidiibwa ku disukudiibwa dya ne Mâyì a Dìyì, ne aci cidi cyenza ne meeji ebe ne mwoyi webe bishaale pa Nzambi ne pa Dìyì Dyende.

²⁷⁵ Mpindyewu, udi umanya ne n’Cilelela munyi? Padi Nzambi utuuluka ne uCishindika ne ujaadika.

²⁷⁶ Wèwè udi wamba ne: “Ee, mèmè ncivwa muCìtàbùùje mushindu awu to.” Bòbò kabavwa baCìitabuuja mu mushindu wa Yesu to, kadi Nzambi wakaCijaadika. Kabavwa baCìitabuuja mu mushindu wa Noa to. Kabavwa baCìitabuuja mu mushindu wa Môsà to. Bavwa baswe kwangata dìyì dya Baalama bu ne n’Cyòci ne: “Tudi bònsò mwomumwe, nanku tudisangaayi.”

“Tapulukaayi,” mudi Bible mwambe, “ne bupidya.”

²⁷⁷ Aleluuyah! Mpindyewu monaayi. Wêwè kwêna anu aci nkaayaaci to, kadi uyaaya ku Dibaka mu dyulu. Ne wêwè udi muvwale mpeta wa dibaka wa ngàsà mudyanjila kulungolola, udi kayi dikumbanyina, mpeta wa dibaka wa ngàsà udi kayi dikumbanyina dyebe wêwè mwine to. Nzambi ngudi mucyènzè, Yèyè nkaayende. Yèyè ukaavwa mukumanye kumpala kwa difuka dya dyulu ne buloba, ki kukwelelaYe mpeta wa dibaka Kwôkò aku, kufunda dîna dyebe mu Mukanda. Disakidila kaayi adi's we! Aleluuyah! Nzambi wetu atumbe!

²⁷⁸ Mpindyewu, bwa kujikija, ndi mufwanyine kwamba nunku ewu. Tudi bônso bamanye ne ekeleeziya wa cyena leelu ewu, wa beena Mpenta ewu, mu ngiikadilu wende udiye mpindyewu ewu. . . Mangumba ônsò masanga ntete, mêmè's nêngàkùpè ônsò awu mu dibuki dimwepele, bwalu's ncidiwu. Vulukaayi ne, Yèyè neañji kuswika bisoosa bibi abi tusumbu tusumbu, dyambedi, ne neàbyôshè. Kwangata. . . Ûdi wanji kwangata bikolakola byônsò bya blé abi ne ubyosha byônsò, dyambedi; pashiishe Neangate, nealwe kwangata blé Wende ne neaye nende kumbelu. Badi bônso munkaci mwa kudyungwija mu tusumbu tusumbu, kasumbu kaa ba-Méthodistes, ba-Baptistes, beena Mpenta, bônso baya batangile ku Nsangilu wa Bukwântèndeleelelu. Kwajiki's. Badi bôoshiibwe bônso. Nwamonu anyi?

²⁷⁹ Tudi bônso bamanye ne ekeleeziya wa cyena leelu ewu, mu ngiikadilu wende udiye mpindyewu ewu ne mushindu wende udiye mpindyewu ewu, kênàku mu ngiikadilu wa kujikija mudimu munene udi Nzambi mupeeshe Ekeleeziya bwa dituku edi ewu to. Mbeena Mpenta kaayi badiku mwa kwamba “amen” ku cyôci aci? [Disangisha didi dyamba ne: “Amen.”—Muf.] Eyo. Nwamonu anyi? Ûdi mu. . .

²⁸⁰ Twètù tudi ba-Unitaires, ba-Binitaires, ba-Trinitaires, *cikampanda*, *cikansanga*, *cikankenga*, biikàle tukokangana, tulwangana mvita. Ewu mwikàle *cikampanda*, ne ewu mwikàle *cikansanga*, ne *cikankenga*. Ne yônsò wa kudibo, uciina bwa kukungamangana ne Dîyi, bwa kufika ne ku diteeta diine. Nwamonu anyi? Bôbò's mbamanye. Paudi ubambila bwa Cyôci aci, badi bamba ne: “Ndi—ndi paanyi mupange cya dyenza's. Ncyèna mwa kwitabuuja Aci to. Cidiye yèyè wenza nansha ciikàle cinyi. Mêmè. . .” Nwamonu anyi? Nwamonu anyi? Nwamonu anyi? S'cidi cileeja cidi maman ne papa baudi naabo. “S'udiku mufwanyine kwikala mukulu wa ditunga dijima dîngà dituku. S'udiku mufwanyine kwikala *cikampanda*, *cikansanga*, anyi *cikankenga*.” Mbipiciibwe ne wêwè mwikàle mwànà wa Nzambi.

²⁸¹ Mpindyewu, twètù tudi bamanye ne ekeleeziya kî mmufwanyineku, ekeleeziya wa beena Mpenta awu, nansha bya munyi, nansha bya munyi, kî mmufwanyineku kukumbaja

Mukenji wa dituku dya ndekeelu, mu ngiikadilu wende udiye mpindyewu ewu to. Mmufwanyine kucyenza anyi? [Disangisha didi dyamba ne: “To.”—Muf.] Mona’s, kēna mwa kwitabangana nansha mene pa Dìyì dimwepele anyi abidi mu Bible to. Nenucyēnzè bishi’s? Kēna mwa kucyenzaku to. Pa nanku, nudi numona’s, bwa dingumba kaayi katwakulu nansha bwa bwalu bwadi to. Neya bushuwa.

Neciikalè cisamba cisungula cidi cisungudiibwe bwa cyôci aci. Nwamonu anyi?

²⁸² Mpindyewu, manyaayi, kabidi yônsò wa kutudi mmumanye ne, ndongolwelu yônsò nkòòng wa cyena mangumba, wa cyena Mpenta awu ne bônsò, bikaadi bifwe, mbwena kwamba ne, bwa mwena Kilisto mulediibwe cyakabidi wa mu Mukenji. Uh-huh. Bayeebe wa kumpala mmufwe. Wêwè udi mumanye ne yêyè awu mmufwe. Nzambi mmubilekèle bifwa. Kwabi nkujike. Mishindu yabi yônsò ya maalû a mamanya, ya mamanya a mu mitu, ya bulongeshanganyi bwa tulaasa, ya maalû a mamanya ya bidibo badibiikidila ne mbilongelu bya Bible ne bikwabo abi bikaadi bibutuke. Mbyenze cinyi? Bitapululangane, ba-unitaires *apa*, ne ba-trinitaires *apa*, ne ba-binitaires *apa*, ne lwà kumutu eku *apa*, ne lwà kwinshi eku *apa*, ne cimvundu cyebe cya eyo, kadi badibiikila mudibo beena Mpenta.

²⁸³ Mona’s, mvwa muye kudi nsongaalume mukwabo, dîngà dituku; yêyè’s mmunteeleje, mpindyewu mene. Ne nsongaakaji mukwabo, uvwa wa mu ekeleeziya kampanda. Nsongaakaji awu kwambaye... Mêmè kwamba ne... Bavwa batapuluke. Mêmè ne: “Bwalu budi cinyi?”

Yêyè ne: “Tudi baa diitabuuja dishiilangane.”

Mêmè ne: “Kakaa, umfwileku luse. Wêwè udi mwena Katolike anyi?”

²⁸⁴ Yêyè ne: “To.” Kungambilaye ekeleeziya wa cyena mangumba muvwaye usanganyiibwa, wa cyena Mpenta.

²⁸⁵ Mêmè ne: “Udi *wêwè* mwena nganyi?” Nsongaalume mwikàle mwena Mpenta, yêyè pende, kadi wa dingumba dikwabo. Kaa!

²⁸⁶ Nutuku bamanye ne, ekeleeziya wa Katolike kaa cyena Loomo paakabangaye, uvwa wa Mpenta anyi? Mbanganyi badi bamanye ne aci ncilelela? [Disangisha didi dyamba ne: “Amen.”—Muf.] Mbimwangate bidimu binunu bibidi bwa yêyè kufika mwaba ukaadiye mpindyewu ewu, kacyiku witaba kabidi kantu nansha kamwe kaa mu Mifundu to. Nansha kamwe. Mona’s, beena Mpenta, mu bidimu makumi abidi kuumukila ku mpindyewu, nebiikalè babi kutamba mùdi bôbò abu mpindyewu emu, bôbò batungunuke ne kuya muyaayabo mpindyewu emu. Kaa, s’ncya bushuwa. Nwamonu anyi? Ncinyi aci? Ncinyi aci? Tangilaayi numone ne papa ne mamam wabo nganyi. Balekela bakaji baabo bakosa nsuki. Badi mwa kwenza pawipi ne cyônsò

cidibo baswe kwenza aci. “Bu mudibi anu ne mbeena ekeleeziya ewu, ki cyònsò cidi ne mushinga.”

²⁸⁷ Kaa, kabyena bikemesha to, kabyena bikemesha to mudi dipiishiibwa dyabo dya kudi Nzambi dyenda dyungwila mushiki! Nzambi mmunuteekeleCi anu ku mèsù kwenu menemene kadi nwênù nubwita kwísù ne nupanga kuCitangila. Eyowa’s. Nukanga myoyi yenu ya luse, panudi numona Dîyì dilelela dya Nzambi ne Bitampi Mwandamutekete ebi biikàle bishindika ne bijaadika ne mbyôbi. Ne bujaadiki mu maulu, mu matunga ônsò ne myaba mikwabo yònsò, ku bimanyinu binene ne maalu a kukema byakalayaYe ne Neënzè, pa dîbà adi nukanga myoyi, kadi kwamba ne: “Ncyê—ncyêna mumanye. Ndi—ndi paanyi mupange cya dyenza’s. Mêmè. . .” Nwamonu anyi? Kaa, ekelekele! Ncifwe, kadi kabayi bacimanye to. Mpekaatu ne matomboka’s! Nudi bafwe. Kaa, ekelekele!

²⁸⁸ Tudi bònsò bamanye ne ekeleeziya mu ngiikadilu awu kî mmufwanyineku kukafikisha dituku dya ndekeelu edi ku ntengu to. Mmuni mudiye mufwanyine kubweja Maalaki 4 mu cyalu? Mmuni mudiye mufwanyine kucyenza? Baa bwalu nyawu kabayi nansha biitabuujja cintu bu nanku. Mmuni mudiye mufwanyine kwitabuujja, kubweja Luuka 17.30 mu cyalu? Mmuni mudiye mufwanyineku kubweja Mifundu mikwabo yònsò mu cyalu yidi milayibwe bwa dituku dya ndekeelu edi eyi? Kî mmufwanyineku kucyenza to, bwalu yèyè udi uCivila. “Anu mwakadibi mu matuku a Lota, ki mwikalabi kabidi ku dilwa dya Mwânà wa muntu.”

²⁸⁹ Tangilaayi ngiikadilu, uvwa Lota, uvwa Sodoma usanganyibwa awu, mu dituku adi. Tangilaayi, ngiikadilu wa ekeleeziya mu dituku adi. Tangilaayi numone cyàkenzekelà Abraham, Musungula awu.

²⁹⁰ Tangilaayi numone cyàkenzekelà Lota ne bakwabo abu mu Sodoma amu. Tangilaayi ba-Billy Graham ne Oral Roberts abu, muntwamu mu mangumba awu. Tangilaayi numone Ekeleeziya musungula wa Abraham, mupàtulamù.

²⁹¹ Tangilaayi numone ne ncimanyinu cya mushindu kaayi aci, Yesu Yèyè mwine, Nzambi mwandamuke mubidi mwimane mwaba wawa mu mubidi wa buntu. Wèwè udi wamba ne: “Awu’s uvwa m’Mwanjelo.” Bible s’mmwambe ne Ûvwa n’Nzambi.

²⁹² Mukalenge Nzambi, Elohim, mwimane mwaba awu mu mubidi wa buntu, uleeja ne Yèyè nealaabe bikole Ekeleeziya Wende mu matuku a ndekeelu, mu mushindu wa ne neciikalè Nzambi ukwata cyakabidi mudimu mu mubidi wa buntu. “Anu mwakadibi mu matuku a Sodoma, ki mwikalabi kabidi ku dilwa dya Mwânà wa muntu.” Cintu cya mushindu umweumwe awu. Badi bacimona mwaba awu mene mu Mifundu. Babala. . . “Kenketaayi Mifundu, bwalu mu Yôyi mmunudi nwela meeji ne

nudi ne Mwoyi wa Cyendelelee.” Kadi Yôyî ayi paayi’s ki Yidi yifidila Cyôci eci bujaadiki. Nwamonu anyi? Nwamonu anyi?

293 Pa nanku tudi tumanya ne mbafwe. Nzambi mucilekele cidifwila mu budisu bwâci cyôci ciine amu, mu ndongamu wa maalu a mamanya, wa bulongeshangannyi bwa tulaasa.

294 Kale wâwa beena Mpenta bônso bavwa, wêwê muteele bwa—bwa kutuma wabo mwânà ku cilongelu cya Bible cya mukasômbèlekù, kale wawa pavwa Mwaneetu wa kale Loyate ne bakwabo abu biikâlè muneemu emu, s’bavwa bafwanyine kukwipata mu ekeleeziya. “Kadi, kaa, mpindyewu’s ki cintu cya citambe bunene. Mwanaanyi wa balume’s udi mu cilongelu cya Bible cya mukasômbèlemu aci.” Yêyê’s udi munkaci mwa kudyumbwila lukita. Pa nanku, mpindyewu, nudi nwele meeji ne bôbô mbafwanyineku kuCiitaba, leelu wa Ndaaya ewu anyi?

295 Nudi nwele meeji ne ndi nkeba bwa kutwa dipanga nyama ku mikolo anyi? To. Cîndi nzwambila ncya ne kudi dishiilangana pankaci paa cikondo cya mamanya a mu mitu citudi ne mwoyi eci, mùdi ekeleeziya mwimicishiibwe ne maalu a mamanya ne byônso bidibo babiikila ne “mbya didifwanyikijila” ebi ne bikwabo byônso. Nzambi kî ngwa udifwanyikijila to.

296 Ee, baakwidi abu—abu bavwa badifwanyikijile Nzambi bipwangane anu menemene, mu mushindu wa biikalè bamanye muvwa Maasiya mwa kulwa, kadi Yêyê kulwa mu mushindu mushiilangane bikole ne muvwabo bôbô badifwanyikijile amu. Kacivwa cya maalu a mamanya nansha. “Mmuni mudi Muntu ewu mufwanyine kwikala nenku, pende Mwânà mulela mu masandi? Nku cilongelu kaayi kukaadiYeku muye? Dilonga Dyende dya tulaasa ndifumine penyi? Nkwêpî kudiYe mukapetele edi dilonga?”

297 “Mona’s, Ukeba peebe bwa kutulongesha amba’s? Peebe mulela mu masandi’s.” Nwamonu anyi? Kaa, Nzambi wanyi!

298 Nudi numona mudi cintu cimwecimwe aci cyenzeka cyakabidi anyi? [Disangisha didi dyamba ne: “Amen.”—Muf.] Nudi numona mudici cyenzeka cyakabidi anyi? Mu maalu abo ônsò a mamanya a ntendeleelu awu, maalu a mamanya a ntendeleelu a bilondeshile bivwa cilongelu cyabo cya Bible cyambe, mushindu awu ki udibo baCiswe. “Mushindu awu ki udibi bikengela kwikalaCi, bwa cyanaana kî n’Cyôci nansha.”

299 Nzambi utu anu ubakutakaja, misangu yônso. Citu anu cilwa mu mushindu mushiilangane. Cyakenzeka nanku mu cikondo cya Noa; cyakenzeka nanku mu cikondo cya Môsà; cyakenzeka nanku mu cikondo cya Kilisto; cyakenzeka nanku mu cikondo cya Yone; cyakenzeka nanku mu cikondo cya bayiidi; cyakenzeka nanku mu cikondo cya Wesley; cyakenzeka nanku mu cikondo cya Luther; cyakenzeka nanku mu cikondo cya Mpenta; nenku ncyeci cyenzeke cyakabidi nanku. Kacyena cishintulula citebelu cyaCi nansha. Kudi kwenzeka cintu anu

cimwecimwe aci misangu yònsò. Anu balongolodi munda mwa bikondo abi mwandamutekete. . . bisambombo abi, too ne ku cya mwandamutekete. Nenku Bwakabuulwibwa 10 mmwambe ne, bwa mu dîbà edi necishintuluke. Ne ncishintuluke.

³⁰⁰ Mpindyewu tukaadi tujikija, biikàle twamba eci nunku. Kukumbaja mudimu munene mubatuma naawu, bavwa mwa kucyenza munyi? Twètù tudi bamanye ne bôbò mbafwe. Nzambi ngudi mwenze bwa kufwaci mu cikondo cya maalu a mamanya eci, cyôci cyònsò, bwa—bwa Yêyè kumona mwa (kwenza cinyi?) kukangwila Mukaji-musela udi kayi wa cyena mangumba awu bwalu busokoka bwa Bitampi Mwandamutekete. Mmunyi mudi dingumba mwa kwitaba Bitampi Mwandamutekete abi, padiBi kakuyi mpatà to bibengangane, dimiinu dya nyoka ne bikwabo bintu byònsò abi? Byònsò mu kaabujima, maalu masokoka mwandamutekete ônsò nkòong adi abengangana ne bitubo bôbò balongeshiibwe, bwalu mbakangacile cilongelu cya cyena kale ku cilongelu cyabo cya Bible aci.

³⁰¹ Nenku Bitampi Mwandamutekete bya Nzambi abi, dîbà dyakakangudiibwaBi kwaka pa mukuna: Nzambi awu, to, mêmè mfwile mu cyambilu eci anu mpindyewu mene piikala Cyôci aci kaciya Bulelela. Ne mêmè nkaavwa mudyanjile kunwambila, cidimu cijima ne ngondo isambombo kumpala kwa kwenzekaci, civwaYe mungambile ne: “Nda ku Arizona,” ne civwa mwa kwenzeka mu cipeela amu. Kabidi kudi bantu basòmbe kaaba aka, diloolo edi, bavwa biimane mwaba mwine awu ne biikalèpu pavwa Banjelo mwandamutekete abu batuuluke. Ne nansha bikandakand- . . .Cikandakanda, cikandakanda cya *Life*, ncipatule bwalu bwaCi. Cidi anu kwôkô aku mu nzubu wa dijojela amu, ne bikwabo byònsò. Mpindyewu bôbò kî mbamanye mene ne Ciine aci cidi bishi to.

³⁰² Ne byònsò mbyambiibwe, kaa, too ne bya dibutuka dya Californie, diikalà mwa kwenzeka mpindyewu edi, ne bintu bikwabo byònsò ebi. Ne mûmvwa mubămbile ne neciikalè mu matuku bûngi kampanda, muvwaci mwa kwikala kaaba kadi dizakala dinene dya buloba edi dyenzekele mu Alaska, ne cyôci aci neciikalè ntwadijilu wa cimanyinu cya cikondo, ne ciine civwà mwa kwenzeka aci. Ne anu ku mwaku ne ku mwaku, civwaCi cyambe aci, kaCiyi cipangileku musangu nansha umwe to. Kacya kanutuku baCimone cipangele to. Ne kaCyena mwa kupangilaku to, bwalu Cidi m’Mêyì a Nzambi. “Ne Dyulu ne buloba nebijimine, kadi Cyôci kacyena mwa kupangilaku to.” Neya bushuwa.

³⁰³ Bivwa bikengela bwa Nzambi kukangulaye Bitampi Mwandamutekete abi, kaciya mu dingumba kampanda nansha. Mêmè ntu misangu yònsò anu mbengangana naadi. Kadi, pambelu paa dingumba, bwa Yêyè wàmòna mwa kwangata Mukaji-musela, kayi mukaji-musela wa cyena mangumba to. Kavwaku Yêyè mwa kucyenza to. Cidi cibengangana ne

Dîyì Dyende Yèyè mwine. Mmukangule maalu masokoka mwandamutekete awu mwômò amu. Aci cidi cileeja patooke, cipatula patooke maalu avwa masokoka kacya ku difuka dya dyulu ne buloba awu, bivwa bifwanyine kusokolodiibwa mu matuku a ndekeelu, kubisokolwela bânà baa Nzambi. Mbipatule Aci patooke mpindyewu kumpala kwa bantu, bwa baCimone, mwaba awu, nwênù mpindyewu, kudi Mukaji-musela wa pambelu paa cyena mangumba ewu. Kaa, ekelekele!

³⁰⁴ Ki mikanda yenu ibidi nyôyì ayi's. Umwe wa ku yôyì m'Mukanda wa Mwoyi wa Mwânà wa mukooko. Dîná dyebe Mwômò amu ndidyanjila kulongolola bwa kwikalaMu. Kadyena mwa kuumukamu to, bwalu kwêna mwa kudyumusha to nansha bishi, wamonu's, bwalu dikaavwa dimana kuteeka bwa kwikalaMu. Kadi mukanda wa mwoyi wetu wa ciibidilu ewu, udi mwa kudikupula dîbà dyônso naka. Wamonu anyi? Wêwè kuyi munyingalale to, didi dikupudiibwa, dyôdì diine, bwalu neupicile ku Cilumbulwidi. Mukaji-musela kêna nansha mene upicila ku Cilumbulwidi to; ûyaaya mu Dyambwibwa. Anu bu. . .

³⁰⁵ Ndi ngamba nunku, bwa kujikija. Dîbà dikaadi dyenda diya, pa nanku. . . tukaadi pabwipi ne dîbà citeema ne tusunsa makumi asatu. Kadi netupatuke mwaba ewu pamba dîbà citeema ne tusunsa makumi asatu kukumbanadi, bu Mukalenge mwa kwanyisha. Ikalaayi anu mu kaneemu kaa menemene mpindyewu, nuteelejaayi. Musangu kampanda. . .

³⁰⁶ Ndi ngamba nunku mpindyewu, eci ciyaaya mu ditunga dijima. Mu New York, tudi mpindyewu dîbà dikumi ne dimwe wa bufuku ne tusunsa makumi abidi ne tutaanu. Lwà mwamwa mu Philadelphie ne luseke lwa kwôkò aku, bansantu bananga baa kuntu kwaka badi basômbe bateeleja abu, mpindyewu mene, mu ekeleeziya ya mu nyungulukilu mwônso amu. Mu dibànda mwamwa, ne mu dipweka lwà mu nyungulukilu wa Mexique, ubànda mu nyungulukilu wa Canada ne mu nyungulukilu mwônso amu, kumukila eku kwobeka eku. Mu ntanta wa kilomeeta nkama isatu ne makumi abidi, mwaba wônso naka munda mwa citupa cya buloba cya Amerike wa ku nord eku, pamwe ne kwônso aku, bantu badi, munkaci mwa kuteeleja mpindyewu mene. Binunu kuvudija ku binunu, munkaci mwa kuteeleja.

³⁰⁷ Nenku ki Mukenji wanyi kunudi ngwôwò awu, nwênù Ekeleeziya, nwênù bàdì bènza disangila, disangila dya nyuma ku Dîyì, bwa ne nwênù nukaadi bafwe ku baabayeenu baa kale abu. Nukaadi balediibwe cyakabidi. Kukebi bwa kumujuula kabidi ku buloba to. Yèyè awu ukaadi mufwe. Pawikala mwena Kilisto mulediibwe cyakabidi, kaamutoloku kakese kavwa kadyanjila kukulongolwela aku, n'Dîyì diikàle dilwa pa Dîyì, pa Dîyì, pa Dîyì, pa Dîyì, ne kalwè mu cipidi cijima cya Kilisto, ncyà bushuwa, bwa kumonaYe mwa kulwa kwangata

Mukaj'Ende musela. Mpindyewu tukaadi badilongolole ku cintu anu cimwepele, nku Dilwa dya Mukalenge.

³⁰⁸ Ki dîna dyebe pa Mukanda wa Mwoyi ndyôdi adi. Mukanda wa Mwoyi n'Dîyi dya Nzambi, bwalu Dîyi didi n'Nzambi, ne Nzambi ki cintu cimwepele cidi Mwoyi. Pa nanku dîna dyebe divwa dileeejiibwe mu Bible kumpala kwa Bible kulwaye Dîyi. Nenku wêwê kaaba aka bwa kwenza cyôci aci, kaCyakushindikaku Dîyi adi anyi? Ekeleeziya kaakudishindikaku Yêyê mwine anyi? Maalaki 4, ne bikwabo bintu byônsò ebi, kabyakudishindikaku mu mushindu mupwangane, mupwangane ne kuleeja ne Cidi n'Cyôci aci anyi?

³⁰⁹ Paakalwa Yesu, Wakamba ne: "Piikalabi ne Ncyêna ngenza byenzedi byakalayiibwa bwa Mêmè kwenza to, kanuNgiitabuui to." Yêyê wakaya kashaala wa mu cisumbu kaayi? Wakamba ne: "Bôbò bônsò badi. . . Nudi baa tatwênù, dyabulu, ne byenzedi byende ki binudi nwenza ebi." Nwamonu anyi? Nwamonu anyi?

³¹⁰ Tudi mu matuku a ndekeelu, nwênù Ekeleeziya. Ki wanyi Mukenji wa disakidila bwenu nwênù ngwôwò awu.

³¹¹ Mpindyewu, kumpala kwa kujikija. Musangu kampanda mvwa nsanganyibwa mu Glacier National Park. Tuvwa bumvwe bamba, dituku dijima adi ne, bavwa ne—bavwa ne mâyi a apongoloka. . . kapyà kenze bu dibwe dya mâyi dikwatakane divwà ne cya kumata diloolo adi. Pa nanku bantu bavwa mu mudimu wa kudilongolola, dituku dijima adi, balongolola cintu aci, bwalu bavwa ne cya kupongolola kapyà aku, diloolo adi. Bavwa bateeke kapyà kenze bu mâyi apongoloka, cyenze bu dibwe dinene dya mâyi dikwatakane. Kadi didi. . . Cìvwa ne mmwenekelu wa mwanzankongolo, bu nanku awu, padiwu upatuka, wa kapyà aku kavwa kamata kapatukila mu dibwe dikwatakane edi. Eku ne eku mu cisuku cya dilamina nyama amu, mêmè ne mukajaanyi, ne bânà, tuvwa bendakanemu lwà makàsà mundaamuunya mwônsò amu. Tuvwa baswe kushaalamu, bwa kubandila kapyà kavwabo ne cya kuleeja aku. Pa nanku bôbò bavwa—bavwa—bavwa batulayeku ne netukamone, ne tuvwa mwa kudimwenaku cyakabidi. Kwambabo ne batu naaku nanku ku movù ne movù wa luuya wônsò ne bikwabo. Mêmè kwamba ne: "Ee, netwikalèku mwa kukàmòna anyi?"

³¹² Bôbò ne: "Tudi bakalaye bwa diloolo edi. Mbatulaye cyôci aci." Bôbò ne: "Bakaadi kuulu kwaka munkaci mwa dikalongolola mpindyewu."

³¹³ Paanyima paa byônsò bimana kulongolola bwa cintu kwenzekaci! Ki cidi munkaci mwa kwenzeka patudi twakulangana apa. Byônsò bidi munkaci mwa kulongolodiibwa bwa cintu kwenzekaci, Ekeleeziya munkaci mwa kupatudiibwa bwa Dîna Dyende, mwikàle upatula Mukaj'Ende musela

munkaci mwa baa pa buloba, mangumba aa ne maalu ônsò a pa buloba, ne bukooya ne bintu bya pa buloba.

³¹⁴ Bantu bônso; civwa ne cya kwenzeka aci cikaavwa cimana kulongolola. Bantu bônso bakaavwa biimane mánzàlànzála pambelu apu. Kwambabo ne: “Mpindyewu ikalaayi anu kacya nwatangila, anu lwa kuulu menemene kwa mukuna kwaka.”

³¹⁵ Mushindu awu ngukaadiCi misangu yônso cilwàlwàlwe. Mushindu awu ngwikalaCi ne cya kulwa musangu ewu. Mushindu awu ngutuCi misangu yônso cilwalwalwa. Kacyi cilwila mu dingumba kampanda to! Kacya Nzambi katuku mukwate mudimu ne dingumba nansha, kacypu!

³¹⁶ Mulongolodi udi upatuka, upeta Dìyì dya Mukalenge. Ne pashiishe padiye ufwa, badi biibakilapu dingumba. Cyôci aci ncikaadi beena Mpenta ne bônso abu benzenze. Dîbà dya tulumbulumbu tupyatupya atu ne bikwabo byônso, ki mushindu ngwôwô awu, ki mushindu ngwôwô awu udi cintu cipatuke. Dìyì dipyadiya disakidiibwe, pashiishe biibakilapu ekeleeziya, benze dingumba, baditapulule. Bivwa bikengela kwikalabi mushindu awu.

³¹⁷ Mpindyewu, kwêna mwa kutamba—kwêna mwa kutamba bufuki bukole to. Bufuki butu bubwela mu ciibidilu cimwecimwe aci, dîbà dyônso: cokolakola, dibeji, mwepu, ne bikwabo, cizubu, pashiishe blé.

³¹⁸ Mpindyewu monaayi. Byônso bikaavwa bilongolola. Byônso bikaavwa bimana kuteemesha ne bilongolola. Nenku bantu bônso bakaavwa biimane mánzàlànzála pambelu apu. Mvwa ne mutu mwela muulu, diboko dyanyi dyela mukajaanyi kunshingu. Tuvwa munkaci mwa kutangila. Ne bânà kacya biimana mwaba awu, twêtù bônso kacya twatangila kuulu aku, mushindu ewu. Ekelekele! S’civwa ncintu kampanda’s, bu muvwabi ne tuvwa bacîndile. Bavwa batulayeci.

³¹⁹ Amen! Dìyì ndidi dîlayà Cyôci eci. “Nebyenzeke ne, kumpala kwa dituku dinene ne didi dikwacisha bwôwà dya Mukalenge kulwadi, monaayi, Nènnùtùmìnè Eliya muprofeta. Yèyè neakudimune myoyi ya bânà uyaaluja kudi baataatù, ne myoyi ya...” “Nebyenzeke mu matuku a ndekeelu ne, Nèngìcìkijè Nyuma Wanyi uumukila mu Dyulu.” “Mvula wa mbedi ne mushiishe neyilwe cyapamwe mu dituku dya ndekeelu.” Milayi yônso eyi, ku Mifundu, nkudiyi mifidiibwe. Tudi batangije mpala muulu. Tangilaayi Mukaji-musela mulelela awu mu ditunga dijima pa dîbà edi, mutangije mpala muulu. Nwênù Ekeleeziya, Yèyè awu ulwalwa, dimwe dya ku matuku adi panshi aa. Anu mudibi cya bushuwa ne Yèyè wakalwa musangu wa kumpala, Yèyè ulwalwa cyakabidi. Longololaayi bintu byônso. Tapulukaayi ne cizubu. Dyănyikaayi kumpala kwa Mwânà. Ikaalaayi anu kacya nwatangija mpala muulu. Ikalaayi anu mu dindila.

³²⁰ Dyakamwe, twètù kuumvwa cintu kampanda cyumukila lwà kuulu kwa kakuna aku, dīyì kupwekeladi mu cikelokolo, dyamba ne: “Byònsò bikaadi bilongolola.”

³²¹ Pa dībà adi muntu kampanda, mwimanyine ku luseke lwanyi aku, kwambaye ne: “Kapyà katuuluke.” Kì kòkò kàlwalwà aka, kapongolokela ku mukuna aku, dibwe dikwatakane dya kapyà ne ndimi ya kapyà yenda yilakuka, cintu cya kubandila’s.

³²² Mwaneetu, twikalaayi ne bintu byònsò bimana kulongolola, bwalu dimwe dya ku matuku adi panshi aa Kapyà nekamate. Netubande muulu. Mpindyewu twikalaayi badilongolole bwa cikondo cya dimata dya Kapyà. Tudi mu matuku a ndekeelu, tudi bònsò bamanye aci, ne tudi badilongolole bwa Dilwa dya Mukalenge. Cintu cidi cikengela kwenza ncyà wèwè kutapuluka ne mpekaatu yònsò. Tapuluka ne cintu kana cyònsò cidi citangila maalu a pa buloba. “Kanunangi maalu a pa buloba anyi bintu bya pa buloba to.”

³²³ “Muntu nansha umwe, ku twitabaayi wende, kakuseeswishi to.” Shaala wèwè anu mujaalame menemene mu mulayi wa Nzambi, Dīyì dya Nzambi. Ne Dīyì adi, piikalaDi n’Dīyì bwa dituku edi, Nzambi udi ushindika ne n’Dyòdì. Yèyè kayi ushindika to, kī n’Dīyì bwa dituku edi nansha.

³²⁴ Dīyì dyàkamata mu Dituku dya Mpenta adi kadyakukumbana mu dituku edi to. To, mukalenge. Adi divwa mbwa Mpenta. Edi mbwa Mukaji-musela, diya dya Kumbelu dya Mukaji-musela. Twètù tudi ne cintu cishiilangane. Beena Mpenta bavwa baleeja mpala bwa cyôci aci, cyakabidi. Twètù tudi mu cikondo cya Mukaji-musela. Anu mwakadibi ne—ne Dīyì dya Noa kadivwa difwanyine kukumbana mu matuku a Mòsà to; anu mwakadibi ne mikenji ya Mòsà kayivwa mifwanyine kukumbana mu cikondo cya Pòlò mwaba ewu to. Yèyè uvwa uteeta kubambila ne: “Nukaadi bafwe ku cyôci aci, ne kanwena mwa kwikala ne aci to.”

³²⁵ Ekeleeziya, nwênù bândì ngambila aba, diloolo edi, mu ditunga dijima, pawikala—pawikala mumane kutapuluka ne dingumba ne bukooya bwònsò ne bintu bya pa buloba ebu, ne bintu byònsò bidi bikulama mu twitabaayi mikwatakaja kudi bantu ne mēyì matuma ne bintu bya mushindu awu abi, pawikala mutapuluke: Banduluka utangile muulu. Dilongolole. Kapyà nekamate, dimwe dya ku matuku adi panshi aa. Nzambi neaMulekele alwe, ne ncintu cya kubandila. Udi muswe kwikala mudilongole paalwaYe anyi? Udi muswe kwikala mudilongolole bwa kubànda Nende paalwaYe anyi? Dyambwibwa dya mu musokoko dya Mukaji-musela mutambe mfukilu adi: “Yèyè neavwijiibwe wa cifwak-. . .umuka ku cifwaka uya ku dibenga kufwa; neashintuluke, mu katanci, mu mubunyi wa dīsù. Twètù badi ne mwoyi ne biikala bashaale katwakupangisha badi balaale nansha.”

326 Dìngà dituku, dya divuluka dya dijika dya Mvita ya Kumpala ya Buloba bujima, mvwa mwimane mu Tucson mwamwa. Mwanaanyi mutekete wa balume uvwa ujinga kubandila lwendu lwa mindololooci. Mvwa munkaci mwa kulonga, ne ncivwa ne dībà dya kuyaku to. Ne mvwa ne mabiikila àbùngi a babeedi ne bikwabo. Pa nanku kwambaye ne: “Papa, badi bàbènga bwa kuya naanyi.” Yèyè ne: “Nda kwòkò naanyi wèwè.”

327 Mêmè ne: “Mbîmpè.” Mwaneetu Simpson, ngeela meeji ne ùdi kaaba aka; ne mwanende mutekete wa balume uvwa ujinga kuyaku. Ki mêmè kubakupa mu kashinyi ne kupwekaku lubilu.

328 Mêmè kwimanyina lwà mu disangu amu mbandila. Nenku paanyima paa katanci, mêmè kuumvwa, lwà paanyima pààpa mu ntanta, kulwa mwadi wa upacisha maci ne, “buum, buum,” ngoma’s, benda bimba. Mvwa mwimane mwaba awu. Mêmè kudyambidila ne: “Ee, bàna bakese aba, s’bakaadiku babalebale mikanda yònsò ya pa bidi bitangila cilwilu eyi. Nebanange ciine aci bikole.” Mêmè kumona, civwa cilwa kumpala civwa nkatumba kaa kale kaa Mvita ya Kumpala ya Buloba bujima. Ki badi benda baseemena baba, tulumyana twa tukese menemene mushindu ewu. Ki kulwaku bààkalondà, paanyima paa aci; cyàkalwà paanyima paa aci civwa nkatumba kanene kapyakapya kaa Mvita Miibìdì ya Buloba Bujima, katumba kanene kaa mvita kaa Sherman kiikàle ne lubungu lwa dipyapijilangana naalu midilu. Ki pashiishe kulwaku cyàkalondà, ne cyàkalondà, ne paanyima paa katanci kulwaku Baamaamù baa Mutooto wa Ngòlò.

329 Ki pashiishe, paanyima paa katanci, kulwaku bankolomu dikumi ne babidi bavwa bashaale, mu ditunga dijima dya Arizona adi, baa ku Mvita ya Kumpala ya Buloba bujima; bankolomu dikumi ne babidi. Paanyima paa aci, kulwaku cishinyishinyi kampanda, musalaayi uvwa kayi mumanyike to, ne kankuruse kakese katooke. Pavwa piimane mwaba awu mwendeshi wa mazuwa a mâyi, musalaayi wa pa mazuwa a mâyi, musalaayi, biikàle bàlama; kaaba kakese kakosolola pa cishinyishinyi aci. Ku luseke lukwabo kuvwa maamù mukulakaji wa mvya ku mutu, musòmbè ne mutooto wa ngòlò mumwasa ne mpengele, mukaji mutekete mulenga kwísù mwikàle udila mwadi, bayende uvwa mufwe; mwànà wa balume mukese muvwale biteetela, mutu musendeka luseke. Tatwëndè bavwa bamushipe. Ki paanyima paa aci kulwaku bikwabo ne bikwabo ne bikwabo kabidi, ne pashiishe too ne ku cilwilu cipyacipya. Mvwa kacya ngiimana mwaba awu. Cintu kaayi cya kubandila, kadi mushindu mwine uvwaci cya dibungama’s!

330 Mêmè kudyambidila ne: “Éyi Nzambi wa yààyà, dimwe dya ku matuku adi panshi aa’s nêmbandilè cikwabo cintu.”

331 Nekulwe dituku dya dibiishiibwa dya ku lufu, dya ne: “Badi bàà kumpala nebiikalè bàà ndekeelu; badi bàà ndekeelu

nebùikalè bàà kumpala.” Baprofeta baa kale abu nebànji kulwa benda bapatuka, dyambedi, ne nebamone mulongo wa kadyàmashinda awu wenda uya, bantu benda bàbànda mu mpeepele. “Nenku twètù bàdì ne mwoyi ne bàdì bashààle katwakucyamakana bàdì balààle mu njila nansha. Bwalu mpungi wa Nzambi neadile, bafwe mu Kilisto nebabiike dyambedi.” Twètù netubwele buludi mu mulongo pamwe ne bôbò abu bwa kubwela, aleluuyah, bônso baa mu cikondo cijima cya Luther, Wesley, ba-Méthodistes, ba-Presbytériens, too ne ku cikondo cya ndekeelu, bààkaakidilà Dìyì mu cikondo cyabo abu.

Nzambi anubeneshe. Ikalaayi ne bintu byônso bimana kulongolola, nenku Kapyà nekamate.

³³² Twinyikaayi mitu yetu bwa katanci kakese cyanaana. Ndi ndikonka, mu bateeleji badi bamweka ku mèsù mu diloolo edi aba, pândi munulame mwaba ewu kacya ku... too ne pa dîbà citeema ne tusunsa makumi asatu apa. Kudiku muntu kaaba aka, kudiku bantu dikumi ne babidi kaaba aka, mbanganyi kaaba aka, badi mwa kwambaku ne: “Mwaneetu Branham, ndi ndyumvwa mêmè mwine bundu, mushindu wùndi mwendè mu wanyì nsòmbelu. Ntu mwinyikènyike mpala bikole be kumpala kwa dingumba ne bantu. Ndi mumanye ne ncyèna mukumbanangane ne Dìyì dya Nzambi to. Nénkulòmbè anu bwa wèwè kunsambidilaku, Mwaneetu Branham”? Ela cyanza cyebe muulu. Nzambi akubeneshe. Nzambi akubeneshe. Anji tangilaayi, kuulu ku bisasa kwaka, ne myaba yônso. Nzambi anubeneshe. “Ndi mumanye ne...” Mpindyewu kuumvu bundu to. Mpindyewu, kuumvu bundu to.

³³³ Ne mwamwa naka, mu ditunga dijima, kuumukila ku New York too ne ku Californie, kuumukila ku Canada too ne ku Mexique: nwènù badi badisangishe mu ekeleeziya ayi (mudi tusumbu tukesetukese twa lulamatu tùdi twitabuuje Mukenji ewu ne mwoyi wàbò wônso; mbapatuke, bapatuke mu dikenga dikole, bapatuke bapicile mu mangumba awu; badi mitoloku ya Mwoyi) nudi nuumvwa dijinga dinene, diloolo edi, bu muvwa kaamukanku kakese aku, didi dyenza ne nùmvwè Cintu kampanda ciikàle cishiilangane ndambu ne cinukaadi bumvumvwe, kadi, nansha nanku, munda mwa mwoyi webe mwikàle mumanye ne m'Bulelela anyi? Nwènù, muntwamu, kudi mpaasata kampanda mwimane mwaba kampanda muntwamu. Udi mwele cyanza cyebe muulu. Nénkusambidile.

³³⁴ Bintu ebi kabitu mbyenjiibwe mu ditumba kampanda to, wèwè mulunda wanyi. Wavulukaku ne: “Mushiku wa mbelu mmubumbakane ne njila mmubulakane, ne anu bakese menemene ki baamupeta.” Kwikadi wenda ulonda musumbà udi utungunuka ne kwenda kuya kuntwaku awu to, mulunda wanyi, Cikondo cya Ekeleeziya wa Laodikiya aci. Mbafwanyine kwikala batupika muulu ne panshi, batakula maja a padibo bumvwa mijiki, baa civumvu abu. Mpindyewu, kî mbambe ne

ùvwa mukwate mashika bu dibwe to, mbambe ne yêyè uvwa civumvu, mbeena Mpenta abu, kadi kayi mumanye ne mmwena dikenga, mukengeledi wa luse, mpofo to. Mpofo ku cinyi? Dîyì, ku dimweneshiibwa dya Dîyì; anu ne bwalu Dyôdì kî ndilwile mu malongolodi abo, kabeena mwa kuDyakidila to.

³³⁵ Ne nwênù bambi badi mu Tucson amu, diloolo edi, kî mmêmè udi unwomekela bujitu bwa bwalu abu to. N'Nzambi. Mêmè mvwa kuntwaku munda mwa bidimu bisatu. Mêmè kunwambila ne ncivwa muswe kajuula ekeleeziya to. Ncyêna mumujuule to. Mwaneetu Pearry Green ngudi mumujuule. Mvwa kuntwaku munda mwa bidimu bisatu bijima, ne kanwênakù bambiikile ku cyambilu cyenu musangu nansha umwe to. Ndi musòmbèle mu Tucson amu munda mwa bidimu bitwe ku bisatu bijima. Nzambi neangumushe mu cipeela amu dimwe dya ku matuku adi panshi aa. Mukenji ewu udi ne cya kwikala ne mwoyi. Ndi mwenze ne mwanyì mwònsò bwa kwanyishiibwaku kunudi. Ndi—ndi mumanye kabingilà kanùdì bacyènzèle. Nudi batèèlèje anyi? Kabingilà kamwepele kanùdì benzèle nanku, dingumba dyenu ndifwanyine kunwipata. Ne nudi bamanye, bààbùngì beenu bânkaadiku mwakule naabo, ku cidiilu cya Furr Restaurant aku, s'nudi bamanye ne mbulelelela. Bundu bwenu.

³³⁶ Patukaayimu. Patuka muntwamu's, mwaneetu. Piikalabi ne kudiku Mwoyi kampanda munda mwebe amu, newikalè bu kaamukanku kakese kândi mfuma ku dyamba aku, neùmvwè Dîyì dya Nzambi. Vuluka ne, wadyakuumvwa Dyôdì edi bwa musangu wa ndekeelu, dimwe dya ku matuku adi panshi aa. Tukaadi anu pabwîpì menemene mpindyewu. Kwêna musweku kulwa anyi, diloolo edi?

³³⁷ Nzambi munanga, nyewu tudi basòmbè kakuyi tuseku mpindyewu, ndituku dya disakidila anu dya cya bushuwa edi, Mukalenge. Ndi ne kusakidila, Mukalenge, bwa pândi ne mwoyi mu dituku edi. Edi ndituku didi ditambe bunene. Mupostolo Pôlò wakajinga bikole bwa kumona dituku edi. Bantu banene baa kale baakajinga bikole kudimona. Baprofeta baakajinga bikole kudimona. Bavwa bindile dituku edi. Abraham uvwa mwindile dituku edi, bwalu ùvwa wènda ùkeba Cimenga civwa Muciibaki ne Mucyenji mwikàle Nzambi; ncilembelele anu kumutu kwetu menemene eku, diloolo edi. Yone wakamona Nyuma wa Nzambi upweka ufumina mu Dyulu, kufilaye bujaadiki, kumanyaye ne awu uvwa Mwânà wa Nzambi. Kadi, elaaku meeji mpindyewu, n'Yêyè ewu munkaci mwa kusungula Mukaj'Ende musela.

³³⁸ Nzambi munanga, mwamwa naka mu ditunga dijima mu myaba yònsò, akulanganaku ne myoyi yabo. Anu Wèwè ki Umwepele udi mwa kushintulula myoyi yabo. Piikalabi ne kakuvwa Dimiinu diteeka munda mwabo kacya ku cibangidilu to, kabaakuCimonaku to, Mukalenge. Badi anu... "Mpofo nealombole mpofo nende. Nebadishinde mu mukidi," cya

bushuwa menemene, bwalu Dìyì Dyebe ndidi dyamba ne nebadishinde.

³³⁹ Mpindyewu, Taatù, bu mudibi ne tudi tumona mu ditunga dijima, pa buloba bujima, mu Afrike, makumi, makumi ne makumi mu Afrike wa ku Sud mujima, mu Mozambique, mu ditunga dijima, masangisha makeke miikàlè àngatà mikaba ya mèyì eyi. Ki mudibi ne mukaba wa mèyì ewu newuye ku matunga makumi abidi ne bya mu njila, mashiileshiilangane. Mbabange kuCimona ne kutapuluka, nkama ne nkama ya bantu. Kabyakukengela anu bààbûngì to, Mukalenge. Nenku piikala cidimba cya ndekeelu mwa kubwejiibwa mu Mubidi apu, Kilisto nealwe.

³⁴⁰ Mukalenge Nzambi, nyewu ndomba Mukaji-musela, diloolo edi, bàndì ngumvwa ne mbatapuluke ne biikàlè bindile abu, swaku batapulukeku ne bintu byònsò pa buloba. Badi ne cya kwikala bateekiibwe mu Bwikadi bwa Bukênkè bwa luuya lwa Mwànà lwa Mwànà wa Nzambi, biikàlè bwowa màyì mu Dìyì Dyende, mu dinanga Dyende. Enzaku nanku, Nzambi munanga.

³⁴¹ Swaku bwa bantu aba, badi bamweka ne mèsù aba, badi beele byanza byabo muulu aba, diloolo edi, makumi ne makumi mu tabernacle munene mwònsò emu, ndi ndomba, Nzambi, bwa Mwoyi mupyamupya ubwele munda mwabo; ndi ncilomba, bwa ditunga dijima mene nansha bwa buloba bujima, kwikalà mukaba wa mèyì ewu mwa kwediibwa aku, bwa bôbò paabo bapete Mukenji wa Disakidila ewu ne bamanye, ku twàdyosha ne bikwabo bìdì byambiibwe ebi, cìdìbo ne cya kwenza. Ki cìndì ndomba, Taatù. Enzaku nanku. Bàbènèshèku. M'Beebe Wèwè.

³⁴² Ndi mumanye ne cikaadi cilèlè mpindyewu, Taatù, bwa twètù kwikala kubiikila bantu ku cyoshelu. Ne ndi ndomba, Nzambi munanga, bwa mu citanda cyònsò, myaba yònsò mu nyungulukilu emu, ne pa buloba bujima, bwa balwe ku cyoshelu: bafiike, batooke, baa kalaabi, bafiikuluke, kwònsò kudibo aku; babanji, bapele, batu kabayi bacyuka myanda abu, balombyanganyi baa kaa pa luse, cyònsò ciikalabo aci.

³⁴³ Beena mangumba, baditu baa mènà ne aba badi beela meeki anu bwabo bôbò nkaayaabo, Éyì Nzambi: “Butaka, bakengi, bakengeledi baa luse, bampofo, kabayi nansha bacimanye to.” Wèwè wákamba ne nebiikalè mushindu awu, ne mushindu awu ki udibi.

³⁴⁴ Pa nanku ndi ndomba, Taatù, bwa Wèwè kubiikila Dimiinu dyònsò, diloolo edi. Ne myaba yònsò mu nyungulukilu wa buloba bujima mudi Dyôdi edi mwa kumata amu, swaku bwa Dyôdi kubakula kaamukanku kakese kadi kamanye Dìyì dya Mukalenge waku aku. Enzaku nanku, Mukalenge. Nyewu mbalambula Kûdi, mu Dìnà dya Yesu. Amen.

³⁴⁵ Mpindyewu ne mitu yenu miinyika, muneemu mu bateeleji badi bamweka ne mèsù aba. Nkufwanyineku kwikala

kampanda mwaba ewu, udi kayi musungidiibwe, kuyiku nansha mufile mwoyi webe kudi Nzambi, kwènàku wela meeji ne bivwa bikengela bwa wêwè kwikala ne kusakidila bwa cidi Yesu mukwènzèle anyi? Pa kwela meeji ne, wêwè ewu udi ngènzàmpèkààtù, ne udi kule ne Nzambi, kadi nansha nanku Cintu kampanda ku mwoyi webe, cikookola. [Mwaneetu Branham udi utuuta bintu pa cyambilu—Muf.] Wàmanyi bishi ní udi kamwe kaa ku tuumikanku tukese atu! Udi mukengi, ne newikalè anu mukengi, too ne pawàdilekelelà kùdi Cyòci aci. Bwa cinyi kubenga kwenza ne edi disakidila diikàleku dya ditambe bunene dya kacya wâpetakù, diwikalàku mwakidile Yesu Kilisto bu Musungidi webe.

346 Udiku mwa kuswa bwa kulwa kuneeku ne kwimana ku cyoshelu anyi? Mèmè nènsembilè neebe bu wêwè mwa kulwa, ngènzàmpèkààtù kana yònsò, mulume anyi mukaji, mwànà wa balume anyi wa bakaji, cidimba cya ekeleeziya anyi kuyi cidimba cya ekeleeziya. Kwikala cidimba cya ekeleeziya kakwena kukuvwija mwena Kilisto to twamb'eku twamb'eku. Cyoshelu ncyeci bwashi. Swaku ulwe, ngènzàmpèkààtù kana yònsò udi muswe kulwa awu, bwa kwakidila Mukalenge Yesu Kilisto. Wêwè udi muswe bulelela kulekela . . .

347 Bamwe baa kunudi nwènù beena mangumba badi baswe kulekela kwikala kudya cyakudya cya nzoolo abu, cya kwamba ne: “Wêwè mwikalè mwena *cikampanda* bidi anu bilenga” aci, nudiku bulelela baswe kumanya cidi dibatiiza dilelela dya Nyuma Mwîmpè anyi? Lwâyaaku, nujandule.

348 Cyoshelu ncyeci bwashi. Tukaadi badilongolole. Patuka anu buludi, mu—mu nkwaswa webe amu. Bànda wêwè anu kuneeku ulwe kutwa binù ku cyoshelu eku, wêwè mwaneetu wa balume uciidi ufikilaku ewu.

349 “Disakidila, Éyi nzambi, ndi ne kusakidila kwàbûngì Kùdi. Kwa ne, mu nsòmbelu wanyi yònsò, ntu mumanye ne kùdi Cintu kampanda, Mukalenge. Kacya ncitukù musankishiibwe to. Nkàadi muteetètètè. Mwawa—mwawa ndyambidila ne: ‘Cidimu cyalwa, nêncyènzè. Lumingu lwàlwà, nêncyènzè, musangu walonda wûngùmvwà dibiikila dya ku cyoshelu awu. Nêncyènzè, dîngà dituku.’ Ntu anu ndaadikija, ndaadikija anu kulaadikija. Kadi, Mukalenge, ndi mumanye ne kudi cintu kampanda cidi kaciyi cyenda bîmpè kùndi. Ntu misangu yònsò anu mwitabuuje ne kudi cintu kampanda cishiilangane. Nenku mpindyewu, Mukalenge, diloolo edi, ndi ne kusakidila bwa dilongolola didi dyenjiibwe kudi Mwànà wa Nzambi, dya ne mpekaatu yanyi, bupidya bwanyi mu bushuwa bwa bwalu, mbufwanyineku kusukudiibwa ne kuumushiibwa kùndi. Nyewu ndwa, diloolo edi, ntwà binù bwa kwitaba dibenesha dinene dya disakidila dyakangenzela Yesu Kilisto paakamfwila Ye ku Kalvariyo apu.”

³⁵⁰ Udiku muswe kulwa anyi? Mpindyewu nyewu kudi bantu batwe binù banyungulukile cyoshelu mwaba ewu. Bwa cinyi kuyiku ujuuka bwa kulwa? Peebe's ukaadi muswaswaswe bwa kucyenza. Ukaadiku muciteeteteete.

³⁵¹ Anji elaaayibi anu meeji bwa Mwaneetu Lyle Palmer, mwaneetu mulenga, wa mushinga mukole awu. Ûvwa musòmbè mu bulà bwende, mûndì muumvwe bamba, mutangile muvwa mwanende wa bakaji mutekete unaya ndundu wa kabwenga pambelu apu, anyi cintu kampanda, kadi kwalabukaye anu mu nkwaswa ne kufwaye kumpala mene kwa yèyè kunyungaku nansha kakese. Kwèna mumanye ne ndîbà kaayi diwikala wêwè mwa kuumuka panwapa to. Kwèna anu mumanye ne ndîbà kaayi diwikala mwa kuumuka kuya to. S'bidi anu mwa kwenzeka ne, ciikàlè diloolo edi, pa nanku mbwa cinyi kubenga kulwa ne kulongolola bwalu abu mpindyewu?

³⁵² Lwâyaayi, nwênù abu. Kwèna mwa kuumvwaku Cintu kampanda cikukoka bikole anyi? Mêmè—mêmè ndi mumanye ne kudi bààbûngì beenu mwaba ewu bavwa bakengela kwikala apa ku cyoshelu eku, ne kî ng'anu bantu basambombo anyi mwandamutekete aba badi basòmbè muneemu emu to. Mpindyewu, panwikala nungiitabuuja ne bu nwênù mwa kutangila ku cibumba cya ku cyambilu eku, maalù mudiwu munkaci mwa kwenzeka, ngiitabuujaayi mpindyewu. Dituku dikwabo dîyì dyanyi nedipuwishiibwe. Kanwakudyumvwaku kabidi to. S'udi mufwanyine kwikala ukaadi ujinga ne nunku uvwa mwa kwikala mulwe.

³⁵³ Wêwè udi wamba ne: "Kadi, Mwaneetu Branham, mêmè ewu's nkaadi cidimba cya ekeleeziya." Cyûkaadi aci kacyna cishintululaku cintu to. Nansha—nansha Nikodeme's uvwa pende anu cidimba cya ekeleeziya. Nansha Yone, Peetelo, Yakobo, Pôlò, ne bakwabo bônso abu's bavwa paabo anu bidimba bya ekeleeziya.

³⁵⁴ Pôlò's uvwa cidimba cya ekeleeziya too ne paakenzeka cintu kampanda diloolo dikwabo, anyi ciwva mmundaamunya kampanda, mwakalwaye. Ki kwikalaye cidimba cya ekeleeziya cishintuluke musangu awu, mulwe mwânà wa Nzambi. Kwèna muswe kulwa anyi? Kaa, yèyè's uvwa mulongeshiibwe. Yèyè's uvwa mwena mamanya a mu mutu. S'ûvwa mumanye ne ûvwa mulongeshiibwe, mulongeshiibwe mu cimwe cya ku bilongelu bitambe bunene bìvwàku, kudi Gamaliele, umwe wa ku balongeshi batambe bwîmpè bàvwàku mu ditunga amu. Kadi wakamanya ne bivwa bimukengela cintu kampanda.

³⁵⁵ Kwèna muswe kulwa anyi? S'nyawu nkulomba musangu ewu kabidi. Mu... Apa anyi mu nyungulukilu wa ditunga, nyewu nkulomba, mwaba wônso wûdì awu, mu disangisha dyônso dyûdì usanganyiibwa amu, pa dîbà edi dya disakidila. Vuluka

ne, badi munkaci mwa kukwata bîndi ngamba ebi mwaba ewu pa mukaba wa mêyi; kî ng'anu apa to, kadi nne mu Dyulu.

³⁵⁶ Udi mumanye's, mbijaadikiibwe ku maalu a mamanya ne dinyungakana dyônsò dyûdi wenza didi dikwaciibwa pa mukaba. Badi bajaadika aci. Wavuluka ne, télévision utu mujaadike cyôci aci. Télévision katu—katu ukwatakaja cimfwanyi aci to. Wêwè ki udi cimfwanyi aci. Yêyè udi anu ucituma cyanaana, cyûdi wêwè wenza aci, ucibweja mu kajila kampanda. Wêwè udimu, nansha bishi. Wamonu anyi? Paudi unyungisha munu webe apu, dinyungakana adi didi diya mu nyungulukilu wa buloba bujima. Musangu wônsò wûdi uvwala nkanzu kampanda, mmwenekelu yebe ayi yidi yiya pa buloba bujima. Yidi yikwaciibwa pa mukaba. Meeji ônsò àdi apitakana mu mutu mwebe amu awu adi akwaciibwa pa mukaba. Ne dîngà dituku mukaba awu newulekele kukwaciibwa, newuteekiibwe mu album.

³⁵⁷ Ne pashiishe ku Cilumbulwidi nebàwêlùlùlè. Ki wêwè awu mwimane ne nsuki mibebula, peebe wamba mùdi mwena Kilisto. Ki wêwè awu mwimane ne meeji mu mutu abengangana ne Dîyi, ne ciine aci ciikàle anu mu meeji ebe amu mene. Kuyi mwa kucisokokaku to. Wavuluka ne, télévision, nansha maalu a mamanya miine mmamanye ne ncya bushuwa. Wêwè udi mwimane mwaba awu mpindyewu mene, mumanye ne bivwa bikengela wêwè kwikala kaaba aka, uvuluke ne, padi cyôci eci cikwaciibwa pa mukaba apa, mu Dituku dya Cilumbulwidi, meeji amweamwe audi munkaci mwa kwela awu neààlukilè cyakabidi mu mutu mwebe. Neciikàlè cikwaciibwe anu pa mukaba apu. Baa pa buloba bujima nebacimone padi mukaba awu wediibwa. Bwa cinyi baa pa buloba kabayiku. . . Bakutangila, mu Dituku dya Cilumbulwidi adi, Banjelo bônsò bitwilangane.

³⁵⁸ “Wêwè mumfwe Mêmè bundu panwapa, padi cimfwanyi cyebe munkaci mwa kukwaciibwa mpindyewu apa, mu Dituku dya Cilumbulwidi Mêmè nênkufwè bundu. Bwalu, Ndi mulaabe Dîyi Dyanyi, mukutumineDi. Wêwè kuyi muswe kuDiitabuuja to. Wêwè kusokoma paanyima paa cintu kampanda.”

³⁵⁹ “Kakaa,” mùdi wamba, “mêmè's ndi mwîmpè bikumbane. Ntu mwenze *cikampanda*. Nkaadi muje maja mu Nyuma. Nkaadi mwakule mu myakulu.” S'ki citu bampangaanu benza paabo. “Nkaadi mwele mbila.” S'ki citu bampangaanu benza paabo. Mmuni mùdi mwa kwela Dîyi nyima pa dîbà adi?

. . . bwa cinyi kubenga,
Bwa cinyi kubenga kulwa kudiYe mpindyewu?
Bwa cinyi kubenga, bwa cinyi kubenga,
Bwa cinyi kubenga kulwa kudiYe mpindyewu?

Bwa cinyi udi windila, mwaneetu munanga,
Kaa, cyûdi ujangulukila nunku ewu ncinyi?
Yesu nyewu mwindile bwa kukulamina
Kaaba mu Nzubu Wende mujidila.

Ukuvwija cimwe cya ku bidimba bya Mubidi Wende!

Bwa cinyi. . . ?

Kaa, wêwè kaamukanku kakese wa yaaya, lwâku mpindyewu's.

Kaa, bwa cinyi kubenga kulwa. . . ?

³⁶⁰ Mukalenge, mêmè ndi ne kusakidila. Ndi ne kusakidila kwâbûngi. Disakidila diikâlè Kûdi, Mukalenge; kacyi bwa cyakudya cya mubidi to, nansha mudibi ne mbwa cyôci paaci. Kadi, Mukalenge, cikondo cya nshiikidilu cikaadiku. Ndi ne kusakidila bwa Cyakudya cya nyuma eci, Mukalenge, Cyakudya cya nyuma cya Bitampi Mwandamutekete bivwâ bilayiibwe bwa kukangudiibwabi abi.

Wêwè udi wamba ne: "Aci's neciikâlè cintu kampanda cya cishiilangane's." To, to.

³⁶¹ Kwêna mwa kusakidila dîyi nansha dimwe to. Ne kuumushila. . . CikaadiMu, ciikâlè anu cisokoka cyanaana. N'Citwibwe citampi. Mbanganyi badi bumvwa aci? Ambaayi ne: "Amen." [Disangisha didi dyamba ne: "Amen."—Muf.] Nwamonu anyi?

Wêwè udi wamba ne: "Ee, aci's neciikâlè bwalu busokoka bwalwa kupatuka patooke's." Kaa, to.

³⁶² Cikaadi Mufundu. Kwêna mwa kusakidilaKu dîyi nansha dimwe to, anyi kuumushilaKu nansha dimwe. Nwamonu anyi? CikaadiMu. Bidi bikengela cibuludiibwe anu cyanaana mu dituku dya ndekeelu.

³⁶³ Kwêna muswe kulwa anyi? Lwâku mpindyewu, mulunda wanyi. Pawikala kuyi mwa kuumvwa to, lwâku. Twaku binù, wakule Nende pa Cyôci aci. Piikalabi ne mêmè ncyêna mwa kukutookeshilaCi to, Yêyè neakutookeshile, bwalu Yêyè ûdi—ûdi Kamana-mpatâ mu byônsò.

. . . mu nkwasu Wende wa butumbi mujidila
awu.

Kaa, bwa cinyi. . .

Kwêna muswe kulwa anyi?

. . . bwa cinyi kubenga,

Bwa cinyi kubenga kulwa kudiYe mpindyewu?

³⁶⁴ Vuluka ne, kudi dikwaciibwa dya pa mukaba dya cyôci eci, kî ng'anu pa ewu mukaba wa mêyi to, kadi pa mukaba munene wa Nzambi. Muntu ne muntu wa kunudi aku, dinyungakana dyônsò, paudi winyika mutu webe apu, winyika mwoyi webe, nî mmeeji kaayi adi apitakana mu mutu mwebe

awu, wavuluka ne, bidi munkaci mwa kukwaciibwa pa mukaba mu Butumbi mpindyewu mene, ne mukaba awu newediibwe mu Dituku dya Cilumbulwidi. Dipangadika dyebe didi penyi? Kaa, mushindu mwine uwakeba bwa kubishintululabo's we, mu dyôdi Dituku adi.

³⁶⁵ Mêmè nêngănji anu kwindila's, bwalu kudi bààbûngì, bààbûngì menemene , banyungulukile cyoshelu patudi twakulangana apa. Nwamonu anyi? Pàmwápa umwe wabo, bu mêmè mwa kwindilaku kabidi ndambu, nkufwanyineku kwikala mukwabo kuntwaku, mufwanyine kwikala mu mwaba kampanda mu New York, mufwanyine kwikala mu mwaba kampanda mu Philadelphie, mwamwa mu Californie, mu Arizona. Mu mwaba kampanda, nkufwanyineku kulwa mukwabo. Mpaasata, nansha wêwè mwikàle penyi, kulekedi dibiikila dya ku cyoshelu edi mpindyewu to.

³⁶⁶ Bidi mwa kwenzeka ne katuyi mwa kupeta disangisha dikwabo dya Disakidila to. Edi ndifwanyine kwikala dya ndekeelu, ne mikaba neyiteekiibwe ku luseke, diloolo edi, bwa musangu wa ndekeelu. Mukaba newufike ku ntengu, dimwe dya ku matuku adi panshi aa. Dikwata dya mukaba nedikoseke ne mukaba newuteekiibwe mu album wa Nzambi. Pashiishe nebàwêlùlùlè, cidi meeji ebe mpindyewu aci. Kwikadi wâlwa kwamba ne kuvwa mumanye bishiilangane to. Udi mumanye. "Kadi muntu nansha umwe kèna mwa kulwa kùNdi, padi Taatù Wanyi kayi mumukoke to. Ne bônso badi Taatù muMpe, nebalwe."

...kulwa kudiYe...?

³⁶⁷ Mwaneetu, ndi ngiitabuuja ne, bu ne mêmè mvwa musòmbè kuntwaku mu mwaba kampanda, ne mwikàle ne tuumeeji nansha tuncii, ncyá bushuwa ne nunku ndi mulwe kuneeku ne lukasa lwònsò. Hmm.

Kaa, bwa cinyi kubenga,
Bwa cinyi...?

³⁶⁸ Kwebe kukaadi kujike anyi? Udi mutwishiibwe ne kwèna munkaci mwa kubungamija Nyuma Wende mpindyewu anyi? Nanku tulamaayi anu mitu yetu miinyika. Udi mutwishiibwe ne kwèna mubungamije Nyuma Wende anyi? Udi mutwishiibwe ne udi mwenze anu menemene cidiYe mukwambile bwa kwenza anyi? Udi mutwishiibwe mpindyewu anyi? Wavuluka ne, udi—udi mufwanyine kubengaku kupeta mpunga mukwabo bwa kashidi. Bidi mwa kwenzeka ne dikwata dya mukaba diikale dijike diloolo edi. Bidi mwa kwenzeka ne eci ciikale bwònsò bwawu. Bidi mwa kwenzeka ne eci ciikale mukaba wa mêtì wa ndekeelu bwebe wêwè. Udi mutwishiibwe ne udi mudilongolole mpindyewu anyi? Byôbì nanku, ngâbishiyi mu byanza byebe, mu Dinà dya Mukalenge Yesu.

³⁶⁹ Mpindyewu padi korale wenda wimba bituulubituulu apu, nênsambidilè badi kuneeku aba. Mêmè ntu anu mwena Kilisto wa mushindu wa pabwawu menemene. Ndi ngiitabuuja ne Nzambi ngudi ne cya kusungila. Ndi ngiitabuuja ne Nzambi ngudi ne cya kukuna Dìyì. “Mêmè Mukalenge,” mudi Bible wamba, Yeshaayi, “Mêmè Mukalenge ngudi muCikune. Mêmè ngwaCimyamina mâyi, muunya ne bufuku, bwa muntu kalu kuCinyenga mu cyanza Cyanyi.” Kumpala kwa mêmè kulomba nî nganyi nî nganyi bwa kulwaye ku cyoshelu kùdì bantu aba eku, ndi muswe mbasambidile, mêmè mwine.

Twinyikaayaaku mitu yetu mpindyewu.

³⁷⁰ Yesu munanga, mêmè ndi muteele anu Dìyì Dyebe cyanaana, dyàkambà muprofeta Webe adi, ne ndi mumanye ne mēyi a baprofete atu malelela. Ne Wêwè wâkamba ne: “Mêmè Mukalenge ngudi muCikune.” Kaaa, ncyà bushuwa ne, Wêwè ngwâkaCifùnda mu Mukanda wa Mwoyi wa Mwânà wa mukooko, kumpala kwa difuka dya dyulu ne buloba. “Mêmè Mukalenge ngudi muCikune, ne Mêmè ngwaCimyamina mâyi, muunya ne bufuku, bwa muntu kalu kuCinyenga mu cyanza Cyanyi.” Aba nunku, pâmwâpa, Mukalenge, bakaadi bumvumvwe dibiikila dya ku cyoshelu misangu ne misangu. Kadi Wêwè ngucidi anu uCimyamina mâyi ewu, Mukalenge.

³⁷¹ Ki bôbô aba, diloolo edi. Swaku anu bwa basuuluke, diloolo edi, Taatù, ku bintu byônsò bya pa buloba, mpekaatu yônsò ne ntatu bidi mu myoyi yabo abi, ne biikalè ne meeji anu mu ôwò, ne kaneemu kônsò, mu myoyi yabo, badilekelele ku Dìyì Dyebe, mpindyewu mene, bâmbè ne: “Mukalenge Yesu, munda mwa mwoyi wanyi, ntu misangu yônsò anu mwitabuuje ne kutu cintu kampanda bwanyi mêmè, cîntù kacya nciyiku mwanji kupeta to. Nansha mudibi ne nkaadi muteeteteete, mudi diyì dyambiibwe diloolo edi, bwa kulonda nzoolo wa cikuka awu, kadi kuvwa cintu kampanda cimweka cya pabwaci bwanyi mêmè. Kacivwa cyumvwika cijaalame menemene to. Nenku, diloolo edi, ndi ndyumvwa ne nkaadi mfika mpindyewu pabwîpi menemene mu maboko a Dìyì didi ne mwoyi. Nyewu ndwa mwaba ewu anu mu kaneemu kônsò, mwikàle ne meeji mu ôwò. Nyewu ndi mutwe binù ku cyoshelu eku. Ndi nkeba lupandu, Mukalenge, ne mwoyi wanyi wônsò. Ndi ne nzala ya dikema! Ndi muswe bwa Wêwè, Mukalenge, unkwate mu maboko Ebe, diloolo edi. Kabiya ku disaluka kampanda to, kadi ku Nyuma wa dinanga, ungangate mu maboko Ebe, Nzambi munanga.”

³⁷² “Ndi mwan'Ebe. Ndi ndyumvwa ne mêmè ki mukanku uvwabo bamba awu. Mbàkùlèku, Mukalenge. Nyewu ntupika. Ndi mujuuke mu nkwasà wanyi, ne mutwe binù mwaba ewu. Mbàkùlèku, Mukalenge. Nyewu ntupika. Mfikishèku pa mapwapwa Ebe, Mukalenge, kule ne bintu bya pa buloba ebi. Enzaku bwa mbuuke nye kule ne bukooya bwa pa buloba bwônsò ebu, kule ne ciibidilu cyanyi cibi, kule ne cilele cyanyi cya

cyena mangumba. Enza bwa ndwe anu kùdì Wèwè, Nzambi munanga, bwa Nyuma Mwimpè Webe ampongolwele munda mwanyì difwidiibwa dya luse ku mpatà yanyì yònsò. Swaku, diloolo edi, nshaaleku mwan'Ebe, mupyamupya, mulela, ne cifukiibwa cipyacipya, diloolo edi. Mbàkùlèku. Ngangàtèku uye naanyi, dyamwamwa dya cyokò-cyokò ya nzoolo wa cikuka. Ngangàtèku uye naanyi, too ne ku diswa dya Mukanku, kùndì mwa kudiishiibwa kudi Dìyì dya Nzambi, too ne pângiikalà mukumbane mwa kubuuka."

³⁷³ Enzaku nanku, Nzambi munanga. Bàngàtaaku. Mbeebe Wèwè. Edi ki dyanyi disambila dya meeji matooke, mwikàle nsambidila bantu badi munkaci mwa kupunga ne lufu. Enzaku nanku, Taatù. Ndi ndambula disambila edi bwa kubakwacisha. Bwa butumbi bwa Nzambi, ki bündi ndombela nunku.

Mpindyewu ne mitu yetu miinyika.

³⁷⁴ Nyewu ndikonka, ku nyungulukilu wa cyoshelu mpindyewu, nnwènú badi batwe binù mwaba ewu aba. Bààbùngì beenu bavwa badyamba muvwabo beena Kilisto, kadi nwàvu kuumvwa ne kuvwa misangu yònsò anu cintu kampanda, mwaba kampanda, cinuvwa kanuyi naaci to. Udi mufwanyine kwikala mwenze cyenzedi cyònsò cya cyena ntendeleelu. Udi mufwanyine kwikala mwele mbila. Udi mufwanyine kwikala mwenze bintu byònsò. Udi mufwanyine kwikala muje maja mu Nyuma. Udi mufwanyine kwikala mwakule mu myakulu. Ne muntu nansha umwe kèna mwa kwamba cintu nansha cimwe cya cibengangana ne cyôci aci to. Aci ncilelela. Byònsò abi mbimpè. Kadi, udi umona's, abi *mmapà* a Nyuma, kakuyi Nyuma to. Bu ne Nyuma uvwamu, nunku dyumvwa adi kì ndyumvwe dipiishiibwe mushindu awu to.

³⁷⁵ Nwènú aba, ku cyoshelu eku, nudi nwitabuujà bulelela, ne meeji matooke ònsò mpindyewu mene, panudi mwaba ewu apa ne, anu cyenzedi nkaayaaci cya kudisuulula aci, mpindyewu kaciya disaluka to, kadi mu diitabuujà dishuwashuwale, kadiyi disambakaja, Nzambi neànwàkidilè ne neanudiishe ne Dìyì Dyende too ne panwashaala mikanku, nwènú biine, ne bakumbane mwa kubuuka anyi? Panwikala nwitabuujà nanku, ne nukeba bwa Nzambi ènzè nanku, elaayi byanza byenu muulu, nwènú badi banyungulukile cyoshelu mwaba ewu aba. Nzambi anubeneshe. Muntu ne muntu mmwele cyanza muulu.

³⁷⁶ Mpindyewu, bituulubituulu menemene, nêndombè balume ne bakaji badi badilambule ne bamanye Nzambi menemene.

³⁷⁷ Ciibùngì cya kudibo, s'mbwalu bwa dikema be, mbimweke anu bu ne bidi mushindu awu, dibiikila dya ku cyoshelu dîndì ngenza didi ciibwìpì ne bònsò anu bantu balume. Nudi bamanye's, pa ciibidilu, batu mbantu bakaji. Kadi bònsò badi anu bantu balume mwaba ewu. Ngeela meeji ne kudi muntu mukaji umwepele ku cyoshelu, diloolo edi, pàmwàpa babidi. Pa

ciibidilu batu mbantu mbakaji. Kadi, mu mushindu kampanda anyi kansanga, ndi ngeela meeji ne mbimweneke bu ne bantu bakaji badi badyambidila ne ntu ngaakula mbalwisha bôbô. Kî nnanku to, mwaneetu wa bakaji. Basatu, ngeela meeji, muntu kampanda wâmbi ne mmumone. Mêmè ncyêna mwa kumwena lwà pamutu paa cyoshelu apa to. Eyo.

378 Bamwe baa kunudi nwênù beena Kilisto badi badilambule lwâyi kuneeku nwimane naanyi mu disambila bwa katanci kakese cyanaana. Ku cyoshelu aku, mwaba wônsò uwikala awu, pa cibumba cya ku cyambilu, muntu udi mumanye Nzambi cya bushuwa awu, mumanye anu mwa kwimana kaaba aka bwa ndambu wa tusunsa cyanaana bwa kusambila pamwe naabo, pashiishe netutangalaje bateeleji. Bantu bônsò biikalê mu kaneemu kaa menemene mpindyewu. Kanuumuku to. Lwâyi anu kaaba aka nwimane mu nyungulukilu emu.

379 Bamwe baa kunudi nwênù badi biitabuuje menemene ne Eci m'Bulelela, ne tudi munkaci mwa kubwela mu cikondo cikwabo, tudi munkaci mwa kubwela mu Cikondo Cyambwibwa, nudi bamanye ne ekeleeziya kêna mwa kuya mu ngiikadilu udiye ewu to, ne kêna mwa kulengela kupita apa to. Udi ne cya kutamba kubiipa. Mbanganyi badi bamanye aci? Bâmbè ne: "Amen." [Disangisha didi dyamba ne: "Amen."—Muf.] Bidi bikengela atambe kubiipa. Ne yêyê kêna mwa kuya mushindu ewu to. Nwamonu anyi? Bikengela kwikalê Cintu kampanda, ne Cyôci aci cidid munkaci mwa kwenzeka patudi twakulangana apa, mulunda wanyi. Cikaadi—cikaadi—cikaadi cyase lwendu, nkwaka ukadi mubange bwa Mukaji-musela. Aci m'Bulelela. Aci cidid EMU MMUDI MUKALENGE WAMBA.

380 Bandaayaaku kuneeku, nwênù beena Kilisto badilambule badi baswe bwa dikwata dya mukaba—dikwata dya mukaba wenu disangane ne, aba badi balwe ne meeji matooke ônsò aba, nudi baswe kulwa bwa kulambila disambila pamwe naabo, bôbô bu bânà beenu baa balume ne baa bakaji, lwâyaaku kuneeku ku nyungulukilu wa cyoshelu eku. Imanaayi banyungulukile mwaba ewu bwa katanci kakese cyanaana, bwa disambila. Kudi muntu mukwabo udi muswe kulwa anyi? Imanaayi banyungulukile mwaba ewu. Twayi anu binù ku luseke lwabo aku. Asaayi anu lwendu, nwênù balume mwaba udi bantu balume baba; nwênù bakaji. Bituulubituulu, ne kudipwekesha kwônsò nubasambidile.

Nzambi munanga, kwacishaku...?...

381 "Ndi ndekelela byônsò. Ndi ndekelela dingumba dyanyi. Ndi ndekelela dibaka dyanyi dya kumpala adi. Ndi ndekelela bayaanyi wa kumpala awu. Ndi ndekelela byônsò, Mukalenge."

...ndekelela byônsò.
 Byônsò kùdì Wêwè, Musungidi wanyi
 mubeneshiibwe,
 Ndi ndekelela byônsò.
 Ndi ndekelela byônsò,
 Ndi ndekelela...

³⁸² Udi ulekelela mmwenenu webe wêwè mwine awu anyi?
 Udiku mwa kulekelela mmwenenu yebe wêwè mwine ayi, kudi
 Dîyì dya Nzambi anyi?

Byônsò kùdì Wêwè, Musungidi wanyi
 mubeneshiibwe,
 Ndi ndekelela byônsò.
 Ndi ndekelela byônsò,
 Ndi ndekelela byônsò.
 Byônsò kùdì Wêwè, Musungidi wanyi
 mubeneshiibwe,
 Ndi ndekelela...

³⁸³ Bônsò bàdì bìtabuujà mpindyewu, mu bateeleji emu,
 juukilaayi kuulu. Tuwĩmbàayi, cyapamwe, mpindyewu.

Ndi ndikelela...

Nwênù bônsò bàdì bàdilekelelà, nudi badilongolole bwa
 kuwimba mpindyewu anyi?

Ndi...
 ...kùdì Wêwè, Musungidi wanyi
 mubeneshiibwe,
 Ndi ndekelela...

³⁸⁴ Mpindyewu, nwênù badi banyungulukile cyoshelu aba,
 panwikala nudilekelela cya bushuwa, elaayi byanza byenu
 muulu kudiYe, nwĩmbè ne: “Ndi ndekelela byônsò. Ndi ndekelela
 dingumba. Ndi ndekelela dingumba. Ndi ndekelela ekeleeziya.
 Ndi ndilekelela mêmè mwine. Ndi ndekelela mmwenenu wanyi.
 Byônsò kùdì Wêwè, Musungidi wanyi mubeneshiibwe, ndi
 ndekelela byônsò.”

...kùdì Wêwè, wanyi...
 Ndi ndekelela byônsò,
 Ndi ndekelela byônsò.
 Byônsò kùdì Wêwè, Musungidi wanyi
 mubeneshiibwe,
 Ndi ndekelela byônsò.

Udi ucyamba wambilamu menemene anyi?

Ndi ndekelela byônsò,

³⁸⁵ [Katupa kaa mukaba wa mêtì munda mutupu—Muf.] Nwênù
 bàdì apa mpindyewu ku cyoshelu eku. Nwênù bàdì apa
 banyungulukile cyoshelu aba, bàkaadi basambile. Ekeleeziya
 wânúsambididi. Ukaadi musambila, wêwè mwine. Mpindyewu

kudi mushindu anu umwepele wùdi mwa kusungidiibwa, ngwa ne: “Ku diitabuuja nkunudi basungidiibwe, ne ciine aci ku ngàsà.” Ngàsà wa Nzambi ngudi mwakule neebe awu, mukufikishe ku cyoshelu. Udi munkaci mwa kukeba mabenasha a Nzambi. Udi munkaci mwa kukeba Dìyì Dyende. Udi munkaci mwa kukeba Nyuma Mwímpè. Udi munkaci mwa kukeba dyanyishiibwa dya kudi Nzambi. Ne piikalabi ne ki cyùdi munkaci mwa kukeba, ne mwikàle mukumbane, bulelela, ne mwoyi webe wònsò, ucilekelele, mpindyewu, kukebi disaluka nansha dikese to, ikala ukeba Bulelela kampanda, Bulelela bùdi bùfùminà munda mwa mwoyi webe amu, ku diitabuuja. “Mukalenge, ndi muswe bwa kwenza cintu kana cyònsò cidi Dìyì Dyebe dintumina dìyì bwa kwenza aci. Ndi ndilekelela mèmè mwine, ne byònsò bidi munda mwanyì.”

³⁸⁶ Pawikala witabuuja aci ne mwoyi webe wònsò, ndi muswe bwa ujuukile kuulu, ukudimuke mutangile kudi ekeleeziya ewu, bateeleji aba, ne kwela byanza byebe muulu, bwa twètù kucimba pamwe naabo ne: “Ndi ndekelela byònsò bidi munda mwanyì, Nzambi. Bwa ku dyanyi paanyi dimanya, cyònsò cindi aci, ndi ncilekelela.”

³⁸⁷ Bàndaayi pa cibumba cya ku cyambilu apa, nwênù badi ku cyoshelu aba. Bàndaayi buludi pa cibumba cya ku cyambilu apa, bânà beetu baa balume, lwà apa nunku, nwênù bònsò, ne bânà beetu baa balume ne bânà beetu baa bakaji.

Tangilaayaaku kuneeku, nwênù ekeleeziya.

³⁸⁸ [Mwaneetu wa bakaji mukwabo udi wamba ne: “Mwaneetu Branham, mèmè ewu ntu mwena ekeleeziya, kadi abidi adi panshi aa ncicyena—ncicyenamu mene kabidi to.”—Muf.] Mulekelele anyi? [“Mukalenge ngudi mumanye kùndi muswe kwikala mulombodiibwe kudiYe. Ndi muswe...?...ku ekeleeziya. Ne ndi njinga Nyuma Mwímpè, kuujiibwa ne Nyuma. Ne ndi njinga mene kufwa, piikalabi ne ki cidibi bikengela.”] Eyowa. Aci ncyà bushuwa. Udi ulekelela kantu ne kantu kudiYe ne kudi Dìyì Dyende anyi?

³⁸⁹ Mwaneetu wa bakaji mwaba ewu, wa mu dingumba kampanda. Nyewu wámbi ne: “Ndi mwena dingumba.” Kabyena bikengela bwa twètù kuditeela to. Ûtu mukwaci wa mudimu mwómò amu. Kadi nyewu wámbi ne: “Mwaneetu Branham, ndi muswe kupatukamu bwa kulwa ku Bulelela. Ndi muswe cintu kampanda cya ndondo mupite aci.” Nwamonu anyi?

³⁹⁰ Lekelaayi ngambulule Dìyì Dyende. “Baa disanka ng’aba badi ne nzala ne nyoota ya bwakane, bwalu nebuujiibwe.”

³⁹¹ Mpindyewu, nwênù badi pa cibumba cya ku cyambilu apa aba, bacidi balwilaku aba, panwikala badilongolole bwa kulekelela cyònsò cinudi, byònsò, bwa kutumikila Dìyì dya Nzambi. . . Muntu kì mmunwámBILE, lumingu elu, cya dyenza to. Mpindyewu, panwikala badilongolole bwa kudilekelela kudiYe

mpindyewu mene, elaayi anu byanza byenu muulu, nunku *ewu*, batangile kudi bateeleji. Mpindyewu, nwênù badi pa cibumba cya ku cyambilu apa aba, tùwĩmbààyi bõnsò pamwe mpindyewu ne, *Ndi Ndekelela Byõnsò*. Bõnsò, cyapamwe. Eyo.

Ndi ndekelela byõnsò,

Mpindyewu, ambilaayimu cyôci aci!...?...yêyè dîngà dituku, ne mushindu mwine wûndi ne kusakidila. Cimufikishe ku didilekelela...?... .

...Musungidi,

³⁹² Nudi cya bushuwa nucyambilamu anyi? Ambaayi ne: “Amen.” [Disangisha didi dyamba ne: “Amen.”—Muf.] Ambaayi ne: “Amen,” cyakabidi. [“Amen.”]

Ambaayi ne: “Mukalenge, nkenkètèku, nteeteku, ne mpeesheku mpunga. Eci ki cyõnsò cîndiku paanyi mwa kwenza, diloolo edi, nkudifila mêmè mwine kûdi Wêwè. Wêwè udi mumanye nzala ya mwoyi wanyi, Udi mumanye dijinga dyanyi. Mulayi Webe uvwa mbwa kukumbaja diine dijinga adi. Mpindyewu ngăwĩtàbì, ne ndi ndilekelela Kûdi.”

Bõnsò cyapamwe:

Ndi ndekelela byõnsò,

Ndi ndekelela byõnsò.

Byõnsò kûdi Wêwè, Musungidi wanyi

mubeneshiibwe,

Ndi ndekelela byõnsò.



DISANGILA DÌDÌ KADÌYÌ DÌMWÈNEKA DYÀ
MUKAJÌ-MUSÈLA WÀ KILISTÒ LUA65-1125

(The Invisible Union Of The Bride Of Christ)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu Dituku dya Disakidila, mu diinâyì diloolo, mu matuku 25 a ngondo wa dikumi ne umwe, cidimu cya 1965, mu Life Tabernacle mu Shreveport, Louisiane, U.S.A. Ndyumusha pa mukaba wa mêtî ne dituuta ku cyamu mu kaabujima kâàdî mu Anglais. Nkudimwinu wa mu Ciluba ewu mmutuuta ku cyamu ne mwabanya kùdî Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwîlà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org